

# ዮሃንስ ፩ ዓፊዳ ኑ ጎዳ ዩሱስ ከርስቶሳ ሚሺራቾ ቃላ ገደ ቆፋ

ዮሃንሳ ሚሺራቾ ቃላይ ዩሱስ እሾ ማይዲዲ እሳ ገደን ቤተዳ ዴዎ ያሳ ቃላ ገዲዳይሳ ቆንጨሴስ። ሄሲካ እዋይ ጎዳ ያሳ ገዲዳ ማላ፣ ዩሱሲካ ጎዳ ያሳ ገዲዳይሳ ቤሴስ። ዮሃ 1:1፤ 8:58፤ 12:41፤ 20:28። ማፃፋዚ ሎዔላ ቆንጨሲዛ ማላ ሃይሲ ሚሺራቾ ቃላይ ፃፊተዳይ ናባቢዛይቲ ዩሱሲ እስ እሽዛዴ ገዲዲ ያና ጌቲቲዳ ያሳ ና ገዲዳይሳ እማናና ማላኔ እሳይ ኢዛ እማኒዲ ሜርና ዴዎይ ኢዛን ዲዛይሳ ኤራና ማላሳ። (20:31)

ሚሺራቾ ቃላዛስ ኮይሮ ከፍለይ ሜርናስ ዲዛ ያሳ ቃላይኔ ዩሱሲ ኢሲኖ ገዲዳይሳ ኮይሮ ሸሸዳፔ ጉዬ ዩሱሲ እስ እሽዛዴ ገዲዲ ያና ጌቲቲዳ ያሳ ናይ ኢዛ ገዲዳይሳ ቤሲዛ ዲማ ዲማ ማላታታካ ሸሸሴስ። ሄሳፌ ቃሴ ሄ ማላታታፔ እይ እይፊይ ቤተዳኮኔ ቆንጨሲዛ ታሪኬቲ ካሉቲስ። ሃይሲ ሃ ከፊለዚ ኢሲ ኢሲ እሳቲ ዩሱሳን እማኒዲ ኢዛ ካሊዛይታ ገዲዳይሳኔ ሃራ እሳቲ ቃሴ ኢዛራ ዋኒ ኤቁቲዳኮኔ ኢዛን ኑ እማኖኮ ገዛይሳ ዮቲቲስ። (13:17) ጋካናስ ዩሱሲ ኦይኬቲዳ ኦማርስ ባና ካሊዛይታራ ኢዛስ እይ ማላ ሚኖ ኢሲፊቲላ ዲዛኮ ኢዛስ ካቁቲላ ዋዴይ ማቲሺን ኢዚ ባና ካሊዛይታስ ገሊሲዛ ቃላኔ ሚንጭዛ ቃላ ኢዚ ኢስታ ሲሲዳይሳ ቆንጨሴቲስ። ሃንኮ እቲዳ ወርሴላ ሸምፖቲ ቃስ ዩሱሲ ኦይኬቲዳይሳ፣ ፐርዳስ ሸቁዳይሳ፣ ኢዛ ካቁቲላ ገሺኔ ሃይቆፔ ዴንላ ገሽ ሃሳሶካ ኢዛ ዴንላፊ ጉዬ ባና ካሊዛይታስ ኢዚ ባና ቆንጨሲዳይሳ ዮቲስ።

ዮሃንሲ ዩሱስ ከርስቶሳ ባጋራ ቤቲዛ ሜርና ዴዎ ሎዔላ ቤሲዛይ፣ ያሳ ከያቲላ ሃዒፔ ደሚዲ ዩሱሳ፣ ኦጌ፣ ቱማኔ ዴዎ ሂስቲ እማኖን ኤከዛይታሳ። ዮሃንሳ ሚሺራቾ ቃላ ሃራታፔ ዲማሲዛይ እያና ቱማቲላ ኤሪሳናስ ኬሂ ኤራቲዳ እሲ ሃቾ ሃቾ ጎዔቲዛ ሚሻታ ሄይቲካ ሃላ፣ ቁማ፣ ፖዎ፣ ሄሚዛዴ፣ ደርሳታ፣ ዋይኔ ሚላኔ ዋይኔ ሚላ እይፊ ሚሳቲዛይታ ሌሚሶን ዮቲዛይሳ።

ሃ ማፃፋይ ኦይከዳ ኩማላ ቆፋ  
ጌሎሶ 1:1-18

ፃማቂዛ የሃኒሳኔ ዬሱሳ ካሊዳ ኮይሮ ታማሬታ 1:1-19-51  
 ዬሱሱ ያሳ ኦሶ ዶሚዴስ 2:1-12:50  
 ዬሩሳላሜኒኔ ሄ ሄራን ዬሱሳሰ ወርሴፋ ኦሶ ጋላሳታ 13:1-19:42  
 ሃይቆፔ ጎዳ ዳንሊኔ ኢዛ ቆንጨፎል 20:1-31  
 ኩሻ ቆፋ 21:1-25

1 ቃላይ ካሴ ኮይሮ ዴስ። ቃላይካ ያሳ ኣቻን ዴስ። ሄ ቃላይካ ያሳ። 2 ኢዚ ኮይሮ ያሳ ኣቻን ዴስ። 3 ሜዴቴሉ ወሪ ኢዛን ሜዴቴዴስ። ሜዴቴዴዛን ኢዚ ባይንዳ ሜዴቴዴይ ኢሲናካ ዲኩ። 4 ዴይይ ኢዛን ዳወስ። ሃና ዴይያ ኣሳሰ ፖ። 5 ፖይይ ፉማን ፖሲሴስ። ፉማይ ፖፖ ሙሌካ ያኔና።

6 ያሳፌ ከቴቴዳ የሃኒሳ ጌቴቴዛ ኢሳዴይ ዴስ። \* 7 ኢዛ ማርካቴላን ኣሲ ወሪ ኣማናና ማላ ፖፖስ ማርካ ጌዲ ዬዴስ። 8 ኢዚ ፖፖ ጊሽ ማርካታና ዬዴስ ኣቴን ኢዚ ባ ሁዴስ ፖፖ ጌዴና። 9 ኣሳ ኡባሰ ፖፖ ኢሚዛ ቱሙ ፖይይ ሃይሳ ሃ ኣላሜዛን ዬሱሳን ዴስ።

10 ቃላይካ ካሴ ኣላሜን ዴስ። ኣላሜይካ ሜዴቴዴይ ኢዛና። ጌዶ ኣቴን ኣላሜይ ኢዛ ኤሪቤና። 11 ኢዚ ባ ባጋታኮ ዩን ኢዛ ባጋቲ ኢዛ ኤኪቤቴና። 12 ጌዶ ኣቴን ኢዛ ኤኪዳይቴ ኢዛ ሱንፋን ኣማኒዳይቴ ኢሰቲ ያሳ ናይታ ጌዴና ማላ ማታ ኢሰታሰ ኢሚዴስ። 13 ኢሰቲካ ያሳ ናይታ ጌዲዳይ ያሳፌ ዬሌቴዳ ጊሽ ኣቴን ኣሳ ዜሪፋፌ ሄሲካ ኣሳ ዋጋን ዋይኮ ኣሾ ሸኔን ጌዴና።

14 ቃላይካ ኣሰ ጌዲዴስ። ያሳ ኪያቴላኒኔ ቱማን ኩሚዲ ኑናን ኣቁዴሰ፤ ኢሲ ናሰ ኣዋ ማታን ዲዛ ቦንቾ ሚሳቲዛ ኢዛ ቦንቾ ኑ ቤይዶስ።

15 የሃኒሲካ “ታፔ ጉዬራ ዩዛይሲ ታፔ ኣዴስ። ጋሶይካ ኢዚ ታፔ ካሴካ ዴስ ጋዳ ታ ኢንቴሰ የቴዳይሲ ሄኮ ሃይሲ ኢዛኮ!” ጌ ማርካቴዴስ።

16 ኢዛ ኩሜፋ ኪያቴላን ኑ ወሪ ኪያቴላ ቦላ ኪያቴላ ኤኪዴስ። 17 ዋጋይ ሙሴ ባጋራ ኢሜቴዴስ፤ ኪያቴላኔ ቱማይ ጌዲኮ ዬሱሰ ኪርሰቶሳ ባጋራ ኑስ ዩዴስ። 18 ያሴ ቤዩዳይ ኦኒካ ባዋ። ጌዶ ኣቴን ያሳ ኣዋ ማታን ዲዛ ያሳ ና ኢሶይ ፃላላ ኢዛ ቆንጨሲዴስ።

ፃማቂዛ የሃኒሳ ማርካቴላ  
 (ማቶ 3:1-12፤ ማር 1:1-8፤ ሉቃ 3:15-17)

\* 1:6 ማቶ 3:1፤ ማር 1:4፤ ሉቃ 3:1-2

19 አይሁዳታ ዳናቲ ዩሩሳላሜፔ ቄሴታኔ ሌዌ ናይታ የሃኒሳኮ ከቲዲ “ኔ ኦኔ?” ጊዲ ኦይቸሺን።

20 የሃኒሲ “ታኒ ከርሰቶሳ ጊዲኬ” ጊዲ ጌሺ ማርካቲዳሰ አቲን ማርካታናሰ ኢዲቤና።

21 ኢሰቲካ “ሂሰቲን ኔ ኦኔ? ኔ ኤላሳ?” ጊዲ ኦይቸዳ። ኢዲካ “ጊዲኬ” ጊዲ ኢሰታሰ ዛሪዳሰ። ኢሰቲካ “ኢዲ ያና ጌቲቲዳ ናቤይ ኔኔ?” ጊዳ። ኢዲካ “ኣካይ ታና ጊዲኬ” ጊዳሰ። \*

22 ኢሰቲ ቃሰ “ሂሰቲን ኔ ኦኔ? ኦና ከቲዳ አሳሰ ኦ የታና ማላ ኔ ኔና ኦና ጋይ?” ጊዳ። 23 ኢዲካ “ናቤ ኢሳያሲ የቲዳ ማላ ታኒ ‘ፆሳ ኦኔ ሱሪሲቲ’ ጊሺ ባዞ ቢታን ዋሲዛዳ ቃላ ገሪሳ” ጊዳሰ \*

24 ፋርሳዌታፔ ከቲቲዳ ኢሲ ኢሲ አሳቲ 25 ሄሳ ጊሽ “ኔ ፆሲ ከቲዳዳ ዋይኮ ቡሮ ያና ጌቲቲዳ ናቤይ ኔና ጊዳንታ ጊዲኮ ሂሰቲን አዛሰ ኦና ፃማቃይ?” ጊዲ ኢዛ ኦይቸዳ።

26 የሃኒሲካ ኢሰታሰ “ታ ሃሳን ፃማቃይሰ፤ ጊዳ አቲን አንቲ ኤሮንታይይ አንቲ ጊዳን ኤቁዳሰ። 27 ታፔ ጉዬራ ያናይሲ ኢዛ። ታ ኢዛ ጫማ ቃሾ ቢርሻናሰ ቤሲዛዳ ጊዲኬ” ጊዳሰ።

28 ሃይሲ ዉሪ ሃኒዳይ የሃኒሲ ፃማቁዛ የርዳናሴ ሻፋፔ ሄ ፒንላን ዲዛ ቢታኒያ ጌቲቲዛ ካታማና።

**ፆሳ ደርሰ**

29 ዋንቲሳ ጋላሰ የሃኒሲ ዩሱሲ ባኮ ዩሺን ቤዩዲ “ዳሪ ናጋራ ቢታፌ ዲጋና ፆሳ ደርሲ ሄኮ ሃይሲቸ! 30 ታፔ ጉዬራ ያናይሲ ኢዛ ታፔ ካሴካ ዲዛ ጊሽ ታፔ ኣዴሰ’ ጋዳ ታ አንቲሰ የቲዛይ ሃይሲቸ! 31 ታካ ታ ባጋራ ኢዛ ኤራቤኬ ሺን ጊዲኮካ ኢዛ ኢሰራዔሌ ዳሪሰ ቆንጫና ማላ ታ ሃሳን ፃማቃሼ ያዲሰ” ጊዳሰ።

32 ካሌሌዲካ የሃኒሲ ሂዝጊ ማርካቲዳሰ “ዲሎ ኣያናይ ሃራጳ ካፎ ሚሳትዲ ሳሎፔ ዋዲሺኒኔ ኢዛ ቦላ ኡቲሺን ቤያዲሰ። 33 ታ ታ ባጋራ ኢዛ ኤሪኬ ሺን ታ ሃሳን ፃማቃና ማላ ታና ከቲዳዳይ ‘ዲሎ ኣያናይ ኢዛ ቦላ ዋዲ ሸምፒሺን ኔ ቤያናዳይ ዲሎ ኣያናን ሜጫናይ ኢዛ’ ጊዲ ታሰ የቲዳሰ። 34 ታካ ሄሳ ቤያዲሰ። ሄሳ ጊሽ ኢዛ ፆሳ ና ጊዲዳይሳ ታ ማርካታይሰ” ጊዳሰ።

**ኮይሮ ዩሱሳ ካሊዳይታ**

\* 1:21 ሚል 4:5፤ ዛሬ 18:15-18 \* 1:23 ኢሳ 40:3

35 ዋንቴላ ጋላስ የሃኒሲ ባና ካሊዛ ናምዓታራ ሄን ኤቂዳስ።  
36 ዩሱሲ ኢዛ አቻራ አጂሺን የሃኒሲ ቤዩዲ “የሳ ዶርሲ ሄኮ ሃይሲቸ!” ጊዳስ።

37 የሃኒሳ ካሊዛ ናምዓቲ ሄሳ ሲይዲ ዩሱሳ ካሊዳ።  
38 ኢስቲ ኢዛ ካሊሺን ዩሱሲ ጉዬ ዩይ ያሊዲ “አይ ኮዩቲ?” ጊዳስ። ኢስቲካ “አስታማሬ! ኔ ዲሳሶይ አዋ?” ጊዳ።

39 ኢዚካ ኢስታ “ሃ ዩዲ ቤይቲ” ጊዳስ። ሄሳ ጊሽ ቢዲ ኢዚ አዋን ዲዛኮ ቤዩዲኔ ሄ ጋላስ ኢዛራ ኢሲፌ ፔዒዳ። ዋይይካ ጌዴ ታሙ ሳቴሶ ቢዳስ።

40 የሃኒሲ የቲዳ ቃላ ሲይዲ ዩሱሳ ካሊዳ ናምዓታፔ ኢሶይ ሲሞና ጳፀርሳ ኢሻ ኢንዲራሳ። 41 ኢንዲራሳ ኮይሮ ባ ኢሻ ሲሞናኮ ቢዲኔ “የሲ ከቲዳ ከርስቶሳ ኑ ደሚዶስ!” ጊዳስ። 42 ሄሳፌ ጉዬ ኢንዲራሲ ሲሞና ዩሱሳኮ ኤኪ ዩዳስ።

ዩሱሲካ ኢዛ ቲሺ ሂስቲ ያሊዲ “ሃይሶ! ኔ የና ና ሲሞና፤ ሃይሳፌ ጉዬ ኔ ከፋ ጌቲታና።” ከፋ ጉሲ ጳፀርሳ ጉሳ ዋይኮ ዛላ ሹቸ ጉሳ።

**ዩሱሲ ፒሊጶሳኔ ናቲናዔሌ ያይጊዳስ**

43 ዋንቴላ ጋላስ ዩሱሲ ጋሊላ ባናስ ኮይዳስ። ፒሊጶሳካ ደሚዲ “ታና ካላ” ጊዳስ። 44 ፒሊጶሲካ ኢንዲራሳ ማላኔ ጳፀርሳ ማላ ቤቴሳይዳ ካታማ አሳ። 45 ፒሊጶሲ ናቲናዔሌ ደሚዲ “ሙሴይ ዋጋ ማፃፋን ቃሴ ናቤቲካ ቡሮፔ ሃናይሳ የቲዛ ባ ማፃፋታን ኢዛ ጊሽ ፃፊዳ አዳዛ ኑ ደሚዶስ። ኢዚካ የሴፌ ና ናዚሬቲ ዩሱሳኮ!” ጊዳስ።

46 ናቲናዔሌይ ቃስ “ናዚሬቲፔ ሎዎ ሚሺ ቤቲ ኤሪዜ?” ጊ ኦይቸን ፒሊጶሲ ኢዛ “ሃ ያዳ ቤያ” ጊዳስ። 47 ናቲናዔሌይ ዩሱሳ ቤያና ዩሺን ዩሱሲ ቤዩዲ ኢዛ “ሄኮ! ጌኔይ ባይንዳ ቱሙ ኢሰራዔሌ አሳ!” ጊዲ ኢዛ ጊሽ የቲዳስ።

48 ናቲናዔሌይካ ዛሪዲ “ታና ዋስታ ኤራዲ?” ጊ ኦይቸን ዩሱሲካ “ፒሊጶሲ ኔና ያይጋናፔ ካሴ ባላሴ ሚላ ጋርሳን ኔ ዲሺን ታ ኔና ቤያዲስ” ጊ ዛሪዳስ። 49 ናቲናዔሌይ “አስታማሬ! ኔ የሳ ና፤ ኔ ኢሰራዔሌ ካዋ” ጊዳስ።

50 ዩሱሲካ ኢዛስ “ኔ አማኒዳይ፤ ታ ኔና ‘ባላሴ ሚላ ጋርሳን ቤያዲስ’ ጊዳ ጊሺ? ኔ ቡሮ ሄሳፌ አጂዛ ዳሮ ሚሽ ቤያና።  
51 ጉጂዲካ ታ ኢንቴስ ቱሙ ጋይስ፤ ቡሮ ሳሎይ ደዩቲን የሳ

ከታንቻቲ አሳ ና ቦላ ዋዲሺኒኔ ከዚሽን ኢንቴ ቤያና” ገደሰ።  
\*

## 2

ዩሱሲ ሃሌ ዋይኔ ኡሽ ከሲዳሰ

1 ሄቫንላ ጋላሰ ጋላላ ገደን ዲዛ ቃና ጌቲቲዛ ካታማን ሳርጌይ ዳሰ። ዩሱሳ አዩያካ ሄን ዳወሰ። 2 ዩሱሲኔ ኢዛ ካሊዛይቲካ ሳርጌዛሶ ያይጌቲዳ። 3 ሳርጌዛሶን ዋይኔፔ ኣጌቲዳ ኡሻይ ወሪን ዩሱሳ አያ ዩሱሳ “ዋይኔ ኡሻይ ወርደሰ” ገደሰ። 4 ዩሱሲካ ኢዛ “አዩ! ታሰ ኔናራ ኣዚ ዲዜ? ታ ዋይይ ጋኪቤና” ገደሰ።

5 ሄ ዋዳ ዩሱሳ አዩያ ማራማ ሄን ጋዳዛን ዲዛ ኦሳንቻታ “ኢዚ ኢንቴና ገዛይሳ ኦሊቲ” ገደሰ። 6 አይሁዳታሰ ጌሾ ዋጋይ ዲዛ ገሽ ኡሱፑን ሹቻፌ ሜዴቲዳ ባላቲ ሄን ጋዳን ዳቲሰ። ኢሰቲካ ኢሶይ ኢሶይ ናምዑ ኦቶ ዋይኮ ሄቩ ኦቶ ሃሌ ኦይኬቲሰ። 7 ዩሱሲ ኦሳንቻታ “ባላታ ሃሌ ኩንላቲ” ገን ኢሰቲካ ባላታ ዲና ጋካናሰ ሰልቲ ሂሰቲ ኩንላቲ። 8 ሄሳፌ ቃሴካ ኦሳንቻታ “ኣኔ ሃሳ ዲቁዲ ሳርጌዛ ኣላፊዛሰ ኢዛፔ ኢሚቲ” ገደሰ። ኢሰቲካ ዲቁ ዲቁ ኢሚዳ። 9 ኣላፊዚካ ዋይኔ ኡሻን ላሚቲዳ ሃላ ጋንዲ ያሊዲ ኢዚ አዋፔ ዩዳኮኔ ኤሪቤና። ሃላ ዲቁዳይቲ ገዲኮ ኤሪቲሰ። ሄሳ ገሽ ሳርጌዛ ኣላፊይ ሚሺራዛ ያይጌዲ። 10 “ኣሲ ወሪ ሳርጌሶን ኮይሮ ሎዎ ኡሺ ሺሽሰ፤ አሳይ ማላቲዳፔ ጉዬ ኢታ ኤሄሰ፤ ገደ ኣቲን ኔ ገዲኮ ሎዎ ኡሺ ሃኖ ጋካናሰ ዋላጋዳሳ” ገደሰ።

11 ዩሱሲ ሄሳ ማላሊሲዛ ማላታ ኡባፌ ኮይሮ ጋላላ ጌቲቲዛ ዳሬን ቃና ካታማን ኦሊዳሰ። ባ ቦንቾካ ሄሳ ማላን ቆንጨሲዳሰ። ኢዛ ካሊዛይቲካ ኢዛን አማኒዳ። 12 ሄሳፌ ጉዬ ዩሱሲ ባ አዩይራ ባ ኢሻታራኔ ባና ካሊዛይታራ ዲጌ ቂርናሆሜ ዋዲዲ ሄን ጉላ ዋዳ ታኪዳ። \*

ዩሱሲ ያሳ ከላን ዘልዲዛይታ ጎዲዳሰ

(ማቶ 21:12-13፤ ማር 11:15-17፤ ሉቃ 19:45-46)

13 አይሁዳታ ፓዚጋ ባዓሌይ ማቲዳ ገሽ ዩሱሲ ያሩሳላሚ ቢዳሰ። \* 14 ያሳ ከላ ገቤ ገደን ቦራታ፣ ዶርሳታኔ ሃራጴታ ባይዚዛይታ ቃሴካ ሚሹ ላሚዛይቲ ሚሹ ላሚሺን ዳሚዳሰ።

\* 1:51 ሜዴ 28:12 \* 2:12 ማቶ 4:13 \* 2:13 ከሳ 12:1-27

15 ሄሳ በዩዲ ዋዶሮ ፀርቃፊፔ ዶቂ ኤኪዲ አሳኔ ቦራታካ ያሳ ኩላ ገቤፊ ኩሲዳስ፤ ሚሽ ላሚዛይታ ሚሻካ ቆርጪዲ ኢስታ ፃራጴዛታካ ሺሪ ሺሪ ዩጊዳስ።

16 ሃራጴ ባይዚዛ አሳካ “ሃይሳ ወርሲ ጌዴ ዲጊቴ! ታ አዋ ኩላ ዛልዔ ኬሌ ሂሰቶፍቴ” ጊዳስ። 17 ሄ ዋዶ ኢዛ ካሊዛይቲ “ኔ ኩላ ሚሻይ ታና ታማ ማላ ፀጌስ” ጌቴቲ ፃፊቲዳ ቃላ ሃሳዩዳ። \*

18 ሄሳፊ ጉዬ አይሁዳ አሳ ሃላቃቲ ዩሱሳ “ኔ ሃይሳ ወርሳ ኦላናስ ሽኔይ ኔስ ዲዛይሳ ቆንጪሳናስ ኔ ኑና አይ ማላሊሲዛ ማላታ ቤሳኔ?” ጊ አይቺዳ።

19 ዩሱሲካ ኢስታስ “አኔ ሃይሳ ያሳ ኩላ ላሊቴ፤ ታ ኢዛ ሄሹ ጋላሳራ ዛራ ኩፃና” ጊ ዛሪዳስ። \*

20 ኢስቲካ ኢዛ “ሃይሳ ያሳ ኩላ ኩፃናስ ካሴ ኦይዲ ታማኔ ኡሱቱን ላይላ ኤኪዳስ፤ ሂሰቲን ኔኒ ሄሹ ጋላሳራ ኩፃ ኩንላኔ?” ጊ አይቺዳ።

21 ጊዶ አቲን ዩሱሲ “ያሳ ኩላ” ጊዳይ ባ አሳቴላ ጊሻሳ።

22 ሄሳ ጊሽ ዩሱሲ ሃይቂ ዳንዲን ኢዛ ካሊዛይቲ ሄ ዮዶዛ ዩሺ ቆፐዲ ኤሪዳኔ ሃይሳ ካሴ ማፃፋን ፃፊቲዳይሳኔ ዩሱሲ ኢስታስ ካሴቲ ዮቲዳ ቃላ አማኒዳ።

23 ፓዚጋ ባዓሌ ጋላስ ዩሱሲ ዩሩሳላማን ዲሹ ኦሊዳ ማላታታ ቤዩዲ ዳሮ አሳይ ኢዛ አማኒዳስ። 24 ቃሴ ዩሱሲ አሳ ወርሲ ኤሪዛ ጊሽ ኦናካ አማኒቤና። 25 ኢዚ አሳ ዋዝናን ዲዛ ወርሲ ኤሪዛ ጊሽ ኦኒካ ኢዛስ አሳ ጊሽ ዮታናስ ኮሺቤና።

### 3

#### ዩሱሳኔ ኒቆዲሞሳ

1 ፋርሳዌታ ባጋ አስ ጊዲዳ አይሁዳታ ሃላቃታፔ ኢሲ ኒቆዲሞሳ ጌቴቲዛ አሲ ዳስ። 2 ኢዚ ቃማራ ዩሱሳኮ ቢዲ “አስታማሬ! ያሲ ኢዛራ ዲዛዴ ጊዲኮፊ አቲን ሃይታ ኔ ኦሊዛ ማላሊሲዛ ማላታታ ኦላናስ ዳንዳዩዛይይ ዳና። ሄሳ ጊሽ ኔ ያሳ አቻፊ ዩዳ አስታማሬ ጊዲዳይሳ ኑ ኤሮስ” ጊዳስ።

3 ዩሱሲካ ኢዛስ ዛሪዲ “ታ ኔስ ቱሙ ጋይስ፤ አሲ ናሞዓንላ ዩሌቶንታ አጊኮ ያሳ ካዋቴላ ቤያናስ ዳንዳዩና” ጊዳስ። 4 ኒቆዲሞሲካ ዛሪዲ “ሂሰቲን አሲ ጪሚዳፔ ጉዬ ዋኒዲ

\* 2:17 ማዛ 69:9 \* 2:19 ማቶ 26:61፤ 27:40፤ ማር 14:58፤ 15:29

ናምዓንሉ ይሉታና ዳንዳዪዜ? ቃሴካ ጌዴ ባ አዩ ኡሎን ሲሚ ጌሊዲ ይሉታኔ?” ጌዲ ኦይቸዳስ።

5 ዩሱሲካ ኢዛስ “ታ ኔስ ቱሙ ጋይሰ፤ አሲ ሃላፊኔ ዲሎ አያናፔ ይሉቶንታ ዲሼ ያሳ ካዎቱሉ ጌላናስ ዳንዳዪዜ። 6 አሳፔ ይሉቲዳይ አሳ። አያናፔ ይሉቲዳይ አያና። 7 ሄሳ ገሽ ‘ኢንቴ ናምዓንሉ ይሉታናስ ኮሼሰ’ ታ ኔና ጌዳ ገሽ ማላሌቶፋ። 8 ጫርኮይ ባ ኮይዳ ባጋ ጫርኬስ። ኔ ጫርኮስ ገሪስ ሲያሳ አቲን ኢዚ አዋፔ ዩዛኮኔ አዋ ቢዛኮ ኤራካ። አያናፔ ይሉቲዳይካ ሄሳ ማላ” ጌዳስ።

9 ኒቆዲሞስ “ሃይሲ ዋኒ ሃናና ዳንዳዪዜ?” ጌዲ ኦይቸዳስ። 10 ዩሱሲካ ኢዛስ “ኢሰራዔሌ አስታማሪ ጌዳ ኡታዳ ሄሳ ኔ ኤሪኪ? 11 ታ ኔስ ቱሙ ጋይሰ፤ ኑኒ ኑ ኤርዛይሳ ዮቶስ። ኑ ቤዩዳይሳ ማርካቶስ ጌዳ አቲን ኢንቴ ኑ ማርካቱሉ ኤኬኬታ። 12 ታ ኢንቴስ ሃይሳ ሃ ቢታ ዮጋ ዮቶን አማናንታ ኢደኮ ሳሎ ሚሽ ዮቲኮ ዋሰቲ ኢንቴ አማናኔ? 13 ሳሎፔ ዱጌ ዎዲዳ አሳ ናፔ አቲን ፑዴ ሳሎ ኬዚዳይ ሃራይ ኦኒካ ዳና። \*

14 “ባዞ ቢታን ሙሴይ ሾሽ ቶቁ ሂሰቲ ካቁዳይሳሉ ሄሳሉካ አሳ ናይ ቶቶሶን ካቂታናስ ቤሴስ። \* 15 ሄሰካ ኢዛን አማኒዛይይ ዉሪካ ማርና ዴጋ ዴማናሳ። 16 ያሳ ና አማኒዛይ ዉሪ ማርና ዴጋ ዴማናፔ አቲን ቶጎንታ ማላ ያሲ ሃይሳ አላሚዛ ዳር ሲቁዳ ገሽ ባ ማዲ ኢሲ ናዛ ኢሚዳስ። 17 ያሲ ባ ናዛ ሃ ዱጌ አላሚ ከቲዳይ አላሚ አሳይ ኢዛን አማኒዲ አታና ማላሳ አቲን ኢዚ አላሚ አሳ ቦላ ፐርዳናስ ጌዳና።

18 “ኢዛ አማኒዛይ ቦላ ፐርዳና። ኢዛ አማናንታይይ ጌዲኮ ያሳ ና ኢሲኔዛን አማናንታ ገሽ ካሴካ ፐርዳቲ ኡቲዳስ። 19 ፐርዳይካ ሃይሳ ማላ፣ ፖይሃ ሃ አላሚ ዩዳስ ሽን አሳሰ ኦሶይ ኢታ ጌዲዳ ገሽ አሳይ ፖይፔ ዳር ቶማ ዶሲዳስ። 20 ኢታ ኦሲዛይይ ዉሪካ ፖይ ዶሴና። ኢዚ ኦሲዛ ኢታ ኦሶይ ቆንጩ ኬዛንታ ማላ ኢዚ ባ ሁዔስ ፖይ ዲዛሶ ኬዜና። 21 ቱሙ ኦሲዛይይ ጌዲኮ ፖይ ዲዛሶ ዩስ። ኢዚ ፖይ ዲዛሶ ዩዛ ጋሶይ ያሳ አዛዞ ማላ ኢዚ ኦሲዳ ኦሶይ ቆንጫና ማላሳ” ጌዳስ።

**ዩሱሳኔ ፃማቂዛ የሃኒሳ**

22 ሄሳፊ ካሊዲ ዩሱሲ ባና ካሊዛይታራ ዩሁዳ ዴሬ ቢዳስ፤ ሄንካ አሳ ፃማቂሼ ኢሰታራ ጉላ ዎዴ ጋምዒዳስ። 23 ሄ ዎዴ

\* 3:13 ሳሎፔ ዱጌ ዎዲዳስ አሳ ናፔ አቲን ፑዴ ሳሎ ኬዚዳይ ሃራይ ኦኒካ ዳና ኢሲ ኢሲ ጌሻ ማፃፋቲ ሳሎን ዲዛ አሳናፔ አቲን ጌቱስ። \* 3:14 ታይ 21:9

ሳለሜ አቻን ሄኖኔ ጌቴቴዛሶን ዳር ሃሌ ዲዛ ገሽ የሃኒሲ አሳ ፃማቁሽን አሲካ ኢዛኮ ቢዲ ፃማቁቴዳስ። 24 ሄሳ ዎዴ የሃኒሲ ቡር ቃሾ ኩሌ ጌሊቤና። \*

25 ሄ ዎዴ የሃኒሳ ካሊዛይታ ገደኒኔ ኢሲ ኢሲ አይሁዳ አሳታ ገደን አይሁዳታ ጌሾ ዎጋ ገሽ ጌታ ፓላማይ ዴንዲዳስ።

26 የሃኒሳ ካሊዛይቲ ኢዛኮ ሸቂዲ “አሰታማሬ! ኔናራ ዮርዳኖሴ ሻፋ ፐንሳን ኢሲፌ ዲሽን ኔ ኢዛ ገሽ ማርካቶ አዴዚ ሄኮ ፃማቁስ፤ አሲካ ኢዛኮ ቤስ” ገዳ። 27 የሃኒሲካ ኢሰታሰ “አናሰካ ያሳፌ ኢሜቶንታ ዲሽን አይኮይካ ዳና ዳንዳዬና።

28 “ታኒ ኢዛፔ ሲንሳታ ኪቴታዲሰ አቲን ያና ገዳ ኪርሰቶሲ ታና ግዲኬ’ ጋዳ ታ አንቴሰ የቶይሳሰ አንቴ አንቴ ሁዔራ ታ ማርካታ። \* 29 ሳርጌ ዎዴ ኤካና ሚሽራይ ዲዛዴይ ኢዚካ ሚሽራ። ሚሽራ ላጌይ ገዲኮ ሚሽራዛ አቻን ኤቁዲ ሚሽራዚ ገዛዝ ሲዬስ። ሚሽራዛ ፃላ ሲይዲ ኡፋዬቴስ። ሄሳ ገሽ ታ ኡፋይሲ ሃዒ ፖሌቴዳስ። 30 ኢዚ ዶቁ ዶቁ ጋና ማላ ታካ ዘቂ ዘቂ ጋና ኮሼስ።

31 “ፑዴፔ ዩዛዴይ ኡባፌ ቦላ። ጋርሳ ቢታፌ ዩዳዴይ ኢዚ ቢታፌኔ ቢታዚ የቴሰ። ሳሎፔ ዩዛዴይ ኢዚ ኡባፌ ቦላ።

32 ኢዚ ባ ቤዩዳዚኔ ባ ሲዩዳዝ ማርካቴሰ። ገደ አቲን ኢዛ ማርካቴሰ ኤከዛዴይ ዳና። 33 ኢዛ ማርካቴሰ ኤከዛዴይ ገዲኮ ያሳ ቱማንቻ ገዲዳይሳ ቆንጨሴስ። 34 ያሲ ኪቴዳዴይ ያሳ ቃላ የቴሰ። ያሲካ ኢዛዴሰ ባ አያና ማኪ ኢሜና።

35 “አዎይ ባ ና ደሴስ። ሃኒዛ የዎ ወርሲ ኢዛ ኩሼን አሌ ኢሜስ። \* 36 ናዛን አማኒዛዴሰ ሜርና ዴጋይ ዴስ። ናዛን አማኖንታይ ገዲኮ ያሳ ሃንቆይ ኢዛ ቦላ ዳና አቲን ዴጋ ዴሜና” ገዴስ።

### 4

1 ሄ ዎዴ ዬሱሲ የሃኒሳፔ ቦላራ ዳር አሳ ባና ካሊዛዴይ ኢዛዴይሳኔ ፃማቁዛይሳ ፋርሳዌቲ ሲዩዳ። 2 ገደ አቲን ፃማቁዛይቲ ኢዛ ካሊዛይታፔ አቲን ኢዚ ፃማቁቤና። 3 ኢዛ ገሽ ሃሳዬቴዛይሳ ፋርሳዌቲ ሲይዳ ዬሱሲ ኤሪዲ የሁዳ ዴሬ ኢጊዲ ጋሊላ ዴሬ ሲሚ ቢዴስ። 4 ኢዚ ሄ ቢሽን ሳማሪያራ አቂ ባናይሲ ኢዛሰ አቶንታዝ ገዲዴስ።

\* 3:24 ማቶ 14:3፤ ማር 6:17፤ ሉቃ 3:19-20 \* 3:28 የሃ 1:20 \* 3:35 ማቶ 11:27፤ ሉቃ 10:22



5 ሄሳ ጊሽ ሲካሮ ጌቴተዛሶ ሳማሪያ ካታማ ቢዳስ። ሲካሮ ያቆቤይ ባ ና ዮሴፌስ አሚዳ ቢታ አቻን ዳወሰ። \* 6 ሄንካ ያቆቤ ሃላ ኦላይ ዳስ። ዩሱሲ ኦጌ ሃሙተ ዳቡሪዳ ጊሽ ሄ ኦላይ አቻን ኡተዳስ። ዎይይካ ጋላሳፌ ኡሱፑን ሳቴ ማላ።

7 ሄሳ ዎዴ ኢሲ ሳማሪያ ዳሬ ማጫስ ዲዛራ ሃሌ ዲቃናስ ሄ ሃላ ኦላኮ ያዱስ። ዩሱሲካ ኢዞ “ታና ሃሌ ኡሻ” ጊዳስ። \* 8 ሄሲ ሃኒሺን ዩሱሳ ካሊዛይቲ ቁማ ሻማና ካታማ ቢዳ። 9 ሄና ሳማሪያ ማጫሳያ ዩሱሳ “ኔ አይሁዳ አስ ጊዳ ኡታዳ ዎናዳ ታና ሳማሪያ ማጫስ ‘ሃሌ ኡሻ’ ጋ አይቻይ?” ጋዱስ። ኢዛ ሄሳ ጊዳይ አይሁዳ አሳሲኔ ሳማሪያ አሳሰ ጋሳቴሌ ደንታ ጊሻሳ። \*

10 ዩሱሲካ ኢዚሰ “ዎሳ አሞታይኔ ኔና ‘ታና ሃሌ ኡሻ’ ጊዛዳይ ኢዚ አናኮኔ ኔ ኤሪዛኮ ኔ ኢዛ ዎሳናስ ቤሴስ። ኢዚካ ኔስ ዳዎ ሃሌ አማናኮሽን” ጊዳስ። 11 ኢዛካ ኢዛሰ “ሳዶ! ኔስ ሃሌ ዲቁዛ ሚሺ ዳና፤ ሃላ ኦላይካ ዳሮ ጨማ፤ ሂስቲን ኔ ዳዎ ሃሌ አዎፔ ዳማኔ? 12 ኔ ሃይሳ ሃላ ኦላዛ ኩስ አሚዳ ኩ አዎ ያቆቤፔ አዳይ? ኢዚኔ ኢዛ ናይቲ ኢዛ ማሄቲካ ሃይሳ ሃ ኦላፌ ሃሌ ኡዩዳ” ጋዱስ።

13 ዩሱሲ ኢዚሰ “ሃይሳ ሃ ሃላፌ ኡዩዛይ ወሪ ናሞዓንሶ ሳሞቲዲ ዛሪ ሃራ ኡያናሺን። 14 ታ አሚዛ ሃሌ ኡዩዛዳይ ጊዲኮ ሜርናስ ሙሌካ ሳሞቴና። ጋሶይካ ታ አሚዛ ሃሌ ኡዩዛዳስ ሜርና ዳዎስ ፑልቲዛ ፑልቶ ሃሌ ጊዳና” ጊዳስ።

15 ማጫሳያካ “ሳዶ! ሃይሳፌ ጌዬ ታና ሃሌ ሳሞንታ ማላኔ ቃሴካ ታ ሃሌ ዲቃና ሃ ዮንታ ማላ ሄሳ ኔ ጊዛ ሃላ ማላ ሃሌ ታስ አማርኪ?” ጋዱስ። 16 ዩሱሲካ ኢዞ “ሳዳኔ ኔ አዚና ያይጋ ኡካዳ ያ” ጊዳስ። 17 ማጫሳያካ ዛራዳ “ታስ አዚናይ ዳና” ጋዱስ። ኢዚ ሂዘጊን ዩሱሲ “ኔ ታስ አዚናይ ዳና ጌሳይ ቱሙኮ። 18 ጋሶይካ ካሴ ኔስ ኢቻሹ አዚናቲ ዳቴስ። ቃሴ ሃዒ ኔናራ ዲዛይሲ ኔ አዚና ጊዳና። ሄሳ ጊሽ ኔ ቱሙ ጋዳሳ” ጊዳስ።

19 ማጫሳያ ኢዛሰ “ሳዶ! ኔኔ ናሴ ጊዲዳይሳ ታ ሃዒ ኤራዲስ። 20 ካሴ ኩ አዎቲ ሃይሳ ዙማ ቦላ ጎይኒዲ። አንቲ ቃሴ ‘አሳይ ጎይናናስ ቤሲዛሶይ ዩሩሳላሜንኮ!’ ጌታ” ጋዱስ።

21 ዩሱሲካ ኢዚሰ “ሃኔ ማጫሳዬ፣ ዎሳ አዎስ ሃይሳ ዙማ ቦላ ዎይኮ ዩሩሳላሜን አንቲ ጎይናንታ ዎዴይ ያናይሳ አማና፤ 22 አንቲ አንቲ ኤርንታ ዎሳስ ጎይኔታ። ኩ ጊዲኮ አሳሰ አቶቴሌ

\* 4:5 ሜዴ 33:19፤ ኢያ 24:32 \* 4:7 ቲካናስ ጊዛ ቃላ ኢሲ ኢሲ ጋሞ አሳቴ ዲቃናስ ጌቴስ። \* 4:9 ሂዘ 4:1-5፤ ኢያ 4:1-2

አይሁዳፕ ገዲዳ ገሽ ኑኒ ኑ ኤሪዛ ያሳሰ ጎይኖስ። 23 ገደ አቲን ቱሙ ጎይኒዛይቲ ያሳ አዋሰ አያናኒኔ ቱማን ጎይኒዛ ዎይይ ቡር ያና። ሃራይ አቶሺን ሃራካ ዪዳስ። ያሳ አዋይካ ኮዪዛይ ሄሳ ማላ ጎይኒዛይታ። 24 ያሲ ባ ሁዔስ አያና፤ ኢዛ ጎይኒዛይቲ አይናኒኔ ቱማን ጎይናናስ ቤሴሰ” ገደሰ።

25 ማጫሳያካ “ኪርሰቶሲ ያናይሳ ታ ኤራይስ፤ ኢዚ ዪዲ ሃኒዛዝ ዉርሲ ኑስ ዮታና” ገዲሰ። 26 ዬሱሲካ ኢዚሰ “ሃሲ ኔናራ ሃሳዪዛይ ታ ኢዛ” ገደሰ።

27 ሄሲ ሃኒሺን ኢዛ ካሊዛይቲ ባ ቢዳሶፕ ሰሚዳ። ዬሱሲ ማጫሳራ ሃሳዪዛይሳ ማላሌቲዳ። ገደ አቲን “ሃኔ አይ ኮያይ? ዎይኮ ሃኒራ አዛስ ሃሳያይ?” ገዲ ኦኒካ አይቹቤና። 28 ሄሳፌ ጉዬ ማጫሳያ ኦቶዛ ሄን አጋጋዳ ጌዴ ካታማ ባዳ አሳሰ፤ 29 “ታ ኦሊዳዝ ዉርሲ ታስ ዮቲዳዴ ሃ ዪዲ ቤይቲ። ኦኔ ኤሪዛይ ያሲ ቲዪዳ ኪርሰቶሲ ኢዛኮኔ!” ገዲሰ።

30 አሰካ ካታማፕ ኬዚዲ ዬሱሳኮ ቢዳስ። 31 ሄ ዎይ ዬሱሳ ካሊዛይቲ ዬሱሳ “አሰታማሬ! ቁማ ማ” ገዲ ዎሲዳ። 32 ኢዚ ቃስ “ኢንቲ ኤርንታይ ታ ሚዛ ቁማይ ታስ ዳስ” ገደሰ።

33 ሄሳ ገሽ ኢዛ ካሊዛይቲ “አይኮ ሚዛ ካላ አሲ ኢዛስ ኤሄዳኻ?” ገዲ ባ ገደን ሃሳዬቲዳ 34 ዬሱሲካ ኢሰታስ ዛሪዲ “ታ ቁማይ ታና ኪቲዳ ታ አዋ ሽኔ ኦሶኔ ኢዛ ኦሶ ፖሎ። 35 ኢንቲ ቃስ “ካላ ማፃይ ጋካናስ ቡር ኦይዳ አገናይ አቲዳስ” ጌታ ገደኬቲ? ቃስ ታ ገዲኮ ኢንቲና ‘ቡቁ ገዲ ካላይ ማፃ ጋኪዳይሳ ፃለቲ’ ጋይሰ። 36 ማፃዛዳይ ባ ዳዋዛ ኤካና። ማርናስ ገዲዛ አይፌ ሸሻና። ሄሳ ገሽ ዜሪዛዳይኔ ማፃዛዳይ ኢሲፌ ኡፌዬታና። 37 ሄሳ ገሽ ኢሳዳይ ዜራና፤ ሃራ አሲ ማፃና ጌቲቲዛ ለሚሶይ ቱማ። 38 ታ ኢንቲና ኢንቲ ዳቡርንታይሳ ማፃና ማላ ዬዳዲሰ። ሃራቲ ኦሶን ዳቡሪዳ። ገደ አቲን ኢንቲ ኢሰታ ዳቡርሳን ጎዔቲዳታ” ገደሰ።

39 ማጫሳያ “ታ ኦሊዳዚ ዉርሲ ታስ ኢዚ ዮቲዳስ” ጋዳ አሳሰ ማርካቲዳ ማላ ካታማፕ ዳር ሳማሪያ አሳይ ኢዛን አማኒዳስ።

40 ሄሳ ገሽ ሳማሪያ አሳይ ዬሱሳኮ ዪዲኔ ኢዚ ኢሰታኮን ጋምዳና ማላ ዎሲዳ። ኢዚካ ናምዑ ጋላስ ሄን ጋምዒዳስ። 41 ኢዛ ቃላ ሲይዲ ዳር አሳይ ኢዛ አማኒዳስ። 42 ማጫሳያካ “ሃሲ ኑ ኢዛ አማኒዛይ ኔ ዮቲዳ ቃላ ገሽ ፃላ ገደንታ ኑካ ኑ ባጋራ ኢዛፕ ሲዪዳ ገሺኔ ቱማፕ ኢዚ ዳሬ አሽዛዳ ገዲዳይሳ ኤሪዳ ገሻሳ” ገዳ።

ዬሱሲ ሹሜዛ ናዛ ፓሊዳስ

43 ዩሱሲ ሳማሪያን ናምዑ ጋላስ ጋምራዳፔ ጉዬ ጋሊላ ቢደስ። 44 ኢዚ ባ ባጋራ “ናቤይ ባ ዳሬን ቦንቹቴና” ጊ ዮተደስ። \* 45 ጊዶ ኣቲን ኢዚ ጋሊላ ቢን ጋሊላ ኣሳይ ኢዛ ሎዔሴ ሞኪ ኤኪደስ። ጋሶይካ ፓዚጋ ባዓሌ ቦንቻና ዩሩሳላሜ ቢዳሶን ሄን ዲሺን ኢዚ ኦሲዳይሳ ዉርሲ ቤዪዳ ጊሻሳ። \*

46 ሄሳፌ ጉዬ ዩሱሲ ሃሕ ዎይኔ ጫጃ ኦሲዳ ጋሊላ ዳሬ ጊዶን ዲዛ ቃና ጌቴቲዛ ካታማ ናምዓንሉ ቢደስ። ሄ ዎዶ ቁፊርናሆሜን ኢዛስ ናይ ሳኬቲዳ ኢሲ ካዎ ሹሜይ ደስ። \* 47 ኢዚካ ዩሱሲ ዩሁዳ ዳሬፔ ጌዴ ጋሊላ ዩዳይሳ ሲይዲ ዩሱሳኮ ቢደስ። ዩሱሲ ዲጌ ቁፊርናሆሜ ዎቆና ማላኔ ዳሮ ሳኬቲዲ ሃይቃና ጊዛ ናዛ ፓላና ማላ ዩሱሳ ዎሲደስ። 48 ዩሱሲካ ኢዛስ “ኢንቴ ጊታ ማላታታኔ ማላሊሲዛዝ ቤዮንታ ኣይኮካ ኣማኔኬታ” ጊደስ።

49 ሹሜዚካ ዛሪዲ “ጎዶ፥ ታ ናዚ ሃይቆንታ ኤሌላ ዎቆርኪ!” ጊደስ። 50 ዩሱሲካ ኢዛ “ኔኒ ኔሶ ባ! ናዚ ፓዲደስ” ጊደስ። ኣዴዚካ ዩሱሲ ኢዛስ ዮተዳ ቃላ ኣማኒዲ ሶ ሲሚ ቢደስ። 51 ኢዚ ሶ ቢሺን ኢዛ ኣሸካራቲ ኢዛራ ኦጌን ጋጊዲ “ኔ ናዚ ፓዲደስ” ጊዲ ኢዛስ ዮተዳ።

52 ሹሜዚካ ናዚ ኣይ ሳቲን ፓዲዳኮኔ ኢስታ ዛሪ ኦይቹደስ። ኢስቲካ ኢዛስ “ቃማ ጋላሳፌ ላፑን ሳቲን ኢዛ ሚቹዛይሲ ኣጊደስ” ጊዲ። † 53 ናዚ ኣዎይካ ዩሱሲ “ኔ ናዚ ፓዲደስ” ጊዲይ ሄ ኢስቲ ኢዛስ ዮተዛ ዎዶ ጊዲዳይሳ ኤሪደስ። ሄሳ ጊሽ ሄ ጋላሳፌ ኦይኪዲ ኢዚኔ ኢዛ ሶ ኣሳይ ዉሪ ዩሱሳ ኣማኒዳ።

54 ሃይሲ ማላታይ ዩሱሲ ዩሁዳፔ ጋሊላ ዩዲ ኦሲዳ ናምዓንሉ ማላታ።

# 5

## ዩሱሲ ኢሲ ቶሆይ ሲሊዳዴ ፓሕደስ

1 ሄሳፌ ካሊዲ ኣይሁዳታ ባዓሌይ ዲዛ ጊሽ ዩሱሲ ዩሩሳላሜ ቢደስ። 2 ዩሩሳላሜን ደርሲ ጌሊዛ ፔንጌ ኣቻን ኢብራዌታ ቃላራ “ቤቴሳይዳ” ጌቴቲዛ ኢሲ ፑልቶፌ ሸቂዲ ኤሊዳ ሃሕ ደስ። ኢዛፔ ቦላራ ካማይ ዲዛ ኢቻሹ ኦጌቲ ዴቲስ።

---

\* 4:44 ማቶ 13:57፤ ማር 6:4፤ ሉቃ 4:24 \* 4:45 ዮሃ 2:23 \* 4:46 ዮሃ 2:1-11 † 4:52 ቃማ ጊዛ ቃላ ኢሲ ኢሲ ባጋ ጋሞ ቃላን ዚኔ ጌቴስ።

\* 3 ዳር ሃርጋንቻቲ፣ አይፌ ቆቄቲ፣ ቶሆ ዋቤቲኔ ቶሆ ሲላቲ ኦጌ ቦላ ኢቺዲ ሃላይ ቃጭታና ጋካናስ ናጌቲስ። 4 ኢሲ ኢሲ ዋዴ ጎዳ ኪታንቻይ ሃላን ዋጲዲ ሃላ ቃሌስ። ሃላ ቃላፌ ካሊዲ ኮይርቲዲ ሃላን ጌሊዛ ሃርጋንቻይ ባና ሳኪዛ አይ ሃርጌፊካ ፓጭስ። † 5 ሄን ጋዳን ሄቩ ታማኔ ኦሱቸን ላይላ ኩማላ ሳኬቲዳ ኢሳዴይ ዴስ። 6 ዩሱሲ አዴዛ ሄን ኢቺዲይሳ ቤዩዲኔ ኢዚ ዳር ላይላ ሳኬቲዲይሳ ኤሪዲ “ኔ ፓፃና ኮያይ?” ጌዴስ።

7 ሃርጋንቻዚካ ዛሪዲ “ጎዶ! ሃላይ ቃጭቲዛ ዋዴ ታና ሃላን ጌሌሊዛ አሲ ዴና፤ ታ ቡር ባና ጊሺን ሃራይ ታፔ ካሴቲ ሃላን ጌሌስ” ጌዴስ 8 ዩሱሲካ ኢዛ “ዴንዳ! ኔ ኢቺዲ አልጋ ቶካዳ ባ!” ጌዴስ።

9 አዴዚካ ሄራካ ፓጭዴስ። ባ አልጋ ቶኪ ኤኪዲ ቢዴስ። ሄሲ ሃሊዳይ አይሁዳታ ሳምባታ ጋላሳ። 10 ሄሳ ጊሽ አይሁዳታ ሃላቃቲ ፓጭዳ አዴዛ “ሃቾ ሳምባታራ ኔ አልጋ ቶካና ማላ ሙሴ ዋጋይ አዛዜና” ጌዴ። \* 11 ኢዚካ ኢሰታስ “ኔ ኢቺዲ አልጋ ቶካዳ ባ’ ጌ ዮቲዴስ” ጌዴስ። 12 ኢሰቲካ “ኔና አልጋ ቶካዳ ባ ጌዳይ ኦኔ?” ጌ ኦይቺዳ። 13 ዴሬይ ዳሪዳ ጊሺኔ ዩሱሲ ሄፔ ሃኪ ቢዳ ጊሽ ኢዛ ኦኒ ፓሊዳኮኔ አዴዚ ኤሪቤና።

14 ሄሳፌ ጉዬ ዩሱሲ አዴዛ ያሳ ኬላን ዴሚዲ “ሄኮ ሃሊ ኔ ፓፃዳሳ፤ ካሴይሳፌ አጲዛ ኢታ ሚሺ ኔ ቦላ ጋኮንታ ማላ ናምባንላ ናጋራ ኦሶፋ” ጌዴስ

15 አዴዚካ ቢዲኔ ኢዛ ፓሊዳይ ዩሱሳ ጌዲዳይሳ አይሁዳታ ሃላቃታስ ዮቲዴስ። 16 አዴዛ ሳምባታ ጋላስ ፓሊዳ ጊሽ አይሁዳታ ዳናቲ ዩሱሳ ኦይካና ዩዴሊዳ። 17 ዩሱሲካ ኢሰታስ “ታ አዋይ ኡባ ዋዴ ኦሌስ፤ ታካ ኦላና” ጌዴስ፤ 18 ሄሳ ጋሶን አይሁዳታ ዳናቲ ዩሱሳ ዋጲና ማላ ካሴፔ አሊ ዴንሌሊዳ። ቃሴ ኢዚ ሳምባታ ዋሪዳ ጊሽ ያላ ጌደንታ “ፆሲ ታ አዋ” ጌዳ ጊሺኔ ባና ያሳራ ጊኒሲዳ ጊሻሳ።

**ያሳ ና ጎዳቲላ**

19 ዩሱሲ ኢሰታስ “ታ ኢንቴስ ቱሙ ጋይስ፤ አዋይ ኦሊሺን ቤዩዲይሳ ኦሶፔ ኦቲን ናዚ ባ ሺኔን አይኔ ኦሌና። አዋይ ኦሊዛይሳ

---

\* 5:2 ቤተሳይዳ ኢሲ ኢሲ ጌሻ ማፃፋቲ “ቤቲዛታ” ጊሽን ሃራይቲ ቃሴካ “ቤተሳይዳ” ጌቲስ። ቢሪሽላይካ “ማርቲላ ኬላ” ጉሳ። † 5:4 ኢሲ ኢሲ ጌሻ ማፃፋቲ ፓይዶ ሄቫስ ወርሴላ ቦላፔ ቢዲ ኦይዲ ወርሴሊ ጋካናወ ዲዛ ቆፋ ጉጆቲና። \* 5:10 ናሂ 13:19፤ ኤር 17:21

ኢዛ ናይ ሄሳሶካ ኦሎስ። 20 ጋሶይካ አዋይ ናዛ ደሴስ። ባ ኦሎዛይሳካ ወርሲ ኢዛ ቤሴስ፤ ኢንቴ ማላሌታና ማላ ሃይሳፊካ ኦሎዛ ኦሎ ቡር ቤሳና። 21 አዋይ ሃይቁዳይታ ዴንግላይሳሎ ዴጋ ኢሚዛይሳላ ናዚካ ሄሳሶ ባ ኮዪዳዴስ ዴጋ ኢማና። 22 አዋይ ኦና ቦላካ ፐርዴና። ጊዶ ኣቲን ፐርዳ ማታ ወርሲ ባ ናዛስ ኢሚዳስ። 23 ኢዚ ሄሳሶ ኦሎዳይ ኣሳይ ወሪ አዋ ቦንቻና ማላኔ ቃሴካ ናዛካ ቦንቻና ማላሳ። ናዛ ቦንቻንታይ ናዛ ከቲዳ አዋካ ቦንቻና። 24 “ታ ኢንቴስ ቱማ ጋይስ፣ ታ ቃላ ሲዪዛዴስኔ ታና ከቲዳዴን ኣማኒዛዴስ ሜርና ዴጋይ ዴስ። ኢዛዴይ ሃይቆፔ ጌዴ ዴጋን ፕኒዴስ ኣቲን ኢዛ ቦላ ፐርዴቲና። 25 ታ ኢንቴስ ቱማ ጋይስ፣ ካሴ ሃይቁዳ ኣሳቲ ጆሳ ና ቃላ ሲዪዛ ዋዴይ ያና፤ ሄ ዋዴያካ ሃና፤ ሲዪዛይቲ ወሪ ዴጋን ዴኣና። 26 ጋሶይካ አዋይ ባ ባጋራ ዴጋይ ዲዛ ማላ ናዚካ ባ ባጋራ ዴጋይ ዴና ማላ ኦሎዴስ። 27 ኢዚ ኣሳ ና ጊዳዳ ጊሽ ፐርዳና ማላ ጎዳቴላ ኢዛስ ኢሚዳስ። 28 ሃይሳን ኣይኮካ ማላሌቶፍቴ። ጋሶይካ ቡር ካሴ ሃይቁዳ ዲፎን ዲዛይቲ ወሪ ኢዛ ቃላ ጊሪስ ሲዪዛ ዋዴይ ያና። 29 ሎጋ ኦሎዳይቲ ሃይቆፔ ዴንዲዲ ፓፃና። ጊዶ ኣቲን ኢታ ኦሎዳይቲ ሃይቆፔ ዴንዲዲ ፐርዴታና። \*

**ዩሱሳስ ማርካቲዳ ኣሳታ**

30 “ታ ታ ሼኔን ኣይኮካ ኦላናስ ዳንዳዪኬ፤ ጊዶ ኣቲን ታ አዋፔ ታ ሲዪዳ ማላ ፐርዳይስ። ታና ከቲዳይሳ ሼኔ ኦላይስ ኣቲን ታ ሼኔን ታ ኦላንታ ጊሽ ታ ፐርዳን ባላይ ባዋ። 31 ታኒ ታ ጊሽ ታርካ ማርካቲኮ ታ ማርካይ ቱሙ ጊዴና። 32 ጊዶ ኣቲን ታ ጊሽ ማርካቲዛዴይ ሃራይ ዴስ። ኢዚካ ታ ጊሽ ማርካቲዛዴ ማርካቲላይ ቱሙ ጊዲዳይሳ ታ ኤራይስ። 33 ኢንቴ የሃኒሳኮ ኣሴ ከቲዳታ ሽን ኢዚካ ቱሙ ማርካቲዳስ። \* 34 ታ ሃይሳ ጊዛይ ኢንቴ ኣታና ማላ ኣቲን ታስ ሃራ ማርካቲላ ኮሺዳ ጊሽ ጊዴና። 35 የሃኒሲ ኤጋዲ ፖሲሲዛ ፖጋ ማላ። ኢንቴካ ጉላ ዋዴ ኢዛ ፖጋን ኡፋዬታና ኮዪዳታ። 36 ታስ ጊዲኮ የሃኒሳ ማርካቲላፊ ኣጋዛ ማርካይ ዴስ። ታ ማርካይካ ታ አዋይ ታስ ኢሚዳ ኦሎ። ሃሲካ ታ ኦሎዛ ኦሎይ ታ አዋይ ታና ከቲዳይሳ ታስ ማርካቲስ። 37 ታና ከቲዳ ታ አዋይካ ባ ሁዴራ ታስ ማርካቲዳስ። ኢንቴ ጊዲኮ ኢዛ ቃላ ጊሪስ ሙሌካ ሲይቤይኬታ። ኢዛስ ሜጃካ ሙሌራ ቤይቤኬታ። \* 38 ኢዚ ከቲዳዴን ኢንቴ ኣማኖንታ

\* 5:29 ዳኔ 12:2 \* 5:33 የሃ 1:19-27፤ 3:27-30 \* 5:37 ማቶ 3:17፤ ማር 1:11፤ ሉቃ 3:22

ጊሽ ኢዛ ቃላይ አንቱ አቻን ዳና። 39 አንቱስ ጌሻ ማፃፋታፔ ማርና ዳዎ ዳማናስ ሚሳቲን ማፃፋታ ፒሊጌታ፤ ማፃፋቲካ ታ ጊሽ ማርካቲቲስ። 40 ጊዶ ኣቲን አንቱ ዳዎ ዳማናስ ታኮ ሃ ያና ኮዬኬታ።

41 “ታ አሳፔ ቦንቾ ኮዩኬ። 42 ታ አንቱና ኤራይስ፤ ያሳ ሲቆይ አንቱናን ባይንዳይሳካ ኤራይስ። 43 ታኒ ታ አዋ ሱንፋን ያዲስ ሸን አንቱ ታና ሞኪ ኤኪቤኬታ። ሃራ ኣሲ ቃሴ ባ ሱንፋን ዩኮ አንቱ ኢዛ ሞኪ ኤኬታ። 44 አንቱ አንቱ ጊዶን ኢሶይ ኣሳፊ ቦንቾ ኮዩዛይቶ! ኢሲ ያሳፊ ቤቲዛ ቦንቾ ኮዮንታይቶ አንቱ ዋኒዲ ታና ኣማናና ዳንዳዬቲ? 45 ታ አዋ ሱንፋን አንቱና ሞታናይ አንቱስ ታና ሚሳቶፖ። አንቱና ሞታናይ አንቱ ኢዛ ሂዶታ ኦሊዛ ሙሴ፤ 46 ሙሴይ ታ ጊሽ ፃፊዳይሳ ኣማኒዳኮ አንቱ ታና ኣማናና። 47 ኢዚ ፃፊዳይሳ አንቱ ኣማናንታ ኣገኮ ቃሴ ታ ቃላ አንቱ ዋኒ ኣማናኔ?” ጊዳስ።

# 6

ዩሱሲ ኢቻሹ ሺ ኣሳ ሚዚዳስ

(ማቶ 14:13-21፤ ማር 6:30-44፤ ሉቃ 9:10-17)

1 ሃሳፊ ጉዬ ዩሱሲ ዲቡራዶሴ ጌቲቲዛሶ ጋለላ ኣባፊ ሄ ፒንላ ፒኒዳስ። 2 ዩሱሲ ሃርጋንቻታ ፓሊዳ ማላታ ቤዩዳ ጊሽ ዳሮ ኣሳይ ኢዛ ካለዳስ። 3 ዩሱሲ ባና ካለዛይታራ ፑዳ ዙማ ቦላ ኬዚ ኡቲዳስ። 4 ሄ ዎዴ ኣይሁዳታ ፓዚጋ ባዓሌይ ማቲ ኡቲዳስ። 5 ሄ ዎዴ ዳሮ ዳሬይ ኢዛኮ ዩዛይሳ ዩሱሲ ጶቁ ጊ ያሊዲ ፒሊጶሳ “ሃይሳ ዳራስ ጊዳና ቁማ ኣዋፔ ሻማና ዳንዳዩዛኒ?” ጊዳስ። 6 ዩሱሲ ፒሊጶሳ ሃሳሶ ኦይቺዳይ ኢዛ ፓጫናስ ጊዲፔ ኣቲን ኢዚ ባ ኦላናይሳ ኤሬስ።

7 ፒሊጶሲካ ኢዛስ “ኢሲ ኢሳዳስ ኢሲ ባርስ ጊዲዛ ካላ ሻሚዛኮካ ናምዑ ቋቲ ዲናሬን ሻሚዳ ካሊካ ሃይሳስ ጊዳና” ጊዳስ። 8 ዩሱሳ ካለዛይታፔ ኢሶይ ሲሞና ጳፀርሳ ኢሻ አንዲራሲ። 9 “ኢቻሹ ባንጋ ኡኬሊኔ ናምዑ ሞሌ ኦይኪዳ ኢሲ ናይ ሃይሳን ዳስ። ጊዶ ኣቲን ሃና ሃይሳ ሃ ዳሬዛስ ኣይ ጊዳኔ?” ጊዳስ።

10 ዩሱሲካ ዛሪዲ “ኣሳ ኡባ ኡቲሲቲ” ጊዳስ። ሄን ጋዳን ዳሮ ማታይ ዲዛ ጊሽ ኣሳይ ኡቲዳስ። ኣሳ ቆዳይካ ኢቻሹ ሺ ጊዲዛዛ። 11 ሃሳፊ ጉዬ ዩሱሲ ኡኬላ ኤኪዲ ጋላታ ዎሳ ዎሲዲ ኡቲዳ ኣሳስ ጊሺዳስ። ሞሌዛካ ሃሳሶካ ጊሹቺዳስ። ኣሳይ ዉሪካ ባስ ጊዲዛዝ ዳሚዳስ። 12 ኣሳይ ዉሪካ ካሊ ሚን ዩሱሲ ባና

ካሊዛይታ “ማዳን አቲዳ ካላ ኢሲኖካ አሾንታ ሺሺቲ” ገደሰ።  
13 ኢስቲካ አሳይ ሚሺን ኢቻሹ ኡኩላፌ አቲዳ ታማኔ ናምቡ ለማቴ ኩሜላ ሺሺዳ።

14 አሳቲካ ዩሱሲ ኦሲዳ ማላታ ቤዪዲ “ሃይሳዴይ ቱማፔ ሃ አላሜ ያና ናቤዛኮ!” ገደሰ። 15 አሳይ ቃሴ ዋልቃራ ዩሱሳ ካዋላና ቆፒዳይሳ ኤሪዲ ዩሱሲ ቃሴካ ኢስታፌ ሃኪ ቢዲ ዙማ ቦላ ኬዚደሰ።

ዩሱሲ አባ ቦላራ ሃሙቲደሰ  
(ማቶ 14:22-27፤ ማር 6:45-52)

16 ጋዴይ ቃሚሺን ዩሱሳ ካሊዛይቲ ዱጌ አባኮ ዋዲዳ።  
17 ዋጎሎን ጌሊዲ ቁፊርናሆሚ ባና ኬዚዳ። ኢስቲ ኬዚሺን ጋዴይ ዲሚደሰ። ዩሱሲ ሄሳ ጋካናሲካ ኢስታኮ ዪቤና።  
18 ዋልቃማ ጫርኮይ ጫርኪዛ ገሽ አባይ ኬሂ ቃዲደሰ። 19 ኢዛ ካሊዛይቲ ባጋ ሳቲ ኦጌ ማላ ዋጎሎዛ ላጊዳፔ ጉዬ ዩሱሲ አባ ቦላራ ቶሆራ ሃሙቲ ዋጎሎዛኮ ማቴሺን ዴሚዲ ባቢዳ።  
20 ኢዚካ ኢስታሰ “ታናኮ! ባቦፍቲ!” ገደሰ። 21 ኢስቲካ ኢዛ ኡፋይሳራ ጌዴ ዋጎሎዛ ገዶ ኤካና ኮይዳ። ሄራካ ዋጎሎዚካ ኢስቲ ባናሶ ጋኪደሰ።

ዩሱሲ አሳሰ ዴዖ ቁማ

22 አባፌ ሄ ፒንሳን አቲዳ አሳይ ዋንቲላ ጋላሰ አባ ቦላ ኢሲ ዋጎሎይ ዓላ ዲዛር ቤዪደሰ። ዩሱሳ ካሊዛይቲ ካሴ ባርካ ቢዳይሳኔ ዩሱሲ ኢስታራ ዋጎሎን ጌሎንታይሳ ኤሪዳ። 23 ገዶ አቲን ሃንኮ ዋጎሎቲ ዪቢራዶሴፔ ዴንዲዲ ዩሱሲ ጋላታ ዋሳ ዋሰን አሳይ ካላ ሚዳሶ ዪዳ። 24 አሳቲካ ዩሱሲ ዋይኮ ኢዛ ካሊዛይቲ ሄን ባይንዳይሳ ቤዪዲ ሄ ዋጎሎታን ጌሊዲ ዩሱሳ ኮሽ ቁፊርናሆሚ ቢደሰ። 25 አባፌ ሄ ፒንሳን ኢዛ ዴሚዲ “አስታማሬ! ኔ አይዴ ሃይሳ ያዲ?” ገዳ።

26 ዩሱሲካ ኢስታሰ “ታ ኢንቲሰ ቱማ ጋይሰ ኢንቲ ታና ኮዪዛይ ካላ ሚ ካሊዳ ገሽ አቲን ማላታ ቤዪዳ ገሽ ገደና። 27 ዲያና ካላሰ ኦላፍቲ። ገዶ አቲን ሄሳፌ አላዲ ያሳ አዋይ አማንላዚ ማታሚ ኢዛ ቦላ ሾጪዳ ገሽ አሳ ናይ ኢንቲሰ አሚዛ ሜርና ዴዖሰ ገዲዛ ካላሰ ኦላፍቲ” ገደሰ። 28 ኢስቲካ ኢዛ “ሂስቲን ያሳ ኦሶ ኦላናሰ ኦ አይ ኦላና?” ገዳ። 29 ዩሱሲካ “የሳ ኦሶይ ያሰ ከቲዳ ኢዛ ናዛን አማኖ” ገዲ ኢስታሰ ዛሪደሰ።

30 ኢስቲካ ኢዛሰ “ኦ ቤዪዲ ኔና አማናና ማላ ኔ ኦና አይ ማላታ ቦሳኔ? ቃሴካ አይ ኦላኔ? 31 ኢስቲ ማና ማላ ኢስታሰ ቁማ ሳሎፔ አሚደሰ’ ጌቲቲ ዓፊቲዳ ማላ ካሴ ኦ አዋቲ ባዘ

ቢታን ማና ጌቴተዛ ካል ሚዳ” ገዳ። \* 32 ዬሱሲ ኢስታስ “ታ ኢንቴስ ቱሙ ጋይስ፤ ሳሎፔ ዎዲዳ ቁማ ኢንቴስ ኢሚዳይ ሙሴ ገዳና። ቱሙ ቁማ ሳሎፔ ኢንቴስ ኢሚዳይ ታ ኣዎ። 33 ጋሶይካ ያሳ ቁማይ ሳሎፔ ዎዲዳ ኣላሚስ ዴዎ ኢሚዳይሳ” ገዳስ። 34 ሄሳ ጊሽ ኣሳይ “ጎዶ ሄሳ ማላ ቁማ ኑስ ኡባ ዎዴ ኢማርኪ!” ገዳስ።

35 ዬሱሲካ ኢስታስ “ዴዎ ቁማይ ታና፤ ታኮ ዪዛ ኣሲ ሙሉካ ጋፊቴና፤ ታና ኣማኒዛዴይ ኣይዴካ ሳሚቴና። 36 ካሴ ታ ኢንቴስ ገዳ ማላ ኢንቴ ታና ቤይዴታ ሽን ኣማኒቤይኪታ። 37 ታ ኣዎይ ታስ ኢሚዳይ ዉሪካ ታኮ ያና። ታኮ ዪዛዴ ታ ጌዴ ካሪ ጎዲኬ። 38 ጋሶይካ ታ ሳሎፔ ዎዲዳይ ታና ከቴዳይሳ ሽኔ ኦላናስ ኣቴን ታ ሽኔ ኦላናስ ገዳና። 39 ታና ከቴዳይሳ ሽኔይ ታስ ኢሚዳይታፔ ኢሳዴካ ዳይሶንታ ዉርሴላ ጋላስ ታ ዴንላና። 40 ኤ ታ ሽኔይ ናዛ ቤዪዲ ኢዛ ኣማኒዛዴይ ዉሪ ሜርና ዴዎ ዴማናሳ። ታኒካ ዉርሴላ ጋላስ ኢዛ ሃይቆፔ ዴንላና” ገዳስ። 41 ሄሳ ጊሽ ዬሱሲ “ሳሎፔ ዎዲዳ ቁማይ ታና” ገዳ ጊሽ ኣይሁዳቴ ኢዛ ቦላ ዙዙሜቴዳ። 42 “ሃይሲ ዮሴፌ ና ዬሱሳ ገዴኔ? ኢዛ ኣዎኔ ኢዛ ኣዮ ኑ ኤርኮኒ? ሂስቴን ሃሲ ኢዚ ‘ሳሎፔ ዎዲዳ’ ዋኒ ገዜ?” ገዳ።

43 ዬሱሲካ ኢስታስ “ኢንቴ ኢንቴ ገዳን ዙዙሜታ። 44 ታና ከቴዳ ታ ኣዎይ ያይገዳዴፌ ኣቴን ታኮ ያና ዳንዳዪዳይ ኦኒካ ዴና። ባርካ ታኮ ያና ዳንዳዪዳይ ኦኒካ ዴና። ታኮ ዪዛዴካ ዉርሴላ ጋላስ ታ ኢዛ ሃይቆፔ ዴንላና። 45 ናቤታ ማፃፋታን ኣሳይ ዉሪ ያሳፊ ታማሪዳዴ ገዳና ጌቴቴ ፃፊቴዴስ። ሄሳ ጊሽ ኣዎፔ ሲይዲ ታማሪዳ ኣሲ ዉሪ ታኮ ያና። \* 46 ሄሳ ጉሲ ኣዎ ቤዪዳ ኣሲ ዴስ ጉሲ ገዴና። ኣዎ ቤዪዳይ ያሳ ኣቻፊ ዪዳይሳ ፃላ። 47 ታ ኢንቴስ ቱማ ጋይስ፤ ታናን ኣማኒዳ ኣሳስ ሜርና ዴዎይ ዴስ። 48 ታኒ ዴዎ ቁማ። 49 ካሴ ኢንቴ ኣዎቴ ባዙ ቢታን ማና ሚዳ። ገዶ ኣቴን ዉሪካ ሃይቆዳ። 50 ሳሎፔ ዎዲዳ ቁማይ ሃይሳ። ሃይሳ ሚዳይይ ሙሉካ ሃይቆና። 51 ሳሎፔ ዎዲዳ ዴዎ ቁማይ ታና። ሃይሳ ሃ ቁማፔ ሚዳይይ ዉሪካ ሚርናስ ዳና። ኣላሚስ ዴዎ ገዳና ማላ ታ ኢሚዳ ቁማይ ታ ኣሾዛ” ገዳስ።

52 ሄሳ ዎዴ ኣይሁዳቴ “ሃይሲ ኣዴዚ ኑ ኢዛ ኣሾ ማና ማላ ዎስቴ ኢማኔ?” ገዲ ባ ገደን ፓላሚቴዳ። 53 ሄሳ ጊሽ ዬሱሲ ኢስታ “ታ ኢንቴስ ቱሙ ጋይስ፤ ኣሳ ና ኣሾ ኢንቴ ሞንታ

\* 6:31 ኬሳ 16:4፣15፤ ማዛ 78:24 \* 6:45 ኢሳ 54:13



አገሩ፣ ኢዛ ሱሊካ ኡዮንታ አገሩ ኢንቴሰ ዴዖይ ዴና። 54 ታ አሾ ሚዛዴሲኔ ታ ሱሉ ኡዩዛዴሰ ኡባሰ ሜርና ዴዖይ ዴሰ። ታካ ኢዛዴ ወርሴላ ጋላሰ ሃይቆፔ ዴንላና። 55 ጋሶይካ ታ አሾይ ቱሙ ቁማ። ታ ሱላይካ ቱሙ ኡሻ። 56 ታ አሾ ሚዛይኔ ታ ሱሉ ኡዩዛይ ወሪ ታናን ዴና። ታካ ኢዛዴን ዴና። 57 ዴዖ አዋይ ታና ኪቲዳ ማላኔ ታካ ኢዛን ዴዖን ዲዛ ማላ ሃሳሉካ ታ አሾ ሚዛዴይ ወሪ ታናን ዴዖን ዴና። 58 ሃሳ ገሽ ሳሎፔ ዋጲዳ ቁማይ ሃይሳ። ኢዚካ ካሴ ኢንቴ አዋቲ ሚዳይሳ ማላ ገዴና። ጋሶይካ ሄ ቁማ ሚዳይቲ ሃይቁዳ። ሃ ቁማ ሚዛይቲ ገዲኮ ሜርናሰ ዴና” ገዴሰ። 59 ዩሱሲ ሃይሳ ቁፊርናሆሜን ኣይሁዳታ ዋሳ ኬላን ታማርሲዛ ዋዴ ዮቲዴሰ።

**ሜርና ዴዖ ቃላ**

60 ኢዛ ካሊዛይታፔ ዳሪዛይቲ ሃሳ ሲይዲ “ሃይሲ ዮዖዚ ዴዖ፤ ሃይሳ ኦኒ ኤካና ዴንዳዩዜ?” ገዴ። 61 ዩሱሲካ ኢዛ ካሊዛይቲ ሃሳ ዮዖዛ ገሽ ዙዙሜቲዳይሳ ባ ዋዝናን ኤሪዲ “ሃይሲ ኢንቴና ዴዛዜ? 62 ኣሳ ናይ ኪርሰቶሲ ባ ዲዛሶ ሲሚ ኬዚሺን ቤይኮ ኢንቴ ኣይ ጋኔ? 63 ኣሳሰ ዴዖ ኢሚዛይ ያሳ ኣያናኮ! ኣሳ ዋልቃይ ቃሴ ኣይኔ ጎዔና፤ ታ ኢንቴሰ ዮቲዳ ቃላይ ዴዖ ኢሚዛ ኣያና። 64 ገዴ ኣቲን ኢንቴ ገዴን ኢሲ ኢሲ ኣማኖንታ ኣሳቲ ዴቴሰ” ገዴሰ። ዩሱሲ ኢሰታሰ ሃሳ ገዴይ ኮይርፔ ደሚዲ ኢሰታ ገዴን ኣማኖንታይቲ ኦናንታኮኔ ቃሴ ኢዛ ኣሊ ኢማናዴይካ ኦናኮኔ ኤሪዛ ገሻሳ። 65 ካሌሊዲካ ዩሱሲ “ኣዋ ሸኔይ ባይንዳ ታኮ ሃ ያና ዴንዳዩዛዴይ ዴና ጋዶ ታ ኢንቴሰ ዮቲዳይ ሃሳሳ” ገዴሰ።

66 ሃሳፌ ዴንዲዳይሳን ኢዛ ካሊዛይታፔ ዳርቲ ጉዩ ሲሚዳ። ሄ ጋላሳፌ ደሚዲ ዩሱሳ ካሎ ኣገዳ። 67 ሃሳ ገሽ ዩሱሲ ባና ካሊዛ ታማኔ ናሞዓታ “ኢንቴካ ባና ኮዩቲ?” ገዴሰ። 68 ሃሳ ዋዴ ሲሞና ጌቴቲዛ ጳፅርሲ “ጎዶ ኔሰ ሜርና ዴዖይ ቃላይ ዲሺን ኑ ኦናኮ ባኔ? 69 ኔ ጌሻ ያሳ ና ገዲዳይሳ ኤሪዲ ኑኒ ኣማኒደሰ” ገዴሰ። 70 ዩሱሲካ ኢሰታ “ታ ኢንቴና ታማኔ ናሞዓታ ደራቤሲና? ሂሰቲን ኢንቴፌ ኢሶይ ያላዔ” ገዴሰ። 71 ኢዚ ሃሳ ገዴይ ሲሞና ና ኣሰቆርንቶ ዩሁዳ ገሻሳ። ኣይሲ ገኮ ዩሁዳይ ታማኔ ናሞዓታፔ ኢሳ ገዲዳይኮካ ዩሱሳ ኣሊ ኢማናይ ኢዛ ገዲዳ ገሻሳ።

**7**

ዩሱሲ ዳሴ ባዓሌሰ ዩሩሳላሜ ቢዴሰ

1 ሃሳፌ ጉዬ ዬሱሲ ጋሊላ ጊደን ዩዩተደሰ። ጊደ ኣተን ዩሁዳን ዩያናስ ኮይቤና። ጋሶይካ ኣይሁዳተ ኢዛ ዎቆና ኮዩዛ ጊሻሳ። 2 ሄ ዎዶ ኣይሁዳታ ዳሴ ባዓሌይ ማተ ኡተደሰ። 3 ሃሳ ጊሽ ዬሱሳ ኣሻተ ኢዛኮ ሸቋዲ “ኔና ካሊዛይተ ኔ ኦሊዛ ኦሶዛ ቤያና ማላ ኔ ሃይሳፌ ዴንዳዳ ዩሁዳ ዴሬ ባ፤ 4 ጋሶይካ ቆንጨን ኤሬታና ኮዩዛይይ ባ ኦሶ ጊማን ኦሌና። ኔካ ሃይታንታ ዉርሳ ኦላሽ ኔና ኣላሜን ቆንጨሳና ኮሽሰ” ጊዳ። 5 ኢሰተ ሃሳ ጊዳ ጋሶይ ኢዛ ኣሻታካ ጊዲን ኢዛን ኣማኖንታይታ ጊዲዳ ጊሻሳ። 6 ዬሱሲካ ኢሰታሰ “ታ ዎዶይ ቡር ጋኪቤና፤ ኣንቲ ዎዶይ ጊዲኮ ኡባ ዎዶ ኣንቲሰ ጊጋኮ። 7 ዴሬይ ኣንቲና ኣፃና ዳንዳዬና። ታና ጊዲኮ ኢፃሰ፤ ጋሶይካ ታ ኣላሜ ኦሶይ ኢታ ጊዲዳይሳ ኢዛሰ ማርካቲዛ ጊሻሳ። 8 ሃዒ ኣንቲ ጌይ ባዓሌዛሶ ቢቲ። ታሰ ዎዶይ ጋኮንታ ጊሽ ሃይሳ ሃ ባዓሌዛሶ ታ ቢኬ” ጊደሰ። 9 ሃሳ ጊዲ ዬሱሲ ጋሊላን ኣተደሰ።

**ዬሱሲ ዳሴ ባዓሌሶን ቤተደሰ**

10 ጊደ ኣተን ኢዛ ኣሻተ ባዓሌዛሶ ቢዳፕ ጉዬ ዬሱሲ ቆንጨራ ጊደንታ ቆታራ ባዓሌዛሶ ቢደሰ። 11 ኣይሁዳተ “ኢዚ ኣዎን ዲዜ?” ጊሽ ባዓሌዛሶን ኮይዳ። 12 ዴሬይካ ኢዛ ጊሽ ጊደራ ሳሱኪ ሃሳዩተደሰ። ኢሲ ኢሲ ኣሳተ “ኢዚ ሎዎ ኣሳ” ጊሽን ባጋይ ቃሴ “ሎዎ ጊደና። ኢዚ ዴሬ ባሌሌሰ” ጊዳ። 13 ጊደ ኣተን ኣይሁዳታ ዳናታሰ ባቢዛ ጊሽ ኦኒካ ኢዛ ጊሽ ቆንጨን ሃሳይቤና።

14 ባዓሌዚ ዉራና ባጋ ጋኪሽን ዬሱሲ ዎሳ ኬሌ ቢዲ ታማርሶ ኦይኪደሰ። 15 ኣይሁዳተ “ሃይሲ ኣዴዚ ታማርንታ ዲሽ ሃይሳ ዉርሲ ዎሰተ ኤሬዴ?” ጊዲ ማላሌተዳ።

16 ሃሳ ጊሽ ዬሱሲ “ታ ታማርሲዛ ቲሚርቲይ ታና ከቲዳ ታ ኣዎፔ ታሰ ኣሜተደሰ ኣተን ታፔ ጊደና። 17 ታና ከቲዳይሳ ሽኔ ኦላና ኮዩዛይይ ዲኮ ሃይሲ ሃ ቲሚርቲይ ዎሳፌ ቤተዳይሳ ዎይኮ ታ ታፔ ሃሳይዳይሳ ጊዲኮካ ኤራና። 18 ባፔ ሃሳዩዛይይ ባ ቦንቾ ኮዬሰ። ከቲዳዴ ቦንቾ ኮዩዛይይ ጊዲኮ ኢዚ ቱማንቻ። ዎርዶይ ኢዛ ቦላ ዴና። 19 ሙሴይ ኣንቲሰ ዎጋ ኣሚደሰ ጊዴኔ? ጊዲኮካ ኣንቲ ጊደን ዎጋ ናጊ ፖሊዳይይ ኦኒካ ዴና። ኣንቲ ኣዛሰ ታና ዎቆና ኮዩቲ?” ጊደሰ።

20 ዴሬይካ ኢዛ “ኔ ቦላ ዳይዳንሊ ዴሰ! ኔና ዎቆና ኮዩዛይ ኦኔ?” ጊደሰ። \*

\* 7:20 ዳይዳንሊ ጉሲ ዓላዒ ኦሳንቻታ ጉሳ።

21 ዩሱፊካ ኢስታስ “ታ ኢሲ ኦሶ ኦላዲስ፤ ኢንቴ ወሪካ ሃኖ ሃ ኦሶይን ማላሌቲታ። 22 ሙሴይ ኢንቴስ ቃፃራ ዋጋ ኢሚዴስ፤ ሄ ዋጋይካ ኢሜቲዳይ ካሴ ኦዋታፔ ቤቲዴስ ኦቲን ሙሴፔ ጊዴና። ሂስቲን ሄኮ ኢንቴካ ሳምባታ ጋላሲካ ኦስ ቃፃራታ። \* 23 ሂስቲኮ ሙሴ ዋጋይ ሻሬቶንታ ማላ ኦሲ ሳምባታ ጋላስ ቃፃራቲዛዝ ጊዲኮ ሂስቲን ታ ሳምባታ ጋላስ ኦሳስ ኩሜላ ኦሳቴሐ ፓሌን ኦዛስ ታ ቦላ ሃንቄቲቲ? \* 24 ሱሬ ፐርዳ ፐርዲቲ ኦቲን ኦሳ ኦይፌሶ ያሊዲ ማዶ ፐርዳ ፐርዶፍቲ” ጊ ዛሪዴስ።

**ከርሰቶሳ ጊሽ ዴንዲዳ ፓላማ**

25 ዩሩሳላሜ ኦሳፔ ኢሲ ኢሲ ኦሳቲ “ኢስቲ ዋቆና ኮዩዛ ኦዴዚ ሃይሳ ጊዴኔ? 26 ሄኮ ኢዚ ቆንጨን ሃሳዬስ ሺን ኢስቲ ኢዛ ኦይኮካ ጊቤቴና። ሃይስ ያሲ ከቲዳዴ ጊዲዳይሳ ዳናቲ ቱሙ ኤሪዛሻ? 27 ሂስቲን ሃይሲ ኦዴዚ ኦዋ ኦሳኮኔ ኦ ኤርስ። ያሲ ከቲዳዴይ ዩሺን ቃሴ ኢዚ ኦዋፔኮኔ ኤሪዛዴይ ኦኒካ ዴና” ጊዴ። 28 ሄሳ ጊሽ ዩሱሲ ያሳ ኬላን ታማርሲሼ ባ ቃላ ቶቁ ሂስቲዲ “ኢንቴ ታና ቱሙ ኤሬታ። ታ ኦዋፔ ዩዳኮኔ ኢንቴ ኤሬታ። ቃሴ ታኒ ታ ሺኔን ያቤኬ። ታና ከቲዳይሲ ኢዚ ቱማንቻ። ጊዶ ኦቲን ኢንቴ ቃሴ ኢዛ ኤሬኬታ። 29 ታ ጊዲኮ ኢዛ ኦቻፌ ዩዳ ጊሺኔ ኢዚ ታና ከቲዳ ጊሽ ታ ኢዛ ኤራይስ” ጊዴስ። 30 ሄሳ ዋዴ ኢዛ ኦይካናስ ኮይዳ፤ ጊዶ ኦቲን ቡር ዋዴይ ጋኪቤና ጊሽ ኦኒካ ኦይኪቤና። 31 ጊዲኮካ ዴሬዛፔ ዳርይ ኢዛን ኦማኒዴስ። ኦሳይ “ያሲ ከቲዳዴይ ዩዛ ዋዴ ሃይሲ ኦዴዚ ኦሶ ማላታፔ ቦላራ ሃራ ኦላኔ?” ጊዴስ።

**ዩሱሳ ኦይካና ዋታዳራቲ ከቲቲዳ**

32 ኦሳይ ዩሱሳ ጊሽ ጋርሳራ ሳሱኬቲ ሃሳዬቲሺን ፋርሳዌቲ ሲዩዳ። ሄሳ ጊሽ ቄሴታ ሃላቃቲኔ ፋርሳዌቲ ዩሱሳ ኦይካናስ ያሳ ኬላ ፔንጌ ናጊዛይታ ዩዲዳ። 33 ሄ ዋዴ ዩሱሲ “ታ ኢንቴናራ ጉላ ዋዴ ዳሻና፤ ሄሳፌ ጉዬ ታና ከቲዳይሳኮ ታ ሲማ ባና። 34 ኢንቴ ታና ኮያና ሺን ዴማኬታ። ኢንቴ ታ ዲዛሶ ያናስ ዳንዳዬኬታ” ጊዴስ።

35 ሄሳ ጊሽ ኦይሁዳታ ዳናቲ ባ ጊዶን ኢሶይ ኢሳራ “ሃይሲ ኦዴዚ ኦ ዴምንታ ማላ ኦዋ ባኔሻ? ኦኔ ኤሪዛይ ጊሪኬታ ጊዶ ላሌቲ ዲዛ ኦይሁዳታኮ ቢዲ ጊሪኬታ ታማርሳኔሻ?

\* 7:22 ለቄ 12:3፤ ሜዴ 17:10 \* 7:23 የሃ 5:9

36 ኢዚ ‘አንቲ ታና ኮያና ሺን ዳሜኬታ፤ ታ ዲዛሶ አንቲ ያናሰ ዳንዳዬኬታ’ ገሺን ሄሲ ኣይ ጉሴ?” ጊዳ።

**ዴፖ ሃሉ**

37 ጊታ ባዓሌዛ ወርሴላ ጋላስ ዬሱሲ ዴንዲ ኤቁዲኔ ባ ቃላ ቶቁ ሂሰቲዲ “ሃሉ ሳሜቲዳዴይ ዲኮ ሃ ታኮ ዪዲ ኡዮ።

\* 38 ገሻ ማፃፋይ ጊዳ ማላ ታና ኣማኒዛዴፌ ዴፖ ሃላ ፑልቶይ ፑልታና” ጊዳስ። \* 39 ኢዚ ሄሳ ጊዳይ ኢዛን ኣማኒዛይቲ ቡርፔ ኢካና ዲሎ ኣያና ገሻሳ። ጋሶይካ ዬሱሲ ቦንቼቲዛ ዎዴይ ቡር ጋኮንታ ገሽ ዲሎ ኣያናይ ኣሜቲቤና።

**ዴሬዛ ጊደን ሻኬቲሉ ሜዲቲዴሰ**

40 ሄሳ ገሽ ዴሬዛፔ ኢሲ ኢሲ ኣሳቲ ሄ ቃላ ሲይዲ “ያና ገዛ ናቤይ ቱማፔ ሃይሳ” ጊዳ። 41 ሃራቲ “ሃይሰ ያሲ ከቲዳዴ” ጊዳ። ባጋይቲ ቃሴ “ያሲ ከቲዳዴይ ጋለላፔ ዋኒ ያኔ? 42 ያሲ ከቲዳዴይ ዳወቲ ዜሬላፌ ዬሌታናይሳኔ ዳወቲ ካታማ ቤቴሌማፔ ያናይሲ ካሴ ገሻ ማፃፋን ፃፊቲቤኔ?” ጊዳ።

\* 43 ሄሳ ገሽ ኢዛ ጋሶን ዴሬይ ባ ጊደን ሻኬቲ ዎዲዴሰ። 44 ኢሰታፌ ኢሲ ኢሲ ኣሳቲ ኢዛ ኦይካና ኮይዳ። ጊደ ኣቲን ኦኒካ ኢዛ ኦይኪቤና።

**ኣይሁዳታ ዳናቲ ኣማኒቤቲና**

45 ሄሳፌ ጉዬ ያሳ ኬሉ ናጊዛይቲ ቁሴታ ሃላቃታኮኔ ፋርሳዌታኮ ሲሚዲ ቢዳ። ኢሰቲካ “ኣዛሰ ኢዛ ኤኮንታ ዪዳቲ?” ጊዳ። 46 ዎታዳራቲካ ዛሪዲ “ሃ ኣዴዚ ሃሳዪዛይሳ ማላ ኣይ ኣሲካ ሃሳዪ ኤሬና” ጊዳ።

47 ፋርሳዌቲ ኢሰታ “አንቲካ ባሌቲዴቲ? 48 ዳናታፔ ዎይኮ ፋርሳዌታፔ ኢዛ ኣማኒዳይቲ ዲዛሻ? 49 ሃይሲ ሙሴ ዎጋ ኤርንታ ዴሬይ ቱማፔ ቃንጌቲዳይሳ” ጊዳ።

50 ሃይሳፌ ካሴ ዬሱሳኮ ቢዳ ፋርሳዌታፔ ኢሳ ጊዲዳ ኒቆዲሞሲ ኢሰታሰ \* 51 “ኑ ዎጋን ኢሲ ሞቲቲዛዴይ ባ ሞቶሰ ዛር ኣሚን ሲዮንታኔ ኢዚ ኣይ ኦሉዳኮኔ ኤሬቶንታ ዲሺን ፐርዳይ ፐርዴቲ ኤሪዜ?” ጊዳስ።

\* 7:37 ሊዌ 23:36 \* 7:38 ሂዚ 47:1፤ ዛካ 14:8 \* 7:42 2ሳሜ 7:12፤ ሚክ 5:2 \* 7:50 የሃ 3:1-2

52 ኢስቲካ “ኔካ ጋሊላ ኣሴ? ጋሊላፔ ናቤይ ዴንደንታይሳ ፒልጋዳ ጋካ ኤራ” ጊዳ። 53 ሃሳፌ ጉዬ ኢሶይ ኢሶይ ባሶ ቢዳሰ። †

# 8

## ላይማን ኦይኬቲዳ ማጫሳዮ

1 ሃሳፌ ጉዬ ዬሱሲ ዳብራዛይቲ ቢዳሰ። 2 ዋንቴላ ጋላሰ ማላዶ ዋንታራ ያሳ ኬፍ ሰሚ ዩዳሰ። ዳሬይካ ወሪ ኢዛኮ ዩን ኢዚ ኡቲዲ ኢሰታ ታማርሶ ኦይኪዳሰ። 3 ሙሴ ዋጋ ታማርሲዛይቲኔ ፋርሳዌቲ ኢሲ ላይማታሼ ኦይኬቲዳ ማጫሰ ዲዛር ኤኪ ዩዲ ዳሬ ሲንሳን ኤሲዳ። 4 ዬሱሳካ “ኢሰታማሬ! ሄኮ ሃና ማጫሳያ ላይማታሼ ኦይኬታዲሰ። 5 ሃኒ ማላ ማጫሲ ሹቻን ጫዳታ ሃይቃና ማላ ሙሴይ ኑ ዋጋን ኑና ኣዛዚዳሰ፤ ኔኒቕ ሃኒ ጊሽ ኣይ ጋይ?” ጊዳ። \* 6 ኢስቲ ኢዛ ሃሳ ጊዳይ ኢዛ ቦላ ዋቶሰ ጊዲዛ ጋሶ ዳማናሲኔ ኢዛ ፓጫና ኮይዳ ጊሻሳ። ጊዶ ኣቲን ዬሱሲ ሆክዲ ቢታ ቦላ ባ ቢራዴራ ፃፎ ኦይኪዳሰ።

7 ኢስቲ ኢዛ ዛሪ ዛሪ ኦይቲን ቶቁ ጊዲ “ኢንቴ ጊዶፌ ናጋሪይ ባይንዳ ኣሲ ኮይር ሹቲ ኢዚ ቦላ ኦሎ” ጊዳሰ። 8 ሃሳፌ ቃሴካ ሆኪዲ ቢታ ቦላ ፃፊዳሰ። 9-10 ኢስቲካ ሃሳ ሲይዲ ጨማታፔ ኦይኪዲ ወሪካ ኢሶይ ኢሶይ ቢዳሰ። ሃሳ ጊሽ ዬሱሲ ሄን ኤቁዳ ማጫሳይሪ ፃላ ኣቲዳሰ። “ዋቲዛይቲ ኣዋን ዲዛ? ኔ ቦላ ፒርዲዳይ ኦኒካ ዳኔ?” ጊዳሰ።

11 ኢዛካ “ኅዶ ኦኒካ ባዋ” ጋዲሰ። ዬሱሲካ “ታካ ኔ ቦላ ፒርዲኬ፤ ባ! ናምዓንሶ ናጋራ ኦላፋ” ጊዳሰ። \*

## ዬሱሲ ኣላሜሰ ፖዖ

12 ቃሴ ዬሱሲ “ታኒ ኣላሜሰ ፖዖ። ታና ካሊዛይይ ወሪ ዴዖ ፖዖ ዳማና። ቋማን ሲሜሪቴና” ጊዲ ኢሰታሰ ዮቲዳሰ። \*

---

† 7:53 ሃሳፌ ጉዬ ኢሶይ ኢሶይ ባሶ ቢዳሰ ገዛ ቃላይ ኢሲ ኢሲ ገሻ ማፃፋታን ፃፊቲቤና። \* 8:5 ለዌ 20:10፤ ዛሬ 22:22-24 \* 8:11 ዳር ማፃፋቲኔ ካሴ ቤኒ ዋዴ ገሻ ማፃፋታ ቢርሼላቲ ሸምፖ 7:53፣ ሸምፖ 8:11 ጋካናዉ ዲዛ ቆፋቲ ጉጃቲቤቴና። ኢሶቲ ኢሶቲ የሃኒሳ ሚሺራቾ ማፃፋን ሸምፖ 21:34ፔ ጉዬራ ጌልሴቲሰ። ሃራቲ ቃሴ ሉቃሳ ሚሺራቾ ሸምፖ 21:38ፔ ጉዬራ ጌልሴቲሰ። ኢሲ ኢሲ ገሻ ማፃፋቲ ቃሴካ የሃኒሳ 7:36ፔ ጉዬራ ጌልሴቲሰ። \* 8:12 ማቶ 5:14፤ የሃ 9:5

13 ፋርሳዌቲ “ኔኒ ኔ ጊሽ ማርካታሳ፤ ኔ ማርካይ ቱሙ ጊዴና” ጊዴ። \*

14 ዬሱሲካ ኢሰታሰ “ታኒ ታ ጊሽ እይ ማርካቲኮካ ታ አዋፔ ዪዳኮኔ ቃሴ ታ አዋ ባናኮኔ ታ ኤሪዛ ጊሽ ታ ማርካቲላ ቱማ። እንቲ ጊዲኮ ታ አዋፔ ዪዳኮኔ ቃሴ አዋ ባናኮኔ ኤሪኬታ።

15 እንቲ አሾ ቆፋ ማላ ፐርዳታ። ታ ጊዲኮ እና ቦላካ ፐርዲኬ።

16 ታ ፐርዲኮካ ታ ፐርዲይ ቱሙ ፐርዳ። ጋሶይካ ታ ታርካ ፐርዲኬ፤ ታና ከቲዳ ታ አዋይካ ታናራ ዴሰ። 17 ናምዑ አሳታ ማርካይ ቱሙ ጊዲዳይሲ እንቲ ዋጋን ፃፊቲዴሰ። 18 ሄሳ ጊሽ ታኒ ታ ጊሽ ማርካታይሰ፤ ታና ከቲዳ ታ አዋይካ ታሰ ማርካቲሰ” ጊ ዛሪዴሰ። 19 ኢሰቲካ “ኔ አዋይ አዋን ዲዜ?” ጊዲ ኢዛ ኦይቹዳ። ዬሱሲካ ኢሰታሰ “ታና ጊዲን ታ አዋካ ጊዲን እንቲ ኤሪኬታ፤ እንቲ ታና ኤሪዛኮ ታ አዋካ ኤሪናኮሺን” ጊዲ ኢሰታሰ ዛሪዴሰ።

20 ዬሱሲ ሄሳ ኢሰታሰ የቲዳይ ፆሳ ከላ ጊቤን ሚሼ ዋሊዛ ሳፃኔ አቻን ታማርሲሼ የቲዴሰ ሺን ኢዛሰ ኦይኬቲዛ ዋይይ ጋኮንታ ጊሽ ኦኒካ ኢዛ ኦይኪቤና። 21 ዬሱሲ ቃሴካ “ታ ባና ሺን እንቲ ታና ኮያና ኢንቲ ኢንቲ ናጋራራ ሃይቃና ኦቲን ታ ቢዛሶ ባና ዳንዳዬኬታ” ጊዴሰ።

22 እይሁዳቲካ ባ ጊዴን ኢሶይ ኢሳራ ኢዚ “ታ ቢዛሶ እንቲ ባና ዳንዳዬኬታ ጊዛይ ባርካ ባና ዋፋናሴሻ?” ጌቲቲዳ።

23 ኢዚ ቃሴ ኢሰታ “እንቲ ጋርሳ አሳ፤ ታኒ ቦላ አሳ፤ እንቲ ሃይሳ አላሜ አሳ፤ ታኒ ሃ አላሜፔ ጊዲኬ። 24 እንቲ ታ ኦናኮኔ ኤሪዲ አማናጎታ አጊኮ እንቲ እንቲ ናጋራራ ሃይቃና ጊሽ ታ እንቲ እንቲ ናጋራራ ሃይቃና ጊዳይ ሄሳ ጊሻሳ” ጊዴሰ።

25 ኢሰቲካ ኢዛ “ኔ ኦኔ?” ጊዳ። ዬሱሲካ ኢሰታሰ “ሃሲ ጋካናሰ ታ እንቲሰ ኢዛ ጊሽ የቲዛዴይ ታና። 26 ታ እንቲ ቦላ ሃሳያናይሴ፤ ፐርዳዛ የፆይ ዳርይ ዴሰ። ጊዳ ኦቲን ታና ከቲዳዴይ አማኔቲዳዴ፤ ታካ ኢዛፔ ሲዪዳይሳ ሃ አላሜዛሰ የታይሰ” ጊዴሰ።

27 ኢዚ ኢሰታሰ አዋ ጊሽ የቲዛይሳ ኦኬኪቤቲና። 28 ሄሳ ጊሽ ዬሱሲ “እንቲ አሳ ና ቶቁ ሂሰቲዲ ካቂዳ ዋይ ታኒ ኢዛ ጊዳዴይ ታና ጊዲዳይሳ እንቲ ኤራና። አዋይ ታና ታማርሲዳይሳ የታዲሰ ኦቲን ታኒ ታ ሼኔ ማላ ኦይኮካ ኦፊንታይሳ እንቲ ኦኬካና። 29 ታና ከቲዳይሲ ኢዚ ታናራ ዴሰ። ኦይ ዋይካ ታ ኡፋይሲዛዝ ኦሊዛ

\* 8:13 የሃ 5:31

ገሽ ኢዚ ታና ፃላላ ዩጊ ኣጊቤና” ገዴሰ። 30 ኢዚ ሄሳ የቲዳ ማላ ዳር ኣሳይ ኢዛን ኣማኒዴሰ።

**ፖፆ ናይታ**

31 ዩሱሲ ባና ኣማኒዳ ኣይሁዳታ “ኢንቴ ቱሙ ታ ቃላን ዲኮ ኢንቴ ቱማፔ ታና ካሊዛይታ ገዳና። 32 ቱማይ ኣዛኮኔ ኢንቴ ኤራናኔ ቱማይካ ኢንቴና ዋዛና” ገዴሰ።

33 ኢሰቲካ ኢዛሰ ዛሪዲ “ኑኒ ኣብራሃሜ ናይታኮ! ኑ ኣናሰካ ኣይሌቲ ኤርኮ። ሂሰቲን ኔ ኑና ዋናዳ ኢንቴ ዋዜታና ጋይ?” ገዳ። \*

34 ዩሱሲካ ኢሰታሰ “ታ ኢንቴሰ ቱሙ ጋይሰ፤ ናጋራ ኦሲዛይይ ዉሪ ናጋራሰ ኣይሌ፤ 35 ኣይ ዋዴካ ኣይሌይ ሶን ሎፃ ዴዔና። ዩሎይ ገዲኮ ኣይዴካ ሶን ዴሰ። 36 ሂሰቲኮ ናዚ ኢንቴና ዋዚኮ ኢንቴ ዋዜቲዳይታ ገዳና። 37 ኢንቴ ኣብራሃሜ ናይታ ገዲዳይሳ ታ ኤራይሰ። ገዳ ኣቲን ታ ቃላ ኢንቴ ኤር ጊ ኤኮንታ ገሽ ታና ዋዳናሰ ኮዬታ። 38 ታኒ ታ ኣዋ ኣቻን ቤዩዳይሳ ኢንቴሰ የታይሰ። ኢንቴ ቃሴ ኢንቴ ኣዋፔ ሲዩዳይሳ ኦሴታ” ገዴሰ።

39 ኢሰቲካ ኢዛሰ “ኑ ኣዋይ ኣብራሃሜ” ገዲ ዛሪ የቲን፤ ዩሱሲ ኢሰታሰ “ኢንቴ ኣብራሃሜ ና ገዲዳኮ ኣብራሃሜሶ ኦላና። 40 ኢንቴ ገዲኮ ታ ያሳፌ ሲዩዳ ቱማ ኢንቴሰ የቲን ታና ዋዳናሰ ጊዳ ዴንዲዴታ። ገዳ ኣቲን ኣብራሃሜይ ሄሳሶ ኦሲቤና። 41 ኢንቴ ኢንቴ ኣዋሶ ኦሴታ” ገዴሰ። ኢሰቲካ ዛሪዲ “ኑ ላይማን ዩሌቲዳ ና ገዳኮ። ኑ ኣዋይ ኢሲ ያሳ ፃላላ” ገዲ ኢዛሰ ዛሪዳ።

**ፃላዔ ናይታ**

42 ዩሱሲ ኢሰታሰ “ኢንቴ ኣዋይ ያሳ ገዲዳኮ ታካ ያሳፌ ኬዛ ዩዳ ገሽ ኢንቴ ታና ደሳናኮሺን፤ ታና ኢዚ ከቲዴሰ ኣቲን ታ ታርካ ታ ሸኔን ያቤኬ። 43 ታ የቲዛይሳ ኣይሰ ዩሺ ቆፐኬቲ? ጋሶይካ ኢንቴ ታ ቃላ ሲያና ኮዮንታ ገሻሳ። 44 ኢንቴ ኢንቴ ኣዋ ፃላዔ ናይታ፤ ኢንቴ ኣዋ ፖላና ኮዬታ፤ ኢዚ ካሰካ ሸምፖ ዋዲዳዴ። ኢዛ ኣቻን ቱማይ ደንታ ገሽ ኢዚ ቱማን ኤቂቤና። ኢዚ ባ ሁዔሰ ዋርዳንቻኔ ዋርዳ ኣዋ ገዲዳ ገሽ ኢዚ ዋርዳ ሃሳያ ባፔ ሜዲ ኤኪዲ ሃሳዬሰ። 45 ታ ቃሴ ቱሙ ሃሳዩዛ ገሽ ኢንቴ ታና ኣማኔኬታ። 46 ኢንቴ ገዴፌ ታና ኔ ሃና ናጋራ ኦላዳሳ ገዲ ማርካራ ላላናሰ ሞታና ደንዳዩዛይይ ዲዜ? ታ ቱሙ ሃሳዩዛዴ ገዲኮ ሂሰቲን ኣዛሰ ታና ኣማኔኬቲ? 47 ያሳፌ

\* 8:33 ማቶ 3:9፤ ሉቃ 3:8

ገዲዳ አሲ ያሲ ገዛ ሲዬሰ። አንቴ ገዲኮ ያሳፌ ገደንታ ገሽ ያሳ ቃላ ሲዬኬታ” ገዴሰ።

**ዬሱሲ ባ ገሽ ሃሳዪደሰ**

48 አይሁዳቲካ ዛሪዲ “ኑ ኔና ኔ ‘ሳማሪያ አሳ፤ ኔ ቦላ ዳይዳንሌ ዴሰ’ ገዳይሰ ቱሙ ዴኔ?” ገዴ።

49 ዬሱሲ ኢሰታሰ “ታኒ ታ አዋ ቦንቻይሰ አቲን ዳይዳንሌ ታ ቦላ ባዋ። አንቴ ገዲኮ ታና ካወሼታ። 50 ታኒ ታሰ ቦንቻ ኮይኬ። ታ ቦንቹታና ማላ ኮዪዛዳይ ቃሴ ዴሰ። ኢዚካ ፒርዳ ፒርዳናዴ። 51 ታ አንቴሰ ቱሙ ጋይሰ፤ ኦኒካ ታ ቃላ ናጊኮ ሃይቆ ሙሉካ ሃይቆና” ገ ዛሪዴሰ።

52 አይሁዳቲ ኢዛ “ኔ ቦላ ዳይዳንሌ ዲዛይሳ ሃዒ ኦኒ ኤሪዶሰ። አብራሃሜይ ሃይቁዴሰ፤ ናቤቲካ ኢዛላ ሃይቁዳ። ኔ ቃሴ ‘ኦኒካ ሙሉ ሃይቆ ቤዬና’ ጋ ዮታሳ። 53 ኔ ኑ አዋ አብራሃሜፔ አጳይ? ኢዚ ሃይቁዴሰ፤ ናቤቲካ ሃይቁዳ ሂሰቲን ኔ ኔና ኦና ጋና ኮያዲ?” ገዴ። 54 ዬሱሲካ ኢሰታሰ “ታ ታርካ ታና ቦንቹኮ ታ ቦንቹይ ሃዳ። ታና ቦንቹዛዳይ ገዲኮ አንቴ ‘ኢዚ ኑ ያሳ’ ገዛይ ታ አዋ። 55 አንቴ ኢዛ ኤሮንታ አጊኮካ ታ ቃሴ ኤራይሰ። ታ ኢዛ ኤሪኬ ጊኮ፣ ታካ አንቴ ማላ ዋርዳንቻ ገዳይሰ። ታ ቃሴ ኢዛ ኤራይሰ፣ ኢዛ ቃላካ ናጋይሰ። 56 አንቴ አዋ አብራሃሜይ ታ ጋላሰ ቤያናሰ አዋቲዲ ቤይዴሲኔ ኡፋዬቲዴሰ” ገዴሰ።

57 አይሁዳቲ ቃሴ “ኔሰ ቡር ኢቻሹ ታሙ ላይላ ኩሞንታ ኔኒ አብራሃሜ ቤያዲ?” ገዴ። 58 ዬሱሲካ “ታ አንቴሰ ቱሙ ጋይሰ፤ አብራሃሜይ ዬሌታናፔ ካሴካ ታኒ ዳይሰ” ገዴሰ።

59 አይሁዳቲ ሂራካ ኢዛ ጫዳናሰ ዉሪ ሹኛ ዴንሌዳ። ገዴ አቲን ዬሱሲ ኢሰታ ማታፔ ቆቲቲዲ ያሳ ኬላፌ ኬዚ ቢዴሰ።

**9**

**ዬሱሲ ቆቁ ገዲ ዬሌቲዳይሳ አይፌ ፓሌዴሰ**

1 ዬሱሲ ኦጌራ አጲ ቢሼ ባ አዬይ ኡሎፔ ዬሌቶሳፌ አይፌ ቆቁዳዴ ቤዪዴሰ። 2 ኢዛ ካሊዛይቲ ኢዛ “አሰታማሪ! ሃይሲ አዴዚ ቆቁ ገዲ ዬሌታና ማላ ናጋራ ኦሌዳይ ኦኔ? ኢዛ ዬሌዳይቲ ኦሌዳይ? ኢዚ ኦሌዳይ?” ገዲ ዬሱሳ ኦይቹዳ። 3 ዬሱሲካ ኢሰታሰ “ኢዛ ገዲንካ ኢዛ ዬሌዳይቲካ ናጋራ ኦሌቤቲና። ኢዚ ሂሳላ ሃኒዳይ ያሳ ኦሶይ ኢዛ ቦላ ቆንጫናሳ። 4 ጋላሳራ ታና ከቲዳዴ ኦሶ ኦሳናሰ ታሰ ቤሴሰ። ቡር ኦኒካ ኦሳናሰ



ዳንዳዮን ቃማይ ያና። 5 ሃ ቢታ ቦላ ዲዛ ዎዴ ሃ ቢታስ ፖይይ ታና” ገዴስ። \*

6 ሄሳ ገ ሲሚዲ ቢታ ቦላ ጩኝ ጩቲዲ ባ ጩቻን ኡርቃ ሹጊሲዲ አዴዛ አይፊዛ ሄ ኡርቃ ቲዩዲ፤ 7 “ባዳ ሴሊሆሜን አሳይ ዓማቁቲዛሶን ሜጩታ” ገዴስ። ሴሊሆሜ ጉሲ ከቲቲዳይሳ ጉሳ። አዴዚካ ቢዲ ሜጩቲዲኔ ያሊሼ ሲሚ ዩዴስ። 8 ኢዛ ደሳቲኔ ካሴ ኢዚ ሄን ዎሲሺን ቤዩዳ አሳይ “ሃይሳዴይ ካሴ ኡቲዲ ዎሲዛ አዴዛ ዴኔ?” ገዴ።

9 ኢሰታፊ ኢሲ ኢሲ አሳቲ “ኤ ኢዛኮ” ገዴ። ባጋይቲ “ኢዛ ዴና” ገዴ። ኢዚ ቃሴ “ታ ኢዛኮ” ገዴስ። 10 ኢሰቲካ “ሂሰቲን ኔ አይፊይ ዎኒ ያሊዴ?” ገዴ ኦይቺዳ። 11 ኢዚካ ዛሪዲ “ዬሱሳ ጌቲቲዛ አሲ ቢታ ቦላ ኡርቃ ሙኑቁዲ ታ አይፊዛ ሄ ኡርቃ ቲዩዲኔ ታና ‘ባዳ ሴሊሆሜን ሜጩታ’ ገ ዮቲን ታ ባዳ ሜጩታዳ ያላናሰ ዳንዳያዲስ” ገዴስ። 12 ኢሰቲካ “ሂሰቲን ሄሳዴይ ሃሲ አዎን ዲዜ?” ገዴ። ኢዚካ “ታ ኤሪኬ” ገዴስ።

**ፋርሳዌቲ አዴዚ ዎኒ ፓዊዳኮኔ ቆር አይኪዳ**

13 ኢሰቲካ ሄ ካሴ አይፊ ቆቁ አዴዛ ፋርሳዌታኮ ኤፊዳ። 14 ዬሱሲ ኡርቃ ሙኑቁዲ አዴዛ አይፊ ፓሊዳ ፓላሳይ አይሁዳታ ሳምባታ ፓላሳ። 15 ሄሳ ገሽ ፋርሳዌቲ አዴዛ ኢዚ ዎሰቲ ያሊዳኮኔ ኢዛ ኦይቺዳ። አዴዚካ ዛሪዲ “ኢዚ ታ አይፊን ኡርቃ ቲዩዴስ፤ ታካ ሜጩታዲስ፤ ሄኮ ሃሲ ያላዲስ” ገዴስ።

16 ፋርሳዌታፔ ኢሲ ኢሲ አሳቲ “ሃይሲ አዴዚ ሳምባታ ቦንቸንታዴ ገዲዳ ገሽ ኢዚ ያሳፊ ገዴና” ገዴ። ባጋይ ቃሴ “ናጋራንቻይ ሃይሳ ማላ ማላታ ዎኒ ኦላና ዳንዳይዜ? ገዴ። ሄሳ ገሽ ኢሰታ ገዴን ፓላማይ ሜዴቲዴስ። 17 ሂሰቲን ካሴ አይፊ ቆቁ አዴዛኮ ሲሚዲ “ሃ ኔ አይፊ ፓሊዳ አዴዛ ገሽ ኔ አይ ጋይ? ገዴ። አዴዚ ዛሪዲ “ኢዚ ናቤኮ!” ገዴስ። 18 አይሁዳቲ አዴዛ ዬሊዳ አዬይራኔ አዎራ ያይጊሲ ኤሂሳና ጋካናሰ አዴዚ ካሴ ቆቁ ገዲዳይሳ አማኒቤቴና።

19 ኢሰቲካ ዬሊዳይታ “ኢንቲ ኑስ ቆቁ ናይ ዬሌቲዴስ’ ገዛ ናዚ ሃይሴ? ሂሰቲን ሃሲ ዎኒዲ ያላና ዳንዳዩዴ?” ገዴ። 20 ዬሊዳይቲካ ሂዘጊ ዛሪዳ “ኢዚ ኑ ና ገዲዳይሳኔ ቆቁ ገዲዲ ዬሌቲዳይሳ ኤርስ። 21 ሃሲ ቃሴ ኢዚ ዎኒ ያላና ዳንዳዩዳኮኔ ኢዛ አይፊ ኦኒ ፖጊዳኮኔ ኑ ኤርኮ። ኢዚ ባና ዳንዳዩዳዴ ገዲዳ ገሽ ኢዚ ባ ገሽ ዮታናሰ ዳንዳዩስ፤ ኢዛ ኦይቺቲ” ገዴ።

\* 9:5 ማቶ 5:14፤ የሃ 8:12

22 ኢዛ ዩሊዳይቲ ሃሳፉ ገዳይ ኦሪካ ዩሱሳ ኢዚ ኪርሰቶሳ ገዲ ማርካቲዳይ ወሪ ኣይሁዳታ ዋሳ ከላፌ ጎዳታና ማላ ኣይሁዳቲ ካሴ ሴራ ኦሊዳ ገሽ ኣይሁዳታሰ ባቢዲ ገዳ። 23 ሄሳ ገሽ “ኢዛ ዩሊዳይቲ ኢዚ ባና ዳንዳዩዳይ ገዲዳ ገሽ ኢዛ ኦይቸቲ” ገዳ።

24 ካሴ ቆቄ ኣዳዘ ቃሴካ ጭገዲ “ሃይሶ ኔ ቱማዮ ዮታዳ ያሳ ቦንቻ። ሃይሴ ኣዳዚ ናጋራንቻ ገዲዳይሳ ኦ ኤርሰ” ገዳ።

25 ኢዚካ “ኢዚ ናጋራንቻ ገዲን ታ ኤሪኬ። ገዶ ኣቲን ታ ካሴ ቆቄ ገዲዳርኔ ቃሴ ሃዲ ታ ጭሊዛር ሃኖ ፃላ ኤራይሰ” ገዳሰ። 26 ኢሰቲ ቃሴ ኢዛ “ኢዚ ኔሰ ኣይ ኦሊዳ? ኔ ኣይፊዛ ዋሰቲ ፖገዳ?” ገዲ ኦይቸዳ 27 ኢዚካ “ታ ኢንቴሰ ካሴ ዮቲን ዋዝናን ዋሊ ሲይቤኬታ ሸን ሃዲ ቃሴ ኣዛሰ ዛሬሊ ሲያና ኮዩቲ? ኢንቴካ ኢዛ ካሊዛይታ ገዳና ኮዩቲ?” ገዳሰ።

28 ሃሳፌ ጉዩ ኢዛ “ኦ ሙሴ ካሊዛዳንታ፤ ኔ ኢዛ ካሊዛዳ ገዳ። 29 ካሴ ያሲ ሙሴራ ሃሳዩቲዳይሳ ኦ ኤርሰ። ሃይሴ ኣዳዚ ኣዋፔ ዩዳኮኔ ኦ ኤርኮ” ገዳ። 30 ኣዳዚካ ኢሰታሰ “ኢዚ ኣዋፔኮኔ ኢንቴ ኤርንታይሴ ማላሊሴሰ። ገዶ ኣቲን ታ ኣይፊ ጭሊሲዳይይ ኢዛ። 31 ያሲ ባሰ ያዩዛዳሴ ኢዛ ሸኔ ኦሊዛዳሰ ኣቲን ናጋራንቻ ኣሰ ሲዮንታይሳ ኦ ኤርሰ። 32 ኣይፊ ቆቄዲ ዩሌቲዳይ ኣይፊይ ጭሊዳሰ ገዛይሳ ኣላሚይ ሜዲቶሳፔ ኦሪካ ሲዩ ኤራና። 33 ሃይሳይይ ያሳፌ ገደንታኮ ሃይሳ ኦላናሰ ዳንዳዩና” ገ ዛሪዳሰ። 34 ኢሰቲካ ኢዛ “ኔኒ ኔሰ ሙሌ ኣሳቴላይ ናጋራን ሙኦቄቲን ዩሌቲዳይሴ ኦና ታማርሳና ዋና ፃላዲ?” ገዲ ኢዛ ጎዲዳ።

**ኣያና ዮጋይ ቋሚዳይ**

35 ኣዳዛ ጎዲዳይሳ ዩሱሲ ሲይዳሰ። ኢዛ ዳሚዲኔ “ኔ ኣሳ ናን ኣማናይ?” ገዳሰ። 36 ኣዳዚካ “ጎዶ! ታ ኢዛን ኣማናና ማላ ኢዚ ኦኔ?” ገዲ ኦይቸዳሰ። 37 ዩሱሲካ “ኔ ኢዛ ቤያዳሳ፤ ሃዲ ኔናራ ሃሳዩዛይ ኢዛኮ!” ገዳሰ። 38 ኣዳዚካ “ጎዶ! ኢዛ ኣማናዲሰ” ገዲ ኢዛሰ ሆኪ ጎይኒዳሰ። 39 ዩሱሲካ “ቆቄቲ ጭላና ማላኔ ጭሊዛይቲ ቆቃና ማላ ፐርዳና ታ ሃይሳ ሃ ኣላሚ ያዲሰ” ገዳሰ። 40 ኢዛራ ዲዛ ፋርሳዊታፔ ኢሲ ኢሲ ኣሳቲ ሃሳ ሲይዲ “ሃሲ ኣይ ጉሴ? ሂሰቲን ኦካ ቆቄ?” ገዳ። 41 ዩሱሲካ ኢሰታ “ኢንቴ ቆቄታ ገዲዳኮ ኢንቴሰ ናጋራ ገዳና ሸን ኢንቴ ሃዲ ኦ ጭሊሰ” ገዛ ገሽ ኢንቴ ናጋራንቻ ገዲዳ ማላ ዳና” ገዳሰ።

# 10

## ሎዎ ሃንላንቻ

1 ዩሱሲ፣ “ታ ኢንቴስ ቱሙ ጋይሰ፤ ደርሳታ ዪሬ ፔንጌራፔ ኦትን ሃራ ባጋራ ጉፒ ጌሊዛይ ካይሶኔ ቦንቁዛዴ። 2 ፔንጌራ ጌሊዛዴይ ኢዚ ደርሳታ ሃሚዛዴ። 3 ፔንጌ ሩጊዛዴይ ኢዛሰ ፔንጌዛ ደዩሰ። ደርሳቲካ ኢዛ ቃላ ሲዩቴሰ። ባ ደርሳታ ሱንላራ ሱንላራ ያይጊ ኬሴሰ። 4 ባይታ ወርሲ ኬሲዳፔ ጉዬ ኢሰታ ሲንላ ኦዲ ካሌሌሰ። ደርሳቲካ ኢዛ ቃላ ኤሪዛ ጊሽ ኢዛ ካሌቴሰ። 5 ኢማላ ኦሳ ቃላ ኤሮንታ ጊሽ ኢዛፔ ባቃቴቴሰ ኦትን ሙሉካ ኢዛ ካሌቴሰ። 6 ዩሱሲ ሃሳ ለሚሶዛ ኢሰታሰ ዮቴዴሰ ሽን ኢሰቲ ቃሴ ኢዚ ኢሰታሰ ዮቴዳይሳ ኦይኮካ ኤሪቤቴሰ። 7 ሃሳ ጊሽ ዩሱሲ ቃሴካ ኢሰታሰ “ታ ኢንቴስ ቱሙ ጋይሰ፤ ደርሳታ ፔንጌይ ታሩ። 8 ታፔ ካሴ ዪዳይቲ ወሪ ካይሶኔ ቦንቁዛይታ። ደርሳቲ ጊዲኮ ኢሰቲ ጊዛ ሲይቤቴሰ 9 ፔንጌይ ታሩ። ታ ባጋራ ጌሊዛዴይ ወሪ ኦታሩ፤ ጌላሩኔ ኬዛሩ፤ ሃሚቴዛሶካ ዴማሩ። 10 ካይሶይ ካይሶታሩ፤ ዋዳሩኔ ዳይሳናሰ ፃላ ዩሰ። ታ ጊዲኮ ኢንቴስ ዴይይ ዳና ማላኔ ኢንቴስ ኬሂ ዳራና ማላ ያዲሰ።

11 “ታ ሎዎ ሃሚዛዴ፤ ሎዎ ሃሚዛዴይ ባ ሹምፖ ባ ደርሳታ ጊሽ ኦላ ኢሚሰ። 12 ሚሹራ ቃፃሬቲዲ ሃሚዛዴይ ጊዲኮ ደርሳቲ ኢዛሰ ጊደንታ ጊሽ ካና ሱይቴይ ዪዛ ዋዴ ደርሳታ ዩጊዲ ባሰ ባቃቴሰ። ካና ሱይቴይካ ደርሳታ ዳፊ ዳፊ ሚሴኔ ላሌሰ። \* 13 ባቃቴዛዴይ ሚሻን ቃፃሬቲዳዴ ጊዲዳ ጊሺኔ ደርሳታሰ ሚሹቶንታ ጊሻሳ።

14 “ሎዎ ሃንላንቻይ ታሩ። ታኒ ታ ደርሳታ ኤራይሰ፤ ኢሰቲካ ታሩ ኤሬቴሰ። 15 ሃሲካ ኦዋይ ታሩ ኤሪዛይሳ ማላ ታኒ ታ ሹምፖ ደርሳታ ጊሽ ኦላ ኢማሩ። \* 16 ሃይሳ ሃ ደርሳ ዪሬን ጌሎንታይቲ ታሰ ሃራ ደርሳቲ ዴቴሰ፤ ታ ኢሰታካ ሃ ኤሃናሰ ታሰ ቤሴሰ። ኢሰቲካ ታ ቃላ ሲያናኔ ኢሲ ሜሄ ጊዳና። ሃሚዛይሲካ ኢሳዴ ጊዳና። 17 ታ ዛራዳ ዴንላናሰ ታ ሹምፖ ታ ኦላ ኢሚዛ ጊሽ ታ ኦዋይ ታሩ ደሴሰ። 18 ታኒ ታ ሹምፖ ታ ደሳራ ኦላ ኢማዲሰ ኦትን ኦኒካ ታፔ ዋሊ ኤኬና፤ ታ ኦላ ኢማናሰ ጊዲን ዋይኮ ዛራ ዴንላናሰ ጊዲን ሹኔይ ታሳ፤ ሃሳ ሄ ኦዛዘዛ ታኒ ታ ኦዋፔ ኤካዲሰ” ጊዴሰ።

\* 10:12 ካና ሱይቴ ጉሲ ኢሲ ኢሲ ጋዋላ ቃላራ ሱዱሜ ጌቴቴሰ። \* 10:15 ማቶ 11:27

19 ሄሳ ሄ ቃላፔ ዴንዲዳይሳን አይሁዳታ ጊደን ቃሴካ ሻኬቴሌ ሜዴቴዴሰ። 20 ዳሮ አሳይ “ኢዛ ቦላ ዳይዳንሌ ዲዛ ጊሺኔ ጎሽ ጊዲዳ ጊሽ አንቴ ኢዚ ጊዛይሳ አይሰ ሲዩቴ? ጊዳ።  
 21 ባጋይቴ ቃሴ “ዳይዳንሌ ዲዛዴይ ሃይሳ ማላ ዴና። ዳይዳንሌ ቆቂዳ አይፊ ፓሌ ኤሪዜ?” ጊዳ።

**አይሁዳቲ አማኖንታ ኢዲዳ**

22 ዩሩሳላሚን ያሳ ኬላ ኦራሶ ባዓሌ ቦንቾ ዋዴይ ጋኪዴሰ፤ ሄ ዋዴይካ ባልጎ። 23 ዩሱሲ ያሳ ኬላ ጊቤ ጊደን ሶሎሞኔ ሲሜሪቴላሶራ አዲሺን። 24 አይሁዳቲ ኢዛ ጊደ አሊዲ “ኔ አይዴ ጋካናሰ ኑ ዋዝና ሂርጋን ጋምዲሳኔ? ኔ ያሲ ከተዳዴ ጊዲኮ ኑስ ቆንጨሳ ዮታ” ጊዳ።

25 ዩሱሲካ ኢሰታሰ “ታ አንቴሰ ዮታዲሰኮ ሺን አንቴ ቃሴ አማኒቤይኬታ። ታ አዋ ሱንላን ታ ኦሊዛ ማላታቲ ታ ጊሽ ዮቴቴሰ። 26 አንቴ ቃሴ ታ ዶርሳታ ጊደንታ ጊሽ ታና አማኔኬታ። 27 ታ ዶርሳቲ ታ ቃላ ሲዩቴሰ። ታካ ኢሰታ ኤራይሰ፤ ኢሰቲካ ታና ካሌቴሰ። 28 ታ ኢሰታሰ ሜርና ዴዎ አማና፤ ሙሌካ ኢሰታ ዳዩቴና፤ ኢሰታ ታ ኩሼፔ ዋሊ ኤካናሰ ዳንዳያናዴይ ኦኒካ ዴና። 29 ታሰ ኢሰታ አሚዳ ታ አዋይ ኡባፌ አዴሰ። ታ አዋ ኩሼፔ ኢሰታ ኦኒካ ቦንቃናሰ ዳንዳዬና። 30 ታኒኔ ታ አዋይ ኑ ኢሲኖ” ጊዴሰ።

31 አይሁዳቲ ኢዛ ጫዳናሰ ቃሴካ ሹቾ ዴንሊዳ። 32 ዩሱሲካ “አዋፔ ጊዲዳ ዳሮ ጊታ ማላታታ ታ አንቴና ቤሳዲሰ። ሂሰቲን ሃ ታ ቤሲዳይታፔ አዋሪ ጊሽ ታና ሹቻራ ጫዴቴ?” ጊዴሰ።

33 አይሁዳቲካ “ኑ ኔና ሹቻራ ጫዲዛይ ኔ ጮ አሰ ጊዳ ኡታዳ ኔና ኔርካ ያሴ ኬሳዳ ጫሻ ቃላ ኔ ሃሳዩዳ ጊሻሳፌ አቲን ኔ ሎዎ ኦሊዳይሳ ጊሽ ዴና” ጊዲ ኢዛሰ ዛሪዳ። 34 ዩሱሲካ ኢሰታሰ “አንቴ ዋጋ ጊደን ‘ታ አንቴና ያሳታ ጋዲሰ’ ጌቴቲ ዓፌቲቤኔ? \* 35 ያሳ ቃላይ ኢሰታሰ ዩዳ አሳታ ‘ያሴ ጊኮኔ ማፃፋይ ሻሪታናሰ ዳንዳዮንታ ጊዲኮ’ 36 ሂሰቲን ‘ታ ያሳ ና’ ጊዳ ጊሽ አዋይ ባ ሻኪ ዲማሲዳይሳኔ ሃ ዲጌ አላሜ ከተዳይሳ አንቴ ‘ኔ ጫያዳሳ’ ጊዲ ታና ዋርዶራ አዛሰ ሞቴቲ? 37 ታ አዋይ ኦሊዛይሳ ታ ኦሎንታ ኦኒኮ ታናን አማኖፒቴ። 38 ታ ኢዛሶ ኦሊዛ ጊዲኮ አንቴ ታና አማኖንታ ኦኒኮካ ታ አዋይ ታናን ዲዛይሳ ታካ ኢዛን ዲዛይሳ አንቴ ኤራና ማላኔ ዩሺ ቆፓና ማላ ኢዚ ኦሊዳ ማላታን አማኒቴ” ጊዴሰ።

---

\* 10:34 ማዛ 82:6

39 ቃሴካ ኢስቲ ኢዛ ኦይካናሰ ኮይዳ ሺን ኢዚ ኢስታ ኩሼፔ ኬሲ ኤኪ ቢዳሰ። 40 ሄሳፌ ጉዬ ዬሱሲ፣ የሃኒሲ ካሴ ፃማቂዛሶ ጌዴ የርዳናሴፔ ሄ ፒንሐ ሲሚዲ ሄን ጋምዲዳሰ። \* 41 ዳር አሳይ ኢዛኮ ዪዳሰ፤ ኢስቲ ቃሴ “የሃኒሲ ኢሲ ማላታካ ኦሊቤና፤ ጊዶ አቲን ሃይሳ አዳዛ ገሽ ኢዚ የቲዳይሲ ወሪካ ቱሙኮ” ጊዳ። 42 ሄንካ ዳር አሳይ ዬሱሳን አማኒዳሰ።

# 11

## አላዛሬ ሃይቆ

1 ቢታኒያ ጌቴቲዛሶን ማራማኔ ማርታይ ዲዛ ጉታን አላዛሬ ጌቴቲዛዳይ ሳኬቲዳሰ። 2 ኢዚ አሻ አላዛሬይ ሳኬቲዳ ማራማ ካሴ ዬሱሳ ቶሆ ቦላ ሺቶ ጉሳዳ ዬሱሳ ቶሆ ባ ሁዔ ቢናናን ቁጩዳርኮ። 3 ሚቼቲካ “ጎዶ! ኔ ዶሲዛይሲ ሳኬቲዳሰ” ጊዳ አሰ ዬሱሳኮ ኪቲዳ።

4 ዬሱሲ ሄሳ ሲይዲ “ሃ ሳኮይ ፆሳ ናይ ኢዛን ቦንቼታና ማላኔ ፆሲ ቦንቼታናሳፌ አቲን ኢዛ ሃይቆሰ ጋሊዛዝ ዳና” ጊዳሰ። 5 ዬሱሲ ማርታ ኢዚ ሚቼኖ ማራማኔ አላዛሬ ሲቁስ። 6 ጊዶ አቲን አላዛሬይ ሳኬቲዳይሳ ሲዬ ዎሊዲ ሄን ባ ዲዛሶን ናምቡ ጋላሰ ጋምዲዳሰ። 7 ሄሳፌ ጉዬ ባና ካሊዛይታ “ኣኔ ዩሁዳ ቢታ ሲሚ ቦሰ” ጊዳሰ። 8 ኢስቲካ “ኣስታማሬ! ጉላ ዎዴፔ ካሴ አሳይ ኔና ሹቻራ ጫዳና ኮዬቴሰኮሺን፤ ኔ ቃሴ ሃዲ ሄ ሲማ ባኔ?” ጊዳ።

9 ዬሱሲ ኢስታሰ “ኢሲ ጋላሳን ታማኔ ናምቡ ሳቲይ ዳሰ ዳኔ? ጋላሳራ ሃሙቲዛ አሲ ሃ አላማዛ ፖፖን ሲማሬቲዛ ገሽ ቋጵቴና። 10 ቋጵቲዛዳይ ጊዲኮ ኢዚ ቃማራ ሃሙቲዛዳ። ጋሶይካ ፖፆይ ባይንዳ ገሻሳ” ጊዳሰ። 11 ሄሳ ኢስታሰ የቲዳፔ ጉዬ “ኦ ላኔ አላዛሬይ ቋሰኪዳሰ፤ ታካ ኢዛ ቋሰኮፌ ዳንፋና ባይሰ” ጊዳሰ። 12 ኢዛ ካሊዛይቲ ኢዛ “ጎዶ! ኢዚ ቋሰኪዳ ጊዲኮ ዳንዳና” ጊዳ። 13 ዬሱሲ ኢስታሰ ሄሳ የቲዳይ አላዛሬ ሃይቆ ገሻሳ ሺን ኢዛ ካሊዛይታሰ ቃሴ ቋሰኮ ገሽ የቲዳ ሚሳቲዳሰ። 14 ሄሳ ገሽ ቆንጩራ ኢስታሰ “አላዛሬይ ሃይቂዳሰ። 15 አንቴ አማናና ማላ ታ ሄን ደንታ አገዳይሲ አንቴ ገሽ ታና ኡፋይሴሴ፤ ሃዲ ጊዲኮ ኣኔ ጌዴ ኢዛኮ ቦሰ” ጊዳሰ።

16 ቃሴ ዲዲሞሳ ጌቴቲዛ ቶማሲ ሃንኮ ዬሱሳ ካሊዛይታ “ኣኔ ኩካ ቢዲ ኢዛራ ኢሲፌ ሃይቆሰ” ጊዳሰ። \*

\* 10:40 የሃ 1:28 \* 11:16 ዲዲሞሳ ጉሲ ሜንቴ ጉሳ።

**ዩሱሲ ኣላዛሬ ሚቹታ ሚንጹሊዳስ**

17 ዩሱሲ ቢ ጋኪሺን ኣላዛሬይ ሃይቂ ሞጌቲን ኦይዲ ጋላስ ጊዲዳስ። 18 ቢታኒያይ ዩሩሳላሚፕ ባጋ ሳቲ ኦጌ ሃኬስ። 19 ኢስታ ኢሻይ ሃይቂዳ ገሽ ማራሞኔ ማርታ ሚንጹላናስ ዳሮ ኣይሁዳ ኣሳይ ኢስታኮ ሸቂዳስ።

20 ዩሱሳ ዩሳ ማርታይ ሲያዳ ኢዛ ሞካ ኤካና ባዲስ፤ ማራማ ጊዲኮ ሶን ኡታዲስ። 21 ማርታይ ዩሱሳ “ጎዶ! ኔ ሃን ዲዛኮ ታ ኢሻይ ሃይቂናኮሺን። 22 ሃዒካ ጊዲኮ ኔ ዎሲዳ ዉርሲ ዖሲ ኔስ ኢማናይሳ ታ ኤራይስ” ጋዲስ።

23 ዩሱሲካ ኢዚስ “ኔ ኢሻይ ዳንዳና” ጊዳስ። 24 ማርታይ ቃሴ “ዉርሴላን ዳንሳ ዎዴ ኢዚ ዳንዳናይሳ ታካ ኤራይስ” ጋዲስ። 25 ዩሱሲካ ኢዚስ “ዳንዳይኔ ዳዖይ ታና፤ ታና ኣማኒዛዳይ ሃይቂኮካ ፓፃ ዳና። 26 ታናን ዲዛዳይኔ ታና ኣማኒዛዳይ ሙሊካ ሃይቂና፤ ሃሳ ኔ ኣማናይ?” ጊዳስ።

27 ኢዛካ ዛራዳ “ኤ ጎዶ! ኔኒ ዲጌ ሃ ኣላሚካ ከቲቲዳ ዖሳ ና ጊዲዳይሳ ታ ኣማናይስ” ጋዲስ። 28 ሃሳ ጋዳኔ ሲማዳ ባ ሚቹዮ ማራሞ ዲማ ፃይጋ ከሳዳ “ኣስታማሬይ ኔና ኮዩስ” ጋዲስ። 29 ማራማካ ሃሳ ሲዩዳ ማላ ኤሌላ ዳንዳዳ ኢዛኮ ባዲስ። 30 ሃሳ ጋካናስ ዩሱሲ ማርታራ ጋጊዳሶን ዳስ ኣቲን ጌዴ ጉታ ጊዶ ጌልቤና 31 ማራሞ ሚንጹሊሼ ኢዚራ ሶን ዲዛ ኣይሁዳቲካ ማራማ ፑሱኩ ጋ ዳንዳ ኤቃዳ ኬዚዳይሳ ቤዩዲ ኢዛ ኣላዛሬ ዱፎ ኣቻን ዩካና ቢዛ ሚሳቲን ኢዞ ካሊዳ።

32 ማራማ ዩሱሲ ዲዛሶ ጋካ ኢዛ ዳሚዳ ማላ ኢዛ ቶሆ ቦላ ጉፋናዳ “ጎዶ! ኔ ሃን ዲዛኮ ታ ኢሻይ ሃይቂናኮሺን” ጋዲስ።

33 ኢዛኔ ኢዞ ካሊ ዩዳ ኣይሁዳቲ ዩከዛይሳ ዩሱሲ ቤዩዲ ዳሮ ሚሼቲዲ 34 “ኢዛ ኣዎን ሞጊዳቲ?” ጊዲ ኦይቹዳስ፤ ኢስቲካ “ጎዶ! ሃ ያዳ ቤያ” ጊዳ። 35 ዩሱሲካ ኣፋንፃዳስ። 36 ኣይሁዳቲካ “ኢዚ ኢዛ ኣይ ማላ ሲቂዛኮ ቤይቲ” ጊዳ። 37 ኢስታ ጊዶፌ ኢሲ ኢሲ ኣሳቲ “ሃይሲ ቆቁ ኣዳዛ ኣይፌ ፖግዳይሲ ሃይሳዳይ ሃይቆንታ ማላ ኦላናስ ዳንዳዩኔ?” ጊዳ።

**ዩሱሲ ኣላዛሬ ሃይቆፕ ዳንጹዳስ**

38 ዩሱሲ ኢዛ ዎዝናይ ሚሼቲን ጌዴ ዱፎኮ ቢዳስ፤ ዱፎዚካ ሹቻራ ጎርዴቲዳ ጎንጎሎ። 39 ኢዚካ ኢስታ “ሹቻ ዳንጹቴ!” ጊዳስ። ሃይቂዳይሳ ሚቹያ ማርታይ “ጎዶ! ኢዚ ሃይቂን ሃቹ ኦይዲ ጋላስ ጊዲዳ ገሽ ፃንቃናኮ!” ጋዲስ። 40 ዩሱሲካ “ኔ ኣማኒዛ ጊዲኮ ዖሳ ቦንቾ ቤያንዳሳ ጋዳ ኔስ ታ ዮታቤይኪና?” ጊዳስ። 41 ሃሳ ገሽ ሹቻ ዳንጹዳ፤ ዩሱሲካ ፑዴ ሳሎ ፃሊዲ

“ታ አዋዉ! ኔ ታ ገዛዝ ሲዩዳ ገሽ ታ ኔና ጋላታይስ። 42 ኔ ኡባ ጋላስ ታ ገዛዝ ሲዩዳይሳ ታ ኤራይስ፤ ገደ ኣቲን ታ ሄሳ ገዳይ ሃይሳን ኤቁዳ ኣሳቲ ኔ ታና ኪቲዳይሳ ኣማናና ማላሳ። 43 ዩሱሲ ሄሳ ገዳፔ ካሌሊዲ ቃላ ቆቁ ሂስቲዲ “ኣላዛሬ! ሃ ኮዛ!” ገዲ ዪይገዴስ። 44 ሃይቁዳ ኣላዛሬይካ ኩሚላ ኣሳቲላይ ሞሳ ማይዖን ፃፃቲዳ ማላ ዱፎፔ ኮዚዴስ። ዩሱሲካ “ቢርሺ ዩዲቲ ቦ!” ገዴስ።

ኣሳይ ዩሱሳ ዎቆናስ ገማን ዘሬቲዴስ  
(ማቶ 26:1-5፤ ማር 14:1-2፤ ሉቃ 22:1-2)

45 ሄሳ ገሽ ማራሞ ሚንሴላና ዩዳ ኣይሁዳታፔ ዳሮ ኣሳይ ዩሱሲ ኦሊዳይሳ ቤዩዲ ኢዛን ኣማኒዴስ። 46 ኢስታፌ ባጋቲ ቢዲ ዩሱሲ ኦሊዳይሳ ፋርሳዌታስ ዮቲዳ። 47 ሄሳ ቄሴታ ሃላቃቲኔ ፋርሳዌቲ ኣይሁዳታ ዱላታ ሺቃና ማላ ዪይገዲ “ሃ ኣዴዚ ዳሮ ዲማ ዲማ ማላታታ ኦሊዳይ ገዲዳ ገሽ ኦ ኣይ ኦሊኮ ሎዖ? 48 ኦ ጮቡ ገኮ ኣሲ ዉሪ ኢዛን ኣማናናኔ ኦሮሜ ኣሲካ ዩዲ ሃይሳ ኦ ቢታኔ ኦ ኣሳ ኦፔ ኤካና” ገዲ።

49 ኢስታ ገደፌ ኣሳይ ሄ ላይላ ቄሴታስ ዋና ሃላቃ ቃያፋይ “ኢንቲ ኣይኮካ ኤሬኬታ። 50 ዴሬይ ዉሪ ቆያናፔ ዴሬ ገሽ ኢሲ ኣሲ ሃይቁኮ ሎዖ ገዳናይሳ ገሽ ዩሺ ቆፔኬቲ?” ገዴስ። 51 ኢዚ ሄሳ ባፔ ገደንታ ሄ ላይላ ኢዚ ቄሴታስ ሃላቃ ገዲዳ ገሽ ዩሱሲ ኣይሁዳ ዴሬ ገሽ ሲንሳፌ ሃይቃናይሳ ዮቲዴስ። 52 ኢዚ ሃይቃናይ ሄ ዴሬ ኣሳስ ፃላላ ገደንታ ካሴ ላሌቲዳ ያሳ ናይታካ ኢሲ ቦላ ሺሻናሳ።

53 ሄ ጋላሳፌ ሃ ሲሚን ኢዛ ዎቆናስ ማቁቲዳ። 54 ሄሳ ገሽ ዩሱሲ ሄ ጋላሳፌ ሃ ሲሚን ኣይሁዳታ ገደን ቆንጨራ ሲሜሬቲቤና። ገደ ኣቲን ዲጌ ባዙ ቢታ ማታን ዲዛ ኤሬሪሜ ጌቲቲዛ ካታማይ ዲዛሶ ቢዲ ባና ካሊዛይታራ ሄን ታኪዴስ።

55 ኣይሁዳቲ ፓዚጋ ባዓሌይ ማቲዳ ማላ ባዓሌይ ጋካናፔ ካሴ ጌሽ ዎጋ ኦላናስ ዳሮ ኣሳይ ዲማ ዲማ ዴሬፔ ዩሩሳላሚ ዩዴስ። 56 ኣሳይ ዩሱሳ ኮዩሺ ያሳ ኬላን ኤቁዲ ባ ገደን ኢሶይ ኢሳራ “ኢንቲስ ኣይ ሚሳቲዜ? ባዓሌዛስ ዩኔሻ?” ገዴስ። 57 ቄሴታ ሃላቃቲኔ ፋርሳዌቲ ቃሴ ዩሱሳ ኦይካናስ ኢዚ ኣዋን ዲዛኮኔ ኤሪዛይይ ኢስታስ ማላታና ማላ ካሴ ኣዛዚ ዎሊዳ።

# 12

ዬሱሳ ሺቶ ቲዪዳ ማጫሳዮ  
(ማቶ 26:6-13፤ ማር 14:3-9)

1 ፓዚጋ ባዓሌስ ቡር ኡሱፑን ጋላሲ አቲሺን ዬሱሲ ሃይቆፔ ዴንሊዳ አላዛሬይ ዲዛሶ ቢታኒያ ቢዴስ። 2 ሄን ዬሱሳስ ካዎ ካሊዲ ማርታይ ኢዛ ካዎ ሚዚሺን ኢዛራ ኢሲፌ ማዳን ኡቲዳይታፔ ኢሶይ አላዛሬ። 3 ማራማ ዳር አልዎ ዋጋራ ሻሜቲዳ ባጋ ሊቲር ጊዲዛ ጌሻ ናርዶሴ ሺቶ ኤካ ያዳ ዬሱሳ ቶሆ ቦላ ጉሳዳ ቶሆዛ ባ ሁዔ ቢናናራ ቁጫዲስ። ኬላካ ሺቶ ሳዎይ ኩሚዴስ። \* 4 ዬሱሳ ካሊዛይታፔ ኢሶይ ዬሱሳ አሊ ኢማና አስቆርንቶ ዩሁዳይ፣ 5 “ሃይሲ ሺቶዚ ሄቩ ያቱ ዲናሬስ ባይዜቲዲ ሚሻይ አዛስ ማንቆታስ ኢማቲቤኔ?” ጊዴስ። 6 ኢዚ ሄሳ ጊዳይ ሚሻ ሺሺዛ ካራዲቲ ኦይከዛዴይ ኢዛ ጊዲዳ ጊሽ ሺቆዛ ሚሻፌ ባስ ሺሺዲ ጎዔቲዛዴ ጊዲዳ ጊሻሳ አቲን ማንቆታስ ሚሽቲዲ ጊዴና።

7 ዬሱሲ ቃሴ “ሃይሲ ሺቶዚ ታስ ሞኅ ጋላሳስ ቆፊቲዳዝ ጊዲዳ ጊሽ ሄ ዎዴ ጋካናስ ኢዛ ባ አቻን ናጉ፣ ቦቾፍቴ። 8 ማንቆቲ አይ ዎዴካ ኢንቴናራ ዴቲስ። ጊዶ አቲን ኢንቴ ታና ኡባ ዎዴ ዴማኬታ” ጊዴስ። \*

9 ሄ ዎዴ ዳር አይሁዳ አሳቲ ዬሱሲ ሄን ዲዛይሳ ኤሪዲ ኢዛኮ ዩዳ፤ ዩዳይቲካ ዬሱሳ ፃላላ ኮሽ ጊዶንታ ዬሱሲ ሃይቆፔ ዴንሊዳ አላዛሬካ ቤያናሳ። 10 ሄሳ ጊሽ ቁሴታ ሃላቃቲ ዬሱሳራ አላዛሬካ ጋሊ ዎቆናስ ባ ጊዶን ዘሬቲዳ። 11 ሄሲካ አላዛሬ ጌዶን ዳር አይሁዳ አሳይ ዬሱሳኮ ቢ ቢዲ ኢዛ አማኒዛ ጊሻሳ።

ዬሱሲ ቦንቾን ዬሩሳላሚ ጌሊዴስ  
(ማቶ 21:1-11፤ ማር 11:1-11፤ ሉቃ 19:28-40)

12 ዎንቲላ ጋላስ ባዓሊዛ ቦንቾና ዩዳ ዴይ ዬሱሲ ዬሩሳላሚ ዩዛይሳ ሲይዴስ። 13 ዛምባ ሃይላ ኤሺዲ ዬሱሳ ሞካና ኬዚዴስ፤ ዴይይ ቃላ ቶቁ ሂስቲዲ “ሆሳና! ጎዳ ሱንላን ዩዛ ኢሰራዔሌ ካዎይ አንጄቲዳይሳ!” ጊዴስ። \*

14-15 ቤኒ “ሃኔ! ዲዮኔ ናዬ፣ ባቦፋ!  
ሄኮ ኔ ካዎይ ሃሬ ጉቴ ቶጊዲ ዬስ”

\* 12:3 ሉቃ 7:37-38      \* 12:8 ዛሬ 15:11      \* 12:13 ማዛ 118:25-26



ጌቲቲ ፃፊቲዳ ማላ ዩሱሲ ሃሬ ጉቴ ዳሚዲ ቶጊዳስ። \*

16 ኢዛ ካሊዛይቲ ሃሳ ወርሲ ኮይሮ ዎዝናን ዎሊቤቴና። ኢዛ ጊሽ ፃፊቲዳይሳኔ ኢዛስ ኦሴቲዳ ሃናካ ወርሲ ዩሱሲ ሃይቆፔ ዳንዲዳፔ ጉዩ ኤሪዳ።

17 አላዛሬ ዱፎፔ ፃይጊዲ ሃይቆፔ ዳንሉዳ ዎዳ ኢዛራ ኢሲፊ ዲዛ አሳይ ኢዛ ዳንላ ጊሽ ማርካቲዳ። 18 ዳሮ አሲካ ኢዚ ሃሳ ማላ ጊታ ማላታ ኦሊዳይሳ ሲይዲ ኢዛ ሞካና ኬዚዳስ። 19 ሃሳ ጊሽ ፋርሳዌቲ ባ ጊዶን ኢሶይ ኢሳ “ሂሰቲን ኮኒ አይ ኦላና ዳንዳዩዛኒ? ቤይቴ! ኩሜላ ዳሬይ አቶንታ ኢዛ ካሌስ” ጊዳ።

**ዩሱሲ ባ ሃይቃናይሳ ካሴቲ ዮቲዳስ**

20 ጎይናናስ ባዓሌዛስ ሸቂዳ አሳ ጊዶን ጊሪኬ ዳሬ አሳቲካ ዳቴስ። 21 ኢሰቲካ ጋሊላ ጊዶን ዲዛ ቤቴሳይዳ ጌቲቲዛ ዳሬ አስ ፒሊጶሳ ጌቲቲዛዳኮ ቢዲ “ጎዶ! ኑ ዩሱሳ ቤያና ኮዮስ” ጊዳ።

22 ፒሊጶሲካ አንዲራሳስ ዮቲዳስ። አንዲራሲኔ ፒሊጶሲ ቢዲ ዩሱሳስ ዮቲዳ። 23 ዩሱሲካ ኢስታስ “ሄኮ አሳ ናይ ቦንቴቲዛ ሳቲይ ጋኪዳስ። 24 ታ አንቲስ ቱሙ ጋይስ፤ ጊስቴ አይፌይ ቢታን ዎዳዳ ሃይቆንታ ጮፀ ጋ ኡቲኮ ባርካ አታዉስ። ኢዛ ሃይቁዛ ጊዲኮ ሃራ ዳሮ አይፋዉስ። 25 ባ ሸምፖ ዶሲዛዳይ ሳይሴስ። ሃይሳ ቢታ ቦላ ባ ሸምፖ ኢጻዛዳይ ጊዲኮ ሜርና ዳዎ ዳሜስ። 26 ታስ ኦላና ኮዩዛዳይ ታና ካሎ፤ ታስ ኦሊዛዳይ ታ ዲዛሶን ዳና፤ ታስ ኦሊዛዳይ ታ አዎይ ኢዛ ቦንቻና” ጊዳስ።

**ዩሱሲ ኢዛ ቡርፔ ጋካና ሜቶ ጊሺኔ ሃይቆ ጊሽ ዮቲዳስ**

27 ቃሴካ ዩሱሲ “ሄኮ ታ ሸምፖያ ሜቶታዲስ ‘ታ አዎዉ! ሃ ሳቲይፔ ታና አሻ ጎሻ?’ ታ ሂዝጎንታ ማላ ታ ዩዳይ ሃና ሃ ሜቶ ሳቲይሳ።

28 “ታ አዎዉ! ኔ ኔ ሱንላ ቦንቻ” ጊዳስ። ሃሳፊ ካሊዲ “ታኒ ታ ሱንላ ቦንቻዲስ፤ ቃሴካ ጉጃ ቦንቻና” ጊዛ ቃላይ ሳሎፔ ዩዳስ።

29 ሄን ጋዳን ኤቂዳ አሳይ ሃሳ ሲይዲ “ዳዳይ ዳዳቴስ” ጊዳ። ባጋይቲ ቃሴ “ኪታንቻኮ ሃሳዩዛይ” ጊዳ።

30 ዩሱሲ “ሃይሲ ጊሪሳይ ዩዳይ አንቴ ጊሻሳ አቲን ታ ጊሽ ጊዳና። 31 ሃይሲ አላሜይ ፒርዴታና ዎዳይ ሃይሳ፤ ሃይሳ ዳሬዛ ሃሪዛ ፃላዔይ ሃዒ ጌዳ ካሬ ዩጌታና። 32 ታኒ ቆቆ ጋዳ ካቂቲዛ

\* 12:14-15 ዛካ 9:9

ዎዴ አሳ ወርሳ ታኮ ዛራና” ጊዴስ። 33 ዩሱሲ ሄሳ ዮተዳይ ኢዚ አይ ማላ ሃይቆ ሃይቃናኮ ኤሪሳናሳ።

34 አሳይ ቃሴ “ኑ ዎጋን ፃፊተዳይ ‘ፆሲ ከተዳይይ ሜርናስ ዳና’ ጌስ፤ ሂሰቲን ኔ ቃሴ ዋናዳ ‘አሳ ናይ ቶቁ ጊ ካቁታና ቤሴስ’ ጋይ? ኔ ጊዛ አሳ ናይ አዋይሴ?” ጊዴ ኦይቺዳ። \*

35 ዩሱሲ ኢስታስ “ሃዒ ጉላ ዎዴስ ኢንቴናራ ፖይይ ዴስ፤ ጋይይ ቋሞንታ ፖይራ ሃሙተቴ፤ ቃማራ ሃሙተዛዴይ ኢዚ አዋ ቢዛኮኔ ኤሪና። 36 እንቴ ፖይ ናይታ ጊዳና ማላ ፖይይ ዲሽን ፖይን አማኒቴ” ጊዴስ። ዩሱሲ ሄሳ ጊዳፔ ጉዬ ቢዲ ኢስታ አይፊፔ ጌሚዴስ።

አይሁዳቲ አማኒቤቴና

37 ዩሱሲ ኢስታስ ሄሳ ማላ ማላታ ኢስታ ሲንላን ኦሊንካ አይሁዳቲ ኢዛን አማኒቤቴና። 38 ሄሲ ሃኒዳይ ናቤ ኢሳያሲ “ሳዶ! ኑ ማርካቴላ አማኒዳይ ኦኔ?

ፆሳ ቃላይ ኦናስ ቆንጨዴ?” ጊዳ ማላ። \*

39 ሄሳ ጊሽ አማናናስ ዳንዳይቤቴና፤

ጋሶይካ ናቤ ኢሳያሲ ካሴ፤

40 “ኢስቲ ባ አይፊን ቤዬዲ፤

ባ ዎዝናን ዩሺ ቆፒዲ፤

ሲሞንታ ማላኔ ኢዚ ኢስታ ፓሉንታ ማላ

ፆሲ ኢስታ አይፊ ቆቁሲዴስ፤

ኢስታ ዎዝናካ ሙሚሲዴስ”

ጊ ፃፊዳ ጊሻሳ። \*

41 ኢሳያሲ ሄሳ ጊዳይ ፆሲ ከተዳዴ ቦንቾ ቤዬዳ ጊሻሳ፤ ሄሳ ጊሽ ዩሱሲ ዮተዴስ።

42 ጊዲኮካ አይሁዳታ ሃላቃታፔ ዳር አሳይ ዩሱሳ አማኒዴስ። ጊዳ ኦቲን ኢስታ አይሁዳታ ዎሳ ኬላፊ ጎዶንታ ማላ ፋርሳዌታስ ባቢዲ ባ አማኖ ቆንጨን ማርካቴቤቴና። 43 ኢስቲ ሄሳሶ ሃኒዳይ ኢስታስ ፆሳፊ ኢሜቲዛ ቦንቾፊ ኦሊዲ አሳፔ ኢሜቲዛ ቦንቾ ደሲዳ ጊሻሳ።

44 ዩሱሲ ባ ቃላ ቶቁ ሂሰቲዲ “ታና አማኒዛዴይ ታናን ፃላላ ጊዶንታ ታና ከተዳይሳንካ አማኒስ። 45 ታና ቤዬዳዴይ ታና ከተዳይሳካ ቤያና። 46 ታና አማኒዛይ ወሪ ቋማን ደንታ ማላ ታ ፖይ ጊዳዳ ሃይሳ ሃ አላሜዛ ያዲስ። 47 ታ ቃላ ሲይዲ

\* 12:34 ማዛ 110:4፤ ኢሳ 9:7፤ ሃዚ 37:25፤ ዳኔ 7:14 \* 12:38 ኢሳ 53:1 \* 12:40 ኢሳ 6:10

ኦሎንታዎ ሰላ ፐርዳናይ ታና ገዲኬ። ጋሶይካ ታ ዪዳይ ኣላሚ ኣሻናሰ ኣቲን ኣላሚ ሰላ ፐርዳናሰ ገዲና። 48 ታና ኮዮንታዳኔ ታ ቃላ ኤኮንታዳ ሰላ ፐርዳናዳይ ዳሰ፤ ታ ኢዛሰ ዮቲዳ ቃላይ ወርሴላ ጋላሰ ኢዛ ሰላ ፐርዳና። 49 ጋሶይካ ታኒ ጮ ታ ሼኔን ዮታቤይኬ፤ ታ ገዛይሳኔ ታ ዮቲዛ ኣዛዘ ታሰ ኢሚዳይ ታና ከቲዳ ታ ኣዎ 50 ኢዛ ኣዛዘይ ሚርና ዳዎ ገዲዳይሳ ታ ኤራይሰ፤ ሄሳ ገሽ ታ ዮቲዛይ ወሪ ኣዎይ ታሰ ዮቲዳይሳ” ገዴሰ።

# 13

## ዬሱሲ ባና ካሊዛይታ ቶሆ ሜጪዳሰ

1 ሄ ዎይይካ ኣይሁዳታ ፓዚጋ ባዓሊፔ ካሴ ዬሱሲ ሃይሳ ኣላሚዛ ዬዲዲ ኣዎኮ ባና ሳቲይ ጋኪዳይሳ ኤሪዳሰ፤ ሃይሳ ኣላሚዛን ዲዛ ባ ባጋታ ወርሲ ሲቂዳሰ። ወርሴላ ጋካናሲካ ደሲዳሰ።

2 ዬሱሲኔ ኢዛ ካሊዛይቲ ኢሲፌ ካዎ ሚሺን ሲሞና ናይ ኣሰቆሮንቶ የሁዳይ ዬሱሳ ኣሉ ኢሚና ማላ ዓላዔይ ኢዛ ዎዝናን ኢታ ቆፋ ጌልሉዳሰ። 3 ዬሱሲ ኣዎይ ኢዛሰ ጎዳቲሕ ወርሲ ኢሚዳይሳኔ ኢዚ ያሳ ኣቻፌ ኬዚዲ ዪዳይሳ፣ ቃሴ ሲሚዲ ያሳኮ ባናይሳ ኤሪሰ። 4 ሄሳ ገሽ ማዳ ሰላፌ ዳንዲዲኔ ማይዎ ቃሪ ዎሉዲ ፖፃ ኤኪዲ ፃሳን ገዲዳሰ። \* 5 ቶሆ ሜጪዛ ጎንገን ሃሌ ጉጂዲ ባና ካሊዛይታ ቶሆ ሜቹ ኦይኪዳሰ፤ ባ ገዲዳ ፖፃንካ ሜጪዳ ቶሆዛ ቁጪዳሰ።

6 ዬሱሲ ሲሞና ጌቲቲዛ ጴጥሮሳኮ ሸቂን ሲሞና ጌቲቲዛ ጴጥሮሲ ኢዛ “ጎዶ! ኔ ታ ቶሆ ሜጫኔ?” ገዴሰ። 7 ዬሱሲካ “ታኒ ኦሊዛይሳ ኔ ሃዲ ኤራካ ጉዬፔ ቃሴ ኔ ኤራንዳሳ” ገዴሰ።

8 ጴጥሮሲካ “ኔ ታ ቶሆ ሙሌካ ሜጫካ” ገዴሰ። ዬሱሲ ቃሴ “ታ ኔ ቶሆ ሜጫንታ ኣገኮ ኔሲኔ ታሰ ኢሲፌቲሉ ዳና” ገዴሰ። 9 ሲሞና ጌቲቲዛ ጴጥሮሲካ ዛሪዲ “ጎዶ ሄሳ ገዲኮ ታሰ ቶሆ ዓላላ ገደንታ ኩሼራ ሁዔራ ወርሳ ሜጫ” ገዴሰ።

10 ዬሱሲ ቃሴ “ባ ኣሳቲሉ ሜጬቲዳዳሰ ኩሜላ ሰላይ ጌሽ ገዲዳ ገሽ ኢዛሰ ቶሆ ሜቻፌ ኣቲን ሃራ ኮሼና። ኣንቲ ጌሻ ሺን ኡባታ ዳኬታ” ገዴሰ። 11 ዬሱሲ “ኣንቲ ኡባቲካ ጌሽ ዳኬታ” ገዴይ ኢዛ ኣሉ ኢሚናዳይ ኦናኮኔ ኤሪዛ ገሻሳ።

12 ኢሰታ ቶሆ ሜጪዳፔ ጉዬ ባ ማይዎ ኤኪ ማይዲዲ ካሴ ባ ኡቲዳሶን ሲሚ ኡቲዳሰ። ቃሴ ኢሰታሰ “ታ ኣንቲሰ ኣይ ኦሊዳኮኔ

\* 13:4 ፃሳ ገዛ ቃላይ ኢሲ ኢሲ ጋሞ ኣሳታ ቃላን ዳባ ጌቲቲሰ።

ዎዘናን ዎሏዳቲ? \* 13 ኢንቴ ታና አሰታማሬኔ ጎዳ ጌታ፤ ታ ቃሰ አሰታማሬኔ ጎዳ ጊዲዳ ጊሽ ኢንቴ ጉሳይ ቱሙኮ። 14 ሂሰቲኮ ታ ኢንቴሰ ጎዳኔ አሰታማሬ ጊዲሼ ኢንቴ ቶሆ ማጪዛ ጊዲኮ ኢንቴካ ኢንቴ ጊዲን ኢሶይ ኢሳ ቶሆ ማጪና ቤሴሰ። 15 ታ ኢንቴሰ ኦላዲይሳ ማላ ኢንቴካ ኦላና ማላ ታ ኢንቴሰ ለሚሶ ቤሳዲሰ። 16 ታ ኢንቴሰ ቱሙ ጋይሰ፤ አሽካራይ ጎዳፔ አዴና፤ ኪቴቲዳዴይ ኪቴዳዴፌ አዴና። \* 17 ኢንቴ ሃይሳ ኤሪዲ ኦሶን ፔይሺኮ ኢንቴ ኦንጃቲዳይታ።

18 “ታ ሃይሳ ጊዛይ ኢንቴ ኡባታ ጊሽ ዴና። ታኒ ታ ዶሪዳይታ ወርሳ ኤራይሰ፤ ጊዶ አቲን ‘ታ ካላ ሚዳዴይ ታ ሞርኬ ጊዲዲ ታ ቦላ ዴንዲዴሰ’ ጊዛ ማፃፋ ቃላይ ፖሌታናሰ ኮሼሰ። \* 19 ታ ሃይሳ ሃራራ ኢንቴሰ የቲዛይ ኢዚ ፖሌቲዛ ዎዴ ታ ኦናኮኔ ኢንቴ አማናና ማላ። 20 ታ ኢንቴሰ ቱሙ ጋይሰ፤ ታ ኪቴዳዴ ኤኪዛዴይ ታና ኤኬሰ፤ ታና ኤኪዛዴይ ታና ኪቴዳዴ ኤኬሰ” ጊዴሰ። \*

ዩሱሲ ባና አላ ኢማናዴይ ኦናኮኔ ካሴቲ የቲዴሰ  
(ማቶ 26:20-25፤ ማር 14:17-21፤ ሉቃ 22:21-23)

21 ዩሱሲ ሄሳ ጊ ሲሚዲ ኬሂ ቆፋን ጌሊዲኔ “ታ ኢንቴሰ ቱሙ ጋይሰ፤ ኢንቴ ጊዶፌ ኢሳዴይ ታና አላ ኢማና” ጊዲ ቆንጨኙን የቲዴሰ።

22 ኢዛ ካሊዛይቲ ሄሳ ኢዚ ኦና ጊሽ ጊዳኮኔ ኤርንታ ጊሽ ባ ጊዶን ኢሶይ ኢሳራ ፃሌቲዳ። 23 ኢዛ ካሊዛይታ ጊዶፌ ዩሱሲ ሲቁዛ ኢሶይ ዩሱሳ አቻን ኡቲዴሰ። 24 ሲሞና ጌቲቲዛ ጳፀርሲ የሃኒሳ ሶሞዲ ቤሲዲ “ኢዚ ኦና ጊሽ ጊዛኮኔ ኦኔ ኢዛ ኦይቻ” ጊዴሰ።

25 ሄሳ ጊሽ ኢዚ ባ ቆዴ ጌዴ ዩሱሳ ሃይሳኮ ሺሺዲ “ጎዶ! ኢዚ ኦኔ?” ጊዲ ኦይቸዴሰ።

26 ዩሱሲካ ዛሪዲ “ኢዛዴይ ታ ሃራ ቡዴና ዎዳን ጳምዳዳ ባርሲዛይ” ጊዴሰ። ሄሳ ጊ ሲሚዲ ቡዴና ዎዳን ጳምዳዳ ኤኪዲ አሰቆርንቶፌ ዩዳ ሲሞና ና የሁዳ ባርሲዴሰ። 27 የሁዳይ ኢዛ ባዲዳ ማላ ሄራካ ፃላዴይ ኢዛን ጌሊዴሰ። ዩሱሲካ የሁዳ “ኔ ኦላናሰ ቆፒዳይሳ ኤሌላ ኦላ” ጊዴሰ። 28 ዩሱሲ ሄሳ አዛሰ ጊዳኮኔ ማዳን ኡቲዳ አሳፔ የጋይ ጌሊዳዴይ ኦኒካ ዴና። 29 የሁዳይ ሚሽ ኦይኪዛይ ጊዲዳ ጊሽ ዩሱሳ ካሊዛይታፔ

\* 13:12 ሉቃ 22:27 \* 13:16 ማቶ 10:24፤ ሉቃ 6:40፤ የሃ 15:20  
\* 13:18 ማዛ 41:9 \* 13:20 ማቶ 10:40፤ ማር 9:37፤ ሉቃ 9:48፤ 10:16

ባጋቲ ዩሱሲ ዩሁዳ “ባዓሌዛስ ኮሺዛይሳ ሻማ ወይኮ ማንቆታስ ሙፁዋታ ኢማ” ጊዳ ሚሳቲዴስ።

30 ዩሁዳይካ ቡዴና ባዲዳ ማላ ሄራካ ኬዚዲ ቢዴስ። ኢዚ ቢሺን ጋዴይ ቃማኮ።

**ኦራላ አዛዘ**

31 ዩሁዳይ ኬዚ ቢዳፔ ጉዬ ዩሱሲ “አሳ ናይ ሃዒ ቦንቹቲዴስ፤ ኢዛ ጋሶን ያሲካ ቦንቹቲዴስ። 32 ያሲ ኢዛ ጋሶን ቦንቹቲዛ ጊዲኮ ያሲካ ኢዛ ቦንቻና፤ ሄራካ ጋምዖንታ ቦንቻና። 33 ታ ናይቶ፣ ታ አንቴናራ ደሮ ወይ ጋምዒኬ፤ አንቴ ታና ኮያና፣ ታ ካሴ አይሁዳታ ሃላቃታሰካ ‘ታ ቢዛሶ አንቴ ያና ዳንዳዬኬታ’ ጋዳ ዮቲዳ ማላ ሃዒካ አንቴሰካ ሄሳሎ ዮታይስ። \* 34 አንቴ አንቴ ጊደን ኢሶይ አሳራ ሲቁታና ማላ ታ አንቴሰ ኦራላ አዛዘ አማይስ። ታ አንቴና ሲቁዳ ማላ አንቴ አንቴ ጊደን ኢሶይ አሳራ ሲቁቲቴ። \* 35 አንቴ አንቴ ጊደን ሲቁቲኮ አንቴ ታና ካሊዛይታ ጊዲዳይሳ አሲ ዉሪ ኤራና” ጊዴስ።

**ጳፅሮሲ ኢዛ ካዳናይሳ ዩሱሲ ካሴቲዲ ዮቲዴስ (ማቶ 26:31-35፤ ማር 14:27-31፤ ሉቃ 22:31-34)**

36 ሄሳፌ ጉዬ ሲሞና ጌቲቲዛ ጳፅሮሲ ዩሱሳ “ጎዶ! ኔ አዎ ባኔ?” ጊዲ ኦይቹዴስ። ዩሱሲ ቃሴ “ታ ቢዛሶ ኔ ሃዒ ታና ካላና ዳንዳያካ ሺን ጉዬቴ ኔ ታና ካላና” ጊዴስ።

37 ጳፅሮሲ “ጎዶ! ታ ኔና ሃዒ ካላናሰ አይሰ ዳንዳዩኪና? ሃራይ አቶሺን ታኒ ታ ሺምፖካ ኔ ጊሽ አላ አማና” ጊዴስ።

38 ዩሱሲካ ዛሪዲ “ኔኒ ኔ ሺምፖ ታ ጊሽ አላ አማኔ? ታ ኔሰ ቱሙ ጋይሰ፤ ሃኛ ኩቶይ ዋሳናፔ ካሴታዳ ኔ ታና ሄሹቶ ካዳና” ጊዴስ።

**14**

**ዩሱሲ አዋኮ ጋሊዛ ኦጌ**

1 ካሊሊድካ ዩሱሲ “አንቴ ዋዝናይ ማቶቶፖ፤ ያሴ አማኒቴ፤ ታናካ አማኒቴ። 2 ታ አዎ አቻን ዳሮ ዲሳሶይ ዴስ፤ ሄሳ ጊደንታኮ ‘አንቴሰ ዳናሶ ጊሊሳናሰ ታ ባና’ ጋናሺን። 3 ባዳ ታ አንቴሰ ሶ ጊሊሲዳፔ ጉዬ አንቴ ታ ዲዛሶን ዳና ማላ ታ ሲማ ያዳ አንቴና ኤካና። 4 ታ ቢዛ ኦጌ አንቴ ኤሬታ” ጊዴስ።

\* 13:33 የሃ 7:34 \* 13:34 የሃ 15:12፣17፤ 1ዮሃ 3:23፤ 2ዮሃ 5

5 ቶማሲ “ጎደ! ኔ አዋ ቢዛኮኔ ኑ ኤሮኮሺን፣ ኦጌዛ ኑ ዋስቲ ኤራናሰ ዳንዳዪዚ?” ገደሰ። 6 ዩሱሲካ ኢዛሰ “ኦጌይኔ፣ ቱማይ፣ ዴያይካ ታና፤ ታ ባጋራ ገዲኮፌ አቲን ኦኒካ አዋኮ ባና አሲ ዴና። 7 ኢንቲ ታና ኤሪዛኮ ታ አዋካ ኤራናኮሺን፤ ሃሲ ሃይሳፌ ጉዬ ኢንቲ ኢዛ ኤራና፤ ኢዛ ቤያካ ቤይዴታ” ገ ዛሪዴሰ። 8 ፒሊጶሲ “ጎደ! ኔ ኑና አዋ ቤሲኮ ኑሰ ገዳና” ገደሰ።

9 ዩሱሲካ ኢዛሰ “ፒሊጶሳ! ሃይሳ ጋካናሰ ታ ኢንቲናራ ዴሲንካ ኔ ታና ኤሪኪ? ታና ቤዩዳይይ አዋካ ቤይዴሰ፤ ሂሰቲን ኔኒ ዋናዳ ኑና አዋ ቤሳ ጋይ? 10 ታኒ ታ አዋን፣ ታ አዋይካ ታናን ዲዛይሳ አማኒኪ? ታ ኢንቲሰ ዮተዛ ቃላ ዮተዛይ ታ ሺኔ ማላ ዴና፤ ገደ አቲን ኦሶዛ ወርሲ ኦሊዛይ ታናን ዲዛ ታ አዋ። 11 ታኒ አዋን ዲዛ ማላ፣ አዋይካ ታናን ዲዛይሳ ኢንቲ አማኒቲ፤ አካይ ገኮ ታ ኦሊዛ ኦሶታ ገሺካ ታና አማኒቲ። 12 ታ ኢንቲሰ ቱሙ ጋይሰ፤ ታና አማኒዛይይ ታ ኦሊዛ ኦሶ ኦላና፤ ሄሳፌካ ኦሊ ኦላና፤ ጋሶይካ ታኒ አዋኮ ባና። 13 አዋይ ናዛ ጋሶን ቦንቼታና ማላ ኢንቲ ታ ሱንላን ዋሲዳይሳ ታ ኢንቲሰ ወርሳ ኦላና። 14 ኢንቲ አይ ሚሺካ ታ ሱንላን ዋሲዳይሳ ታ ወርሳ ኦላና።

**ዩሱሲ ዓሎ አያና ገሽ ኢሚዳ ሂደታ**

15 “ኢንቲ ታና ደሲዛ ገዲኮ ታ አዛዘዮ ናገቲ። 16 ታኒ አዋ ዋሳና፤ ኢዚካ ኢንቲናራ ሜርናሰ ዴና ማላ ሃራ ኢንቲና ሚንጮላናዴ ኢንቲሰ ኢማና። 17 ሃይሲ ሚንጮሊዛ አያናይ ዴሬ አሳይ ኢዛ ቤዩ ኤሮንታ ገሽ አላሚይ ኤካናሰ ዳንዳዮንታ ቱሙ አያና፤ ገደ አቲን ኢንቲ ኢዛ ኤሬታ፤ ጋሶይካ ኢዚ ኢንቲናራ ዲዛ ገሺኔ ኢዚ ኢንቲ ጋላን ዲዛ ገሻሳ።

18 “አዋይኔ አያ ባይንዳ ናይታ ማላ ታ ኢንቲና ፃላላ አገኬ፤ ታ ሲማዳ ሃ ኢንቲኮ ያና። 19 ጉሳ ዋዴፔ ጉዬ ዴሬ አሳይ ታና ቤዬና ሺን ኢንቲ ገዲኮ ቤያንዴታ፤ ታኒ ዴያን ዲዛ ገሽ ኢንቲካ ዴያን ዳንዴታ። 20 ታኒ ታ አዋን ዲዛ ማላ ኢንቲካ ታናን ዲዛይሳኔ ታካ ኢንቲናን ዲዛይሳ ኢንቲ ሄ ዋዴ ኤራንዴታ።

21 “ታ አዛዘ ኤኪዲ ኦሊዛይይ ታና ደሴሰ፤ ታና ደሴዛይካ ታ አዋይ ደሴሰ፤ ታካ ኢዛ ደሳና፤ ታናካ ኢዛዴሰ ቆንጨሳና” ገደሰ።

22 አሰቆሮንቶ የሁዳ ገደንታ ሃንኮ የሁዳይ “ጎደ! ኔኒ አላሚ አሳሰ ገደንታ ኑሰ ዋሰታ ቆንጨሳኔ?” ገደሰ።

23 ዩሱሲካ ኢዛሰ “ታና ሲቋዛይይ ታ ቃላ ናጋና፤ ታ አዋይካ ኢዛ ደሳና፤ ኑኒ ኢዛኮ ያና፤ ዩዲካ ኢዛዴራ ኢሲፌ ዴና። 24 ታና

ደሶንታዳይ ታ ቃላ ናጌና፤ ሃይሲ ኢንቴ ሲዬዛ ቃላይ ታና ኪቲዳ ታ አዋ ቃላፔ ኣቲን ታ ቃላ ጊደና።

25 “ታኒ ሃዒ ኢንቴናራ ዳሼ ሃይሳ ኢንቴሰ ዮታዲሰ። 26 አዋይ ታ ሱንሳን ዬዳና ሚንጤሊዛ ዲሎ ኣያናይ ቃሰ ሃኒዛ ዉርሲ ኢንቴና ታማርሳና፤ ታ ኢንቴሰ ዮቶይሳካ ዉርሲ ኢንቴ ዋዝናን ዋላና ማላ ማዳና።

27 “ታ ኢንቴሰ ሳርቴላ ጊዶ ኣጋዳ ባይሰ፤ ታ ሳርቴሊካ ታ ኢንቴሰ ኢማና፤ ታ ኢንቴሰ ኢሚዛ ሳርቴሊ ኣላሜይ ኢሚዛ ሳርቴላ ማላ ዳና። ኢንቴ ዋዝናይ ሂርጎፎኔ ባቦፎ።

28 “ ታ ባና፤ ባዳካ ኢንቴኮ ሰማ ያና፣ ጋዳ ታ ኢንቴሰ ካሴ ዮቲዳይሳ ሲዬዳታ፤ ኢንቴ ታና ደሲዛኮ ታኒ ታ አዋኮ ቢዛይሲ ኢንቴና ኡፋይሳናኮሽን። ጋሶይካ አዋይ ታፔ ኣዴሰ። 29 ሃይሲ ሃኒዛ ዋዴ ኢንቴ አማናና ማላ ሃይሳ ኢንቴሰ ካሴታ ዮታዲሰ። 30 ሃይሳ ኣላሜዛ ሃሪዛ ያላዔይ ዬዛ ዋዴይ ጋኪዳ ጊሽ ሃዒ ታ ኢንቴናራ ዳር ሃሳይኬ፤ ኢዚ ታ ቦላ ኣይኮካ ኦላናሰ ኢዛሰ ዋልቃይ ዳና። 31 ጊዶ ኣቲን ታኒ አዋ ደሲዛይሳ ኣላሜይ ኤራና ማላ አዋይ ታና ኣዛዚዳይሳ ታ ዉርሳ ፖላና። ኣኔ ሃይሳፌ ቦሰ፤ ዴንዲቲ” ጊዴሰ።

# 15

## ዬሱሲ ቱሙ ዋይኔ ሚላሰ ኣኖ

1 ቃሴካ ዬሱሲ “ቱሙ ዋይኔ ሚላ ኣኖይ ታና፤ ኣታኪልቲዛ ኦሳንቻይ ታ አዋ። 2 ታ ቦላ ዲሼ ኣይፌ አሞንታ ሃጋ ዉርሲ ታ አዋይ ቃንፃ ዲጋና፤ ኣይፊዛ ሃጋ ጉጂ ኣይፋና ማላ ቁርፂ ጌሻና። 3 ታ ኢንቴሰ ዮቲዳ ቃላ ጋሶን ኢንቴ ሃዒ ጌሻታ። 4 ታናን ዲቲ፤ ታካ ኢንቴናን ዳና፤ ሃጋይ ዋይኔ ኣኖ ቦላ ደንታ ኣጊኮ ባርካ ኣይፌ ኣይፋና ዳንዳዮንታይሳ ማላ ኢንቴካ ታናን ደንታ ኣጊኮ ኣይፌ ኣይፋናሰ ዳንዳዬኬታ።

5 “ታኒ ዋይኔ ሚላሰ ኣኖ፤ ኢንቴ ቃሰ ሃጋታ፤ ዳር ኣይፌ ኣይፊዛዳይ ታናን ዲዛዳይ ታካ ኢዛን ዲዛዳይ፤ ጋሶይካ ታ ባይንዳ ኢንቴ ኣይኮካ ኦላናሰ ዳንዳዬኬታ። 6 ታናን ባይንዳይይ ቃንፃቲዲ ዋራ ዬጌቲዳ ሃጋ ማላ ካሬ ዬጌቲዲ ሄን ማላና፤ ሄይታ ማላ ሃጋቲ ኢሲ ቦላ ሽቂዲ ታማን ዬጌታናኔ ኤፃና። 7 ኢንቴ ታናን ዲኮ ታ ቃላይካ ኢንቴናን ዲኮ ኢንቴ ኮዬዳይሳ ኣይቲኮ ዴማና። 8 ዳር ኣይፌ ኢንቴ ኣይፊሽን ታ አዋይ ቦንቲቴሰ፤ ኢንቴ ታና ካሊዛይታ ጊዲዳይሲ ሄሳን ኤሬታና።

9 “አዋይ ታና ደሲዳይሳሉ ታካ እንቴና ደሳዲስ፤ ሄሳ ጊሽ እንቴ ታ ሲቆን ዲቴ። 10 ታኒ ታ አዋ አዛዙ ፖላዳ ኢዛ ሲቆን ዲዳ ማላ እንቴካ ታ አዛዙ ፖሊኮ ታ ሲቆን ዳና። 11 ሃይሳ ታ እንቴሰ የተዛይ ታ ኡፋይሲ እንቴናን ጊዳና ማላኔ እንቴ ኡፋይሲካ ኩሜል ጊዳናሳ። 12 ታ እንቴሰ አሚዛ አዛዛይ ታ እንቴና ሲቁዳ ማላ እንቴካ እንቴ ጊዳን ኢሶይ ኢሳራ ሲቁታናሳ። \* 13 አሲ ባ ላጌሰ ባ ሸምፖ አሊ አምፔ አዲዛ ሲቆይ ዳና። 14 ታ እንቴና አዛዚዛይሳ ኡባ እንቴ ፖሊኮ እንቴ ታ ላጌታ። 15 አሽካራይ ጎዳይ ኦሊዛይሳ ኤርንታ ጊሽ ሃይሳፊ ጉዬ ታ እንቴና አሽካራታ ጊኬ። ጊዶ ኦቲን ታኒ ታ አዋፔ ሲዱዳይሳ ወርሳ እንቴሰ ቆንጨሲዳ ጊሽ ታ እንቴና ታ ላጌታ ጋዲሰ። 16 ታ እንቴና ዶራዲሰ ኦቲን እንቴ ታና ዶሪቤኬታ፤ እንቴ ቢዲ ዳር አይፊ አይፋና ማላ እንቴ አይፊይ ኤቁ ዳና ማላ ታ እንቴና ዋላዲሰ፤ ሄሳ ጊሽ እንቴ ታ ስንሳን ዋሲዳይሳ ወርሲ አዋይ እንቴሰ አሚና። 17 ሄሳ ጊሽ እንቴ እንቴ ጊዳን ኢሶይ ኢሳራ ሲቁታና ማላ ታ እንቴና አዛዛይሰ።

**ዬሱሲ ባና ካሊዛይታ አላሜይ ኢፃናይሳ የተደሰ**

18 “ካሌሊዳካ ዬሱሲ እንቴና አላሜይ ኢፃኮ እንቴፊ ካሴ ታና ኢፃዳይሳ ኤሪቴ። 19 እንቴ አሚናንታ አላሜ አሳ ጊዲኮ አላሜ አሳይ ባ ባጋ ጊዲዳይ ደሴሰ። ጊዶ ኦቲን እንቴ አላሜ ባጋ ጊዳንታ ጊሽ ታ እንቴና አላሜፔ ሻካዳ ዶሪዳ ጊሽ ዳሬይ እንቴና ኢፃሰ። 20 ‘አሽካራይ ጎዳፔ አዴና’ ጋዳ ታ ካሴ እንቴሰ የቶይሳ ዩሽ ቆፐቴ፤ ኢሰቲ ታና ጎዳዛይቲ እንቴናካ ጎዳና፤ ኢሰቲ ታ ቃላ ናጊዛኮ እንቴ ቃላ ናጋና። 21 ኢሰቲ ታና ኪቲዳይ ኤርንታ ጊሽ ታ ጋሶን እንቴ ቦላ ሄሳ ወርሲ ኦላና። 22 ታ ያዳ ኢሰታሰ የቶንታኮ ኢሰታሰ ናጋራ ጊዳና። ሃዒ ቃሰ ኢሰታ ናጋራሰ ሃና ጊዛ ጋሶይ ባዋ። 23 ታና ኢፃዛይይ ታ አዋካ ኢፃሰ። 24 ሃራ አሲ ኦሎንታ ኦሶ ታ ኢሰታ ጊዳን ኦሎንታ ኢሰታሰ ናጋራ ጊዳናሽን፤ ሃዒ ኢሰቲ ሄሳ ወርሲ ቤዱዳፔ ጉዬ ታናካ ታ አዋካ ኢፃዳ። 25 ሄሲካ ሃኒዳይ ካሴ ‘ታና ጋሶይ ባይንዳ ዲሸን ኢፃዳ’ ጌቲቲዲ ኢሰታ ዋጋን ፃፊቲዳ ቃላይ ፖሊታናሳ።

26 “ጊዶ ኦቲን አዋፔ ኬዚዲ ያናይሰ ታካ ታ አዋ አቻፊ እንቴሰ ዬዳናይሰ ቱማ አያናይ ሚንጬሊዛይሰ ዩዲ ኢዚ ታ ጊሽ ማርካታና። 27 እንቴ ኮይርፔካ ታናራ ዲዛ ጊሽ ታሰ እንቴካ ማርካታንዴታ” ጊዳሰ።

---

\* 15:12 የሃ 13:34፤ 15:17፤ 1የሃ 3:23፤ 2የሃ 5



# 16

1 ቃሴካ ዩሱሲ “ሄኮ ሃይሳ ወርሳ ታ ኢንቴሰ ኢንቴ ኣማናይ ያርክ ያርኮፎ ጋዳ ዮታዲሰ። 2 ኢሰቲ ኢንቴና ባ ኬላፌ ጎዳና፤ ሃራይ ኣቶሺን ኢንቴና ዋጲዛዴይ ወሪ ያሳሰ ኦሊዛዴ ሚሳቲዛ ዋዴይ ያና። 3 ኢሰቲ ሄሳሶ ኦሊዛይ ታናካ ታ ኣዋካ ኤርንታ ጊሻሳ። 4 ታ ሃይሳ ኢንቴሰ ሃራ ዮቲዛ ዋዴ ኢንቴ ታ ኢንቴሰ ጊዳይሳ ቆፓናሳ” ጊዴሰ። ካሌሊዲካ ዩሱሳ “ሃይሳ ወርሳ ታ ኢንቴሰ ዮቶንታ ኣጊዳይ ታ ኢንቴናራ ኢሲፌ ዲዛ ጊሻሳ።

## ዲሎ ኣያና ኦሶ

5 “ሃሚ ቃሴ ታና ከቲዳይሳኮ ባና ጋይሰ፤ ጊዶ ኣቲን ኢንቴፌ ኦኒካ ‘ኔ ኣዋ ባኔ?’ ጊዲ ኦይቻናይ ባዋ። 6 ጊዶ ኣቲን ሃይሳ ወርሳ ታ ኢንቴሰ ዮቲዳ ጊሽ ኢንቴ ዋዝናይ ሙዞቴሰ። 7 ታ ቃሴ ኢንቴሰ ቱሙ ጋይሰ፤ ታ ቡሲ ኢንቴሰ ጎሳ ጊዳና፤ ጋሶይካ ታ ቦንታ ኣጊኮ ሚንሌሊዛ ኣያናይ ኢንቴኮ ዩና። ታ ቢዳፔ ጉዬ ኢዛ ኢንቴኮ ዩዳና። 8 ኢዚ ዩዲ ኣሳ ናጋራ ጊሽኔ ዲሎቴላ ጊሽ ቃሴካ ፐርዳ ጊሽ ኤሪሳና። 9 ኣሳ ናጋራ ጊሽ ኢዚ ኤሪሳናይ ኣሳይ ታና ኣማናንታ ጊሻሳ። 10 ዲሎቴላ ጊሽ ኢዚ ኣሳ ኤሪሳናይ ታኒ ታ ኣዋኮ ቢዛ ጊሽኔ ቃሴ ናምዓንሶ ኢንቴ ታና ቤዮንታ ጊሻሳ። 11 ፐርዳ ጊሽ ኢዚ ኤሪሳናይ ሃይሳ ኣላሜዛ ሃሪዛይሳ ቦላ ፐርዴቲዳ ጊሻሳ።

12 “ታ ኢንቴሰ ቡር ዮታና ዳር ዮጋይ ዴሰ፤ ጊዶ ኣቲን ሃሚ ኢንቴና ዴያና። 13 ቱማ ኣያናይ ዩዲ ኢንቴና ቱማይ ዲዛሶ ካሌላና፤ ጋሶይካ ኢዚ ሲዩዳይሳ ዮታና ኣቲን ባፔ ጊዶንታ ጊሽ ኢዚ ሲንሳፌ ሃናና ዮጋታ ኢንቴሰ ዮታና። 14 ታሰ ዲዛይሳፌ ኤኪዲ ኢዚ ኢንቴሰ ዮቲዛ ጊሽ ታና ቦንቻና። 15 ኣዋሰ ጊዲዳይ ወሪካ ታይሳ፤ ‘ታሰ ጊዲዳይሳፌ ኤኪዲ ኢዚ ኢንቴሰ ዮታና’ ታ ጊዳይ ሄሳሳ” ጊዴሰ።

## ኢንቴ ሙዞቴላ ኡፋይሳን ላሜታና

16 ዩሱሲ ጉጂዲ “ጉላ ዋዴፔ ጉዬ ኢንቴ ታና ቤዬኬታ፤ ቃሴካ ጉላ ዋዴፔ ጉዬ ኢንቴ ታና ቤያና” ጊዴሰ።

17 ኢዛ ካሊዛይታፔ ባጋቲ ባ ጊዶን “ሃይሲ ኑሰ ጉላ ዋዴፔ ጉዬ ኢንቴ ታና ቤዬኬታ፤ ቃሴካ ጉላ ዋዴፔ ጉዬ ኢንቴ ታና ቤያና፤ ቃሴ ታ ኣዋኮ ባና’ ጉሲ ኣይ ጉሴ?” ጊዳ። 18 “ሂሰቲን ሃይሲ ‘ጉላ ዋዴፔ ጉዬ’ ጊዛይሲ ኢዚ ኣዜ? ኢዚ ዮቲዛይሲ ኑሰ ኤሪቴና” ጊዲ ባ ጊዶን ዛሪ ዛሪ ኦይሹቲዳ።

19 ኢስቲ ኢዛ ኦይቻናይሳ ዩሱሲ ኤሪዲ ኢስታስ ሂዘጊዴስ “ኢንቲ ኢንቲ ጊደን ኢሶይ ኢሳራ ኦይሼቲዛይ ታ ኢንቲስ ‘ጉላ ዋዴፔ ጉዬ ኢንቲ ታና ቤዬኬታ፤ ቃሴካ ጉላ ዋዴፔ ጉዬ ኢንቲ ታና ቤያና’ ጊዳ ጊሻሴ? 20 ታ ኢንቲስ ቱማ ጋይስ፡ ኢንቲ ዋሳናኔ ዩካናሺን ኣላሜይ ጊዲኮ ኡፋዬታና። ኢንቲ ሙዞቲሺን ኢንቲ ሙዞይ ኡፋይሳን ላሜታና። 21 ማጫሲ ዩሎ ዋዴይ ጋኪሺን ሚፃስ ሂርጋዉስ ሺን ና ዩላ ዩጊዳፔ ጉዬ ቢታ ቦላ ናይ ዩሉቲዳ ጊሽ ኡፋይሳፌ ዴንዲዳይሳን ካሴ ባ ዋይዳይሳ ዛራ ቆፑኩ። 22 ሄሳሉ ኢንቲካ ሃዒ ሙዞቲታ፤ ቃሴ ታ ኢንቲና ቤያና ኢንቲ ዋዞናይካ ኡፋዬታና፤ ኢንቲ ኡፋይሳ ዛሪ ኤካናዴይ ዴና።

23 “ኢንቲ ሄ ዋዴ ታፔ ኣይኮካ ዋሴኬታ፤ ታ ኢንቲስ ቱሙ ጋይስ፤ ታ ሱንላን ታ ኣዋ ዋሲኮ ኢዚ ኢንቲስ ዉርሲካ ኢማና። 24 ሃሩ ጋካናስ ኢንቲ ታ ሱንላን ኣይኮካ ዋሲ ኤሬኬታ፤ ዋሲቲ ኢንቲ ኤካና፤ ኢንቲ ኡፋይሳይካ ኩሜላ ጊዳና።

25 “ሃዒ ጋካናስ ታ ኢንቲስ ለሚሶራ ዮታዲስ ሺን ሃይሳፌ ጉዬ ታ ለሚሶራ ዮቶንታ ዋዴይ ያና። ጊደ ኣቲን ኣዋ ጊሽ ኢንቲስ ዉርሳ ቆንጨሳ ዮታና። 26 ሄ ዋዴ ኢንቲ ታ ሱንላን ዋሳና፤ ታካ ኣዋ ኢንቲ ጊሽ ዋሳና’ ጊኬ። 27 ጋሶይካ ኣዋይ ባ ባጋራ ኢንቲና ደሲዛ ጊሻሳ። ኣዋይ ኢንቲና ደሲዛይ ኢንቲ ታና ደሲዛ ጊሻሴኔ ታ ያሳ ኣቻፌ ዩዳ ኢንቲ ኣማኒዳ ጊሻሳ። 28 ታኒ ኣዋ ኣቻፌ ኬዛዳ ሃይሳ ሃ ኣላሜ ያዲሲኔ ቃሴካ ሃ ኣላሜዛ ኣጋዳ ኣዋኮ ታ ሰማ ባና” ጊዴስ

29 ኢዛ ካሊዛይቲ “ሄኮ ኔ ሃዒ ለሚሶ ጊደንታ ኑስ ቆንጨራ ዮታዳሳ። 30 ኔ ዉርሳ ኤሪዛ ማላኔ ኦኒካ ኔና ኦይቻናስ ኮሾንታይሳ ሃዒ ኑ ኤሪደስ። ሄሳ ጊሽ ኔ ያሳ ኣቻፌ ኬዚዳይሳ ኑ ኣማናስ” ጊዳ።

31 ዩሱሲ ኢስታስ “ኢንቲ ሃዒ ኣማኒዳታ፤ 32 ጊደ ኣቲን ኢንቲ ኢንቲ ባጋራ ባጋራ ላሌቲዲ ታና ፃላ ኣጋና ዋዴይ ጋኪዴስ፤ ሄ ሳቲያካ ሃዒ ጋካዲስ። ጊደ ኣቲን ኣዋይ ታናራ ጊዲዳ ጊሽ ታ ታርካ ዲኬ። 33 ታ ሃይሳ ኢንቲስ ዮቲዛይ ኢንቲ ታናን ዴዒን ኢንቲስ ሳርቲሉ ዳና ማላ ጋዳ ዮታይስ። ኢንቲ ሃ ኣላሜን ዲሺን ኢንቲስ ዋዬይ ዴስ፤ ጊደ ኣቲን ኣይኮይ ባ ታ ኣላሜ ያናዲስ” ጊዴስ።

# 17

ዩሱሳ ዋሳ

1 ዬሱሲ ሄሳ ገዳፔ ጉዬ ፑዴ ሳሎ ጶቁ ገ ጭሊዲ “ታ አዋወ! ሄኮ ሃዒ ሳቲይ ጋኪዴሰ፤ ኔ ናይ ኔና ቦንቻና ማላ ኔኒ ኔ ናዛ ቦንቻ። 2 ኔ ቦንቻናይካ ኔ ኢዛሰ አሚዳይታሰ ኢዚ ሜርና ዴዎ አማና ማላ ኔ ኢዛሰ አሳ ኡባ ቦላ ጎዳቴል አሚዳ ገሻሳ። 3 ሜርና ዴይይካ ኔ ፃላላ ቱሙ ያሳኔ ኔ ኪቲዳ ዬሱሰ ኪርሰቶሳ ኤሮ ጉሳ። 4 ኔ ታሰ አሚዳ ኦሶ ታኒ ወርሳዳ ሃ ቢታ ቦላ ኔና ቦንቻዲሰ። 5 ታ አዋወ! አላሜይ ሜዴታናፔ ካሴ ታሰ ኔናራ ዲዛ ቦንቻን ሃዒካ ታና ኔ አቻን ቦንቻርኪ።

6 “ሃይሳ አላሜ አሳፔ ኔ ታሰ ዶራዳ አሚዳ አሳታሰ ኔ ኦናኮኔ ታ ኢሰታሰ ኔና ቆንጨሳዲሰ፤ ኢሰቲ ካሴካ ኔይታ ሺን ኔ ታሰ አሚዳሳ፤ ኢሰቲካ ኔ ቃላ ናገዳ። 7 ኔ ታሰ አሚዳይሲ ወሪካ ኔፔ ገዲዳይሳ ኢሰቲ ሃዒ ኤሪዳ። 8 ኔ ታሰ አሚዳ ቃላታካ ኢሰታሰ አሚዲሰ፤ ኢሰቲካ ኤኪዳ፤ ታ ኔ አቻፌ ዩዳይሳ ኢሰቲ ቱማፔ ኤሪዳ፤ ኔ ታና ኪቲዳይሳካ ኢሰቲ አማኒዳ።

9 “ታ ኢሰታሰ ዋሳይሰ፤ ሄይቲ ኔ ታሰ አሚዳይቲ ኢሰቲ ኔይታ ገዲዳ ገሽ ታ ኢሰታሰ ዋሳይሰ፤ ገደ ኣቲን ሃንኮ አላሜ አሳሰ ዋሲኬ። 10 ታሰ ገዲዳይ ወሪካ ኔይሳ፤ ኔይሲ ወሪካ ታይሳ፤ ታካ ኢሰታን ቦንቹታና። 11 ሃይሳፌ ጉዬ ታኒ ሃይሳ አላሜ ቦላ ዲኬ፤ ኢሰቲ ገዲኮ ሃ አላሜ ቦላ ዴቴሰ። ሃዒ ታ ኔኮ ባይሰ፤ ገሻ ታ አዋወ! ሃይታ ኔ ታሰ አሚዳይታ ኢሰቲ ኮ ማላ ባ ገደን ኢሲኖ ገዳና ማላ ኔ ታሰ አሚዳ ኔ ሱንላን ኢሰታ ናጋ። \* 12 ታ ኢሰታራ ኢሲፌ ዳሼ ኔ ታሰ አሚዳ ኔ ሱንላን ታ ኢሰታ ናጋዲሰ፤ ሄሳ ገሽ ካሴ ፃፊቲዳ ጌኤሻ ማፃፋ ቃላይ ፖሌታና ማላ ኢዚ ካሴካ ቆዮሰ ዲዛ ናዛፔ ኣቲን ኢሰታፌ ኦኒካ ቆይቤና። † 13 ታ ቃሴ ሃዒ ኔኮ ባይሰ፤ ታ ሃ አላሜዛ ቦላ ዴሼ ሃይሳ ዮቲዛይ ታ ኡፋይሲ ኢሰታን ፖሌታና ማላ ጋዳ ዮታይሰ። 14 ታኒ ኔ ቃላ ኢሰታሰ አሚዲሰ፤ ታኒ ሃ አላሜ አሰ ገደንታይሳ ማላ ኢሰቲካ ሃ አላሜ አሰ ገዴቴና። ሄሳ ገሽ ሃ አላሜ አሳይ ኢሰታ አዲዴሰ። 15 ኔ ኢሰታ ኢታፔ ናጋና ማላ ታ ኔና ዋሳይሰ ኣቲን ኔ ኢሰታ ሃ አላሜፔ ዴንላ ኤፋና ማላ ታ ኔና ዋሲኬ። 16 ታኒ አላሜ አሰ ገደንታይሳ ማላ ኢሰቲካ ሃ አላሜ አሰ ገዴቴና። 17 ኔ ኢሰታ ኔ ቱማን ኔሰ ሻካ፤ ኔ ቃላይካ ቱሙ ቃላ። 18 ኔ ታና ሃ አላሜ

\* 17:11 ኔ ታሰ አሚዳ ሱንላን ኢሰታ ናጋ ኢሲ ኢሲ ጌሻ ማፃፋታ ቢርሼላይ “ኔ ታሰ አሚዳ ኡባ ኔ ሱንላን ናጋ” ጌቴሰ። † 17:12 ኔ ታሰ አሚዳ ኔ ሱንላን ኢሰታ ናጋዲሰ ኢሲ ኢሲ ጌሻ ማፃፋቲ “ኔ ታሰ አሚዳ ኡባ ኔ ሱንላን ታ ኢሰታ ናጋዲሰ” ጌሰ።

ከቶይሳቶ ታካ ኢስታ ኣላሜዛ ቦላ ከታዲስ። 19 ኢስቲ ቱማፕ ኔስ ዲማ ኣስ ጊዲዳ ማላ ታኒካ ታና ኢስታ ጊሽ ዲማሳይስ።

20 “ኢስታ ቃላ ማርካቴላን ታና ኣማናይታ ጊሻራ ታ ኔና ዋሳይስ ኣቲን ታ ኔና ኢስታ ጊሽ ፃላላ ዋሲኬ። 21 ታ ዋሲዛይ ኢስቲ ዉሪካ ኢሲኖ ጊዳና ማላሳ። ታ ኣዋዉ! ቃሴካ ኔ ታናን ዲዛ ማላ ኢስቲካ ኑናን ጊዳና ማላኔ ኔ ታና ከቲዳይሳ ሃ ኣላሜይ ኣማናና ማላ ታ ኔና ዋሳይስ። 22 ኑኒ ኑ ጊደን ኢሲኖ ጊዲዳ ማላ ኢስቲካ ባ ጊደን ኢሲኖ ጊዳና ማላ ኔ ታስ ኢሚዳ ቦንቾዛ ታካ ኢስታስ ኢማዲስ። 23 ታ ኔና ዋሲዛይ ታ ኢስታን፤ ኔካ ታናን ጊዲዳ ማላ ኢስቲካ ኩሜል ኢሲኖ ጊዳና ማላሳ። ቃሴካ ኔኒ ታና ከቲዳ ማላኔ ታና ኔ ሲቁዳ ማላ ኢስታካ ኔ ሲቁዳይሳ ኣላሜ ኣሳይ ኤራናሳ።

24 “ታ ኣዋዉ! ኔ ታና ሃይሲ ኣላሜይ ሜጴታናፔ ካሴ ደሲዳ ጊሽ ኔ ታስ ኢሚዳ ታ ቦንቾዛ ኢስቲ ቤያና ማላ ሃይታ ኔ ታስ ኢሚዳይቲካ ታ ዲዛሶን ታናራ ዳና ማላ ደሳይስ። 25 ጳሎ ጊዲዳ ታ ኣዋዉ! ኔና ኣላሜይ ኤሪቤና፤ ታ ጊዲኮ ኔና ኤራይስ፤ ሃይቲካ ኔ ታና ከቲዳይሳ ኤሪዳ። 26 ኔ ታና ሲቁዳ ሲቆይ ኢስታን ጊዳና ማላኔ ታካ ኢስታን ጊዳና ማላ ኢስቲካ ኔና ኤራና ማላ ኦላዲስ። ቃሴካ ኢስቲ ኤራና ማላ ኦላና” ጊዳስ።

# 18

ዩሱሲ ባ ሞርኬታ ኩሼን ኣጲ ኢሜቲዲ ኦይኬቲዳስ  
(ማቶ 26:47-56፤ ማር 14:43-50፤ ሉቃ 22:47-53)

1 ሃሳ ዉርሲ ዮቲዳፔ ጉዬ ዩሱሲ ባና ካሊዛይታራ ቁዲሮኔ ጌቲቲዛ ሾባ ፒኒዲ ኣታኪልቲ ጊደ ጌሊዳስ። \* 2 ዩሱሲኔ ኢዛ ካሊዛይቲ ካሴካ ሄ ጋዴዪን ዳሮ ዋዴ ኢሲፌ ሸቁዛ ጊሽ ዩሱሳ ኣሌ ኢሚዳ ዩሁዳይ ሄ ጋዴዮ ካሴካ ኤሪስ። 3 ሃሳ ጊሽ ዩሁዳይ ዋታዳራታ፡ ቁሴታ ሃላቃታኔ ፋርሳቂታፔ ከቲቲ ዩዳ ኣሸካራታ ዉርሲ ካሌሌ ኤኪዲ ሄ ኢስቲ ሸቁዛሶ ዩዳስ። ኢዛራ ዩዳ ኣሳይ ፓኖሴ፡ ፆሞፔ፡ ማሻኔ ቶራ ኦይኪዲ ዩዳስ። 4 ዩሱሲ ባ ቦላ ጋካናይሳ ዉርሲ ኤሪዲ ዩዳ ኣሳኮ ቢዲ “ኦና ኮዬቲ?” ጊዳስ።

5 ኢስቲ ቃሴ “ናዚሬቲ ዩሱሳ ኮዮስ” ጊዳ። ኢዛካ ኢስታስ “ታኒ ኢዛ” ጊዳስ። ኢስታስ ኣሌ ኢሚዳ ዩሁዳይ ኢስታራ ኢሲፌ ኤቁዴስ። 6 ዩሱሲ “ታ ኢዛ” ጊዳ ማላ ኣሳቲ ጉዬ ጋንዲጋሪዲ

\* 18:1 ሾባ ጊዛይሳ ዙሊ ጌቲስ።

ቢታ ቦላ ኩንዲዳ። 7 ዩሱሲ ሃዲካ “አና ኮዬተ?” ገዲ ኦይቸን ኢስቲ ዛሪዲ “ናዚሬቴ ዩሱሳ ኮዮስ” ገዲ። 8 ኢዚካ ዛሪዲ “ታኒ ኢዛኮ! ሂስቲን እንቴ ኮዩዛይ ታና ገዲኮ ሃይቲ ቤቶ ቦቸፍቴ” ገዴስ። 9 ሄሲ ሃኒዳይ “ታ አዋጧ! ኔ ታስ ኢሚዳይታፔ ኢሳዴካ ታ ቶይሳቤይኬ” ገዲ ቃላይ ፖሌታና ማላሳ።

10 ሲሞና ጌቴቲዛ ጳጳርሲ ገላ ማሻ ኦይኪዳ ገሽ ማሻ ኮሆፔ ሾዲዲ ኢሲ ቁሴታ ሃላቃ አሽካራ ዲዛይሳ ሃይሌ ማሻራ ቃንዒ ዩገዴስ። ሄ አሽካራዛ ሱንሌ “ማልኮሳ” ጌቴቲስ። † 11 ዩሱሲ ቃሴ ጳጳርሳ “ኔ ማሻ ጌዴ ኮሆን ዛራ ጌልላ። አዋይ ታስ ኢሚዳ ዋዩ ኡሻ ታ ኡዮንታ አጋና ሚሳቲዜ?” ገዴስ። \*

**ዩሱሲ ቁሴታ ሃላቃ ሃና ሲንላ ሸቂዳስ**

12 ሄሳፌ ጉዬ ዋታዳራቲ፣ ኢስታ አዛዚዛይሲኔ አይሁዳታ አሽካራቲ ዩሱሳ ኦይኪዲ ቃቸዳ። 13 ኮይሮ ሄ ላይላን ቁሴታስ ሃላቃ ቃያፋ ቦሎ ሃናኮ ኤፊዳ። 14 ቃያፋይ “ዴሬ ገሽ ኢሳዴይ ሃይቂኮ ሎዎ” ገዲ አይሁዳታ ዳናታ ካሴ ዘሪዳዴ። \*

**ጳጳርሲ ዩሱሳ ካዲዴስ**

(ማቶ 26:69-70፤ ማር 14:66-68፤ ሉቃ 22:55-57)

15 ሲሞና ጌቴቲዛ ጳጳርሲኔ ዩሱሳ ካሊዛይታፔ ኢሳዴይ ዩሱሳ ካሊዳ። ሄሳዴይ ቁሴታ ሃላቃ አቻን ኬሂ ኤሬቲዳዴ። ሄሳ ገሽ ዩሱሳራ ኢሲፌ ቁሴታ ሃላቃዛ ገቤ ጌሊዴስ። 16 ጳጳርሲ ገዲኮ ፔንጌፌ ካሬ ባጋራ ኤቂዴስ። ቁሴታ ሃላቃ አቻን ኬሂ ኤሬቲዲ ዩሱሳ ካሊዛይሲ ዩዲኔ ፔንጌን ዲዛ ጋራዴያ ጳጳርሳ ገቤ ገዶ ጌልላና ማላ ዮቲዲ ጳጳርሳ ኤኪ ጌሊዴስ። 17 ፔንጌ ናገዛ ጋራዴያ ጳጳርሳ “ኔካ ሄሳ አዴዛ ካሊዛ አሳታፔ ኢሳ ዲኪ?” ጋዲስ። ኢዚ ቃሴ “ታኒ ኢዛ ካሊዛይ ገዲኪ” ገዴስ።

18 ዋዴይ ሜገዛ ዋዴ ገዲዳ ገሽ ኦሳንቻቲኔ አሽካራቲ ታማ ኤሌዲ ኤቆን ሆዔቴስ። ጳጳርሲካ ኢስታራ ኤቂዲ ሆዔስ።

**ቁሴታ ሃላቃፔ ዩሱሳስ ሸቂዳ ኦይሾ**

(ማቶ 26:59-66፤ ማር 14:55-64፤ ሉቃ 22:66-71)

19 ሄ ዋዴ ቁሴታ ሃላቃይ ዩሱሳ ኢዛ ካሊዛይታ ገሺኔ ኢዚ ታማርሲዳ ቲሚርቲ ገሽ ኦይቸዴስ። 20 ዩሱሲካ ኢዛስ “ታ አሳ

† 18:10 ኮሆፔ ገዛይሳ ኢሲ ኢሲ ጋሞ አሳይ ሾሆፔ ገሴ። \* 18:11 ማቶ 26:39፤ ማር 14:36፤ ሉቃ 22:42 \* 18:14 ዮሃ 11:49-50

ኡባሰ ቆንጩን የታዲሰ፤ አይሁዳቲ ሸቁዛ ኢስታ ዋሳ ኩላን ጊዲንካ ያሳ ኩላን ታማርሳዲሰ፤ ታ ቆታን ሃሳዪዲዚ አይኮይካ ዳና። 21 ሂስቲን ኔ ታና ኦይቸዛይ ኣዜ? ታ የቲሺን ሲዪዳይታ ኦይቻ፤ ታ የቲዳይሳ ኢስቲ ኤሬቴሰ” ጊዳሰ።

22 ዬሱሲ ሄሳ ጊዳ ማላ ሄን ኤቁዳ አሸካራታፔ ኢሶይ “ቄሴታ ሃላቃሰ ሃይሳላ ዋሰታ ዛራይ” ጊሼ ዬሱሳ ሻጋላን ባቃ ሻዪዳሰ።

23 ዬሱሲካ ዛሪዲ “ታ ኢታ ሃሳዪዳ ጊዲኮ ኣኔ ታ ጎይሳ ኔ ማርካታ፤ ታ የቲዳይ ሊኬ ጊዲኮ ታና ኣዛሰ ባቃይ?” ጊዳሰ።

24 ሄሳፌ ጉዬ ሃናይ ዬሱሳ ቃቸዳ ማላ ቄሴታ ሃላቃ ቃያፋኮ ዬዲዳሰ።

**ጳፅርሲ ዬሱሳ ዛሪዲ ካዲዳሰ**  
(ማቶ 26:71-75፤ ማር 14:69-72፤ ሉቃ 22:58-62)

25 ሄ ዋዴ ሲሞና ጌቴቲዛ ጳፅርሲ ኤቁዲ ታማ ሆዲሺን ሃንኮ ኣሳይ ኢዛ ሃይሶ! ኔ ዬሱሳ ካሊዛይታፔ ኢሳ ዲኪ?” ጊዳ። ኢዚካ ዛሪዲ “ታ ኢዛ ካሊዛዴ ዲኬ” ጊዲ ካዲዳሰ።

26 ካሴ ጳፅርሲ ኢዛ ሃይሳ ቃንጺዳይሳ ዳቦይ ቄሴታ ሃላቃ ኣሸካራታፔ ኢሶይ “ዋና ታ ኔና ኣታኪልቴሶን ኢስታራ ዲሺን ቤያቤኪና?” ጊዳሰ።

27 ጳፅርሲ ቃሴካ ካዲዳሰ፤ ሄራካ ኩቶይ ዋሲዳሰ።

**ዬሱሲ ጲላዳሳ ሲንላ ሸቁዳሰ**  
(ማቶ 27:1-2፤11-14፤ ማር 15:1-5፤ ሉቃ 23:1-5)

28 ሄሳፌ ጉዬ ዬሱሳ ቃያፋ ኩላፌ ዴሬ ኣይሲዛ ካዋዛ ጊቤ ማላዶ ዋንታራ ኤኪ ቢዳ። ኣይሁዳ ኣሳሰ ፓዚጋ ባዓሌ ዶርሳ ኣሾ ሚዛ ዋዴ ጊዲዳ ጊሽ ባና ቱኒሶንታ ማላ ጊዲ ማላዶራ ዴሬ ኣይሲዛይሳ ጊቤ ጊዶ ጌሊቤቴና። † 29 ሄሳ ጊሽ ጲላዳሳ ጌዴ ኢስታኮ ኩዚዲ “ሃይሳ ኣዴዛ ኢንቴ ኣዛሰ ሞቴቲ?” ጊዲ ኦይቸዳሰ።

30 ኢስቲ ቃሴ “ሃይሲ ኣዴዚ ኢታ ኦሶንታዴ ጊዲዳኮ ኑ ኢዛ ኔሰ ኣላ ኢሞኮሺን” ጊዳ

31 ጲላዳሳካ “ኢንቴ ኢዛ ኤኪ ቢዲ ኢንቴ ዋጋ ማላ ፒርዲቴ” ጊዳሰ። ኣይሁዳታ ኣይሲዛይቲ ቃሴ ዛሪዲ “ኑ ኣሲ ዋቋና ማላ ኑሰ ፒቃዴይ ኢሜቲቤና” ጊዳሰ።

---

† 18:28 ፓዚጋ ገዛይሲ ያሳ ኪታንቻይ ኢሰራዔሌ ኣሳታ ዋዴንታ ኣሺን ጊብጻ ኣሳ ኪታንቻይ ዋዴዳ ጋሶን ኢሰራዔሌ ኣሳይ ያሳ ቦንቾ ጊሽ ቦንቸዛ ባዓሌ።

32 ሄሲካ ሃሊዳይ ዩሱሲ ካሴ ኢስታሰ ኢዚ ዋሊ ሃይቃናኮኔ የቲዳ ቃላይ ፖሌታና ገሻሳ። \*

33 ጲላዖሲ ቃሴካ ጉዬ ገቤ ገዶ ገሌዲ ዩሱሳ ጄይገሲዲ “ኔ አይሁዳታ ካዎ?” ገዲ ኦይቸዴሰ።

34 ዩሱሲካ ዛሪዲ “ኔ ሄሳ ገዛይ ኔፔዬ? ዎይኮ ሃራ አሳቲ ታ ገሽ ኔሰ የቲዳ?” ገዴሰ። 35 ጲላዖሲካ “ታ አይሁዳ አሴ? ኔና ታሰ አሉ አሚዳይቲ ኔ ባጋታኔ ቄሴታ ሃላቃታኮ፤ ኔ አይ ኦላዲ?” ገዴሰ።

36 ዩሱሲካ “ታ ካዎቴሉ ሃይሳ ሃ አላሜ ቦላ ገዴና። ታ ካዎቴሉ ሃይሳ ሃ አላሜ ቦላ ገዲዳኮ አይሁዳታ ዳናታ ኩሼን ታ ኩንደንታ ማላ ታ አሽካራቲ ታ ገሽ ኦሌታናኮሺን ታ ካዎቴሉ ገዲኮ ሃ አላሜ ቦላ ገዴና” ገዴሰ። 37 ጲላዖሲካ “ሂሰቲን ኔ ካዎ?” ገዴሰ፤ ዩሱሲ ቃሴ “ታኒ ኔ ገዴይሳ ማላ ኤ ካዎ፤ ታ ዩሌቲዳይኔ ሃ ቢታ ዩዳይ ቱማ ገሽ ማርካታናሳ። ቱማፔ ገዲዳይ ዉሪ ታ ቃላ ሲዩሰ” ገዴሰ።

38 ጲላዖሲካ “ቱማይ አዜ?” ገዴሰ። ሄሳፌ ጉዬ ጲላዖሲ ናሞዓንሎ አይሁዳታኮ ኬዚዲ “ታ ኢዛ ቦላ አይኮ ባላ ቤያቤኬ። 39 ገዶ አቲን ካሴካ ታ ኢንቴሰ ፓዚጋ ባዓሌ ጋላሰ ኢሲ ቃሾ አሲ ቢርሺዛ ማላ ሃይሳ አይሁዳታ ካዎ ኢንቴሰ ቢርሻና ማላ ኮዬቲ?” ገዴሰ።

40 ኢሰቲ ገዲኮ “ኑሰ ባርባኔ ቢርሻ አቲን ሃይሳ ዴና!” ገዲ ዋሲዳ። ባርባኔይ ባ ሁዔሰ ፓንጋ።

# 19

ዎታዳራቲ ዩሱሳ ቦላ ቁፏ ካዒዳ  
(ማቶ 27:27-32፤ ማር 15:15-21)

1 ሄሳፌ ጉዬ ጲላዖሲ ዩሱሳ ኤፊዲ ጋራፊሲዴሰ።  
2 ዎታዳራቲካ አጉንላ ዛዉዴ ፃፂዲ ዩሱሳ ሁዔን ዎሉዳ፤ ዘዖ ካባካ ማይዚዳ። 3 ኢዛኮ ሸቄ ሸቄዲ “አይሁዳ ካዎ ሳር! ሳር!” ገ ገዲ ኢዛ ሻጋላን ባቁዳ።

4 ጲላዖሲ ቃሴካ ካሬ ኬሲዲ “ሂኮ ታ ኢዛ ቦላ አይኮ ሞሮካ ዴሞንታይሳ ኢንቴ ኤራና ማላ ታ ኢዛ ኢንቴሰ ሃ ካሬ ኬሳና” ገዴሰ። 5 ሄሳ ገሽ ዩሱሲ አጉንላ ዛዉዴ ሁዔን ዎሉ ኤኪዲኔ ዘዖ ካባ ማይዒዲ ካሬ ኬዚዴሰ። ጲላዖሲካ ኢስታሰ “ሂኮ አዴዚ ሃይሲቸ!” ገዴሰ።

\* 18:32 የሃ 3:14፤ 12:32

6 ቄሴታ ሃላቃቲኔ ኢስታ አሽካራቲ ዩሱሳ በዩዲ “ኔ ኢዛ ካቃ! ካቃ!” ጊሼ ዋሲዳ።

ጲላዖሲ ቃሴ “ታ ታ ባጋራ ኢዛ ቦላ ኢሲ ሞሮካ ዳማቤኬ፤ ኮይኮ አንቲ ኤፊዲ ካቁቲ” ጊዴሰ።

7 እይሁዳ አሳቲ ቃሴ “ኑስ ዋጋይ ዳስ፤ ሃይሲ አዳዚ ባና ያሳ ና ጊዛ ጊሽ ኑ ዋጋ ማላ ኢዛሰ ሃይቆይ ቤሴሰ” ጊዳ።

8 ጲላዖሲ ሄሳ ኢስቲ ጊዛይሳ ሲይዲ ዳሮ ባቢዴሰ። 9 ጌዴ ጊቤ ጌሊዲ ዩሱሳ “ኔ አዋፔ ያዲ?” ጊዲ ኦይቺዴሰ። ዩሱሲ ቃሴ ኢዛሰ እይ ዛሮካ አሚቤና።

10 ሄሳ ጊሽ ጲላዖሲ “ኔ ታሰ ዮቲኪ? ታ ኔና ካቃናሰ ዎይኮ ቢርሻ ዩዳናሰ ጎዳቲሉ ታሰ ዲዛይሳ ኤሪኪ?” ጊዴሰ።

11 ዩሱሲካ ኢዛሰ ዛሪዲ “ሼኔይ ኔሰ ያሳፌ አሚቶንታኮ ኔሰ ታ ቦላ እይ ጎዳቲሉካ ዳናሺን፤ ጊዶ አቲን ታና ኔሰ አሉ አሚዳዳ ቦላ ጊታ ናጋራይ ዳሰ” ጊዴሰ።

**ዩሱሳ ቦላ ሃይቆ ፒርዳይ ፒርዳቲዴሰ**  
(ማቶ 27:15-31፤ ማር 15:6-20፤ ሉቃ 23:13-25)

12 ጲላዖሲ ሄሳ ዩሱሳ ሃሳያ ሲዩዳፔ ጉዬ ኢዛ ቢርሺ ዩዳና ኮዩዴሰ ሺን እይሁዳታሰ ባቢዳ ጊሽ ኢስቲ “ኔ ሃይሳ አዳዛ ቢርሺኮ ኦሮሜ ካዎ ቄሳሬ ባጋ ጊዳካ፤ ጋሶይካ ባና ባርካ ካዎሉዛዳይ ወሪ ቄሳሬሰ ሞርኬ” ጊሼ ወሪካ ዋሲዳ።

13 ጲላዖሲ ሄሳ ሲዩዳ ማላ ዩሱሳ ጌዴ ካሬ ኬሲዲ “ሎቻ ሹቻ” ጌቲቲዛ ሶን ፒርዳ ዎምቦራን ኡቲዴሰ። ሄ ፒርዳሶይ እይሁዳታ ቃላራ “ጋባታ” ጌቲቲሰ። 14 ሄ ዎዴ ጋዴይ እሲ ፓዚጋ ባዓሌሰ ጊቲቲዛ ጋላሳ። ዎዴይካ ጋላሳፌ ኡሱቸን ሳቲ ማላ ጊዲዴሰ። ሄ ዎዴ ጲላዖሲ እይሁዳታ “ሄኮ አንቲ ካዎይ ሃይሲቻ!” ጊዴሰ።

15 ጊዶ አቲን ኢስቲ ቃሰ “ጌዴ ዲጋ! ጌዴ ዲጋ! ካቃ!” ጊሼ ዋሲዳ። ጲላዖሲካ “ታ አንቲ ካዎ ካቆ?” ጊዴሰ። ቄሴታ ሃላቃቲ ዛሪዲ “ኑስ ቄሳሬፔ ሃራ ካዎይ ዳና” ጊዳ።

16 ሄሳፌ ሲሚዲ ጲላዖሲ ዩሱሳ ካቃና ማላ ኢስታሰ አሉ አሚዴሰ። ኢሰቲካ ዩሱሳ ኦይኪ ኤኪ ኤፊዳ።

**ዩሱሲ ካቁቲዴሰ**

17 ሄሳፌ ጉዬ ዩሱሲ ባ ካቁታና ማሰቃሌዛ ቶኪዲ “አሳ ሁዔ ጉጌ” ጌቲቲዛሰ ኬዚዴሰ። ሄሶይ እይሁዳታ ቃላራ “ጎልጎታ” ጌቲቲሰ። 18 ኢዛ ሄን ካቁዳ። ዩሱሳ ጊዶ ጌልሉዲ ሃራ ናምዑ አሳታ ኢዛሶ ሃዲሪሳራኔ ኡሻቻራ ካቁዳ።



19 ጲላጎሲ “ናዚሬቴ ዬሱሲ ኣይሁዳታ ካዎ” ጊዛ ቃላ ፃፊዲ ኢዛ ማሰቃሌ ቦላ ኢዛስ ሁዔሶራ ቃጲዴስ። 20 ዬሱሲ ካቁተዳሶይ ካታማስ ማታ ጊዲዳ ገሽ ዳር ኣይሁዳ ኣሳይ ጲላጎሲ ፃፊዳይሳ ናቤቢዴስ። ፃፊተዳይሲካ ኣይሁዳታ ቃላራ፣ ላተኔ ጌቴተዛ ቃላራኔ ገሪኬ ቃላራ። 21 ኣይሁዳታ ቁሴታ ሃላቃተ ጲላጎሳ “ኔ ኢዛ ኣይሁዳታ ካዎ” ጋዳ ፃፎ፡፡ ጊዶ ኣተን “ሃይሲ ኣዴዚ ባና ታ ኣይሁዳታ ካዎ ጊዴስ’ ጋዳ ፃፋ” ጊዳ።

22 ጲላጎሲ ቃስ “ታ ፃፊዳይሳ ፃፋዲስ” ጊዴስ። 23 ዎታዳራተ ዬሱሳ ካቁዳፔ ጉዬ ኢዛ ማይዎዛ ኤኪዲ ዎታዳራታ ኢሳ ኢሳ ጋካና ማላ ኦይዲ ኬሲ ሻኬሬሊዳ። ጋርሳራ ማይዒዛ ማይዎዛካ ሃሳላ ሻኬሬሊዳ። ጊዶ ኣተን ጊዶራ ማይዒዛ ማይዎዚ ሲኬቶንታ ፑዴፔ ዲጌ ጋካናስ ጮ ዬዳ ዴስ። 24 ሃሳ ገሽ ዎታዳራተ ባ ጊዶን “ገሻን ኦና ጋካናኮኔ ኤራና ማላ ኢዛ ቦላ ሳማ ዬጋና ኣተን ዳኮኮ” ጊዳ። ሃሲካ ሃኒዳይ ካሴ

“ታ ማይዎ ኢስተ ገሽተ ኤኪዳ፣  
 ታ ቦላራ ማይዒዛ ማይዎዛ ቦላ ሳማ ዬጊዳ”  
 ጌቴተዳ ጌሻ ማፃፋ ቃላይ ፖሌታና ማላሳ። ዎታዳራተካ ሃሳ ኦሊዳ።

25 ዬሱሳ ማሰቃሌ ኣቻን ኢዛ ኣዬያኔ ኣዬዪ ሚቹያ ቃሊዮጳ ማቻ ማራማኔ ሚግ ዳሌ ጌቴተዛሶፔ ዪዳ ማራማ ሃን ኤቁዳ።

26 ዬሱሲ ባ ኣዬዮኔ ኢዚ ሰቁዛ ኢዛ ካሊዛይሲ ባ ኣቻን ኤቁዳይታ ቤዪዲ፣ ባ ኣዬዮ “ኣዬ! ኔ ናዛ ሃሳ ቤያ” ጊዴስ።

27 ሃሳፌ ካሌሊዲ ባና ካሊዛይሳ “ኔ ኣዮ ሂኖ ቤያ” ጊዴስ። ሂኖ ሃ ሳቴይፔ ሲሚን ሃ ኢዛ ካሊዛይሲ ኣዬዮ ባሶ ኤፊዴስ።

**ዬሱሲ ሃይቁዴስ**  
 (ማቶ 27:45-56፤ ማር 15:33-41፤ ሉቃ 23:44-49)

28 ሃሳፌ ጉዬ ዬሱሲ ሃዒ ዉሪካ ፖሌተዳይሳ ኤሪዲ ጌሻ ማፃፋን ፃፊተዳይሲ ፖሌታና ማላ “ታና ሳሚስ” ጊዴስ። \*

29 ሃን ጋዳን ጫላ ጳንቁዳ ኡሺ ኩሚ ኡተዳ ኢሲ ፃር ማላይ ዴስ። ሃሳ ገሽ ሃን ጋዳን ዲዛይተ ሃ ጫላ ኡሻ ዛንቫ ሚሳተዛ ሳፍናጌ ጌቴተዛይሳራ ሂሶጴ ጌቴተዛ ሚሳ ፃራን ቃጲዲ ኢዛ ዲናኮ ሺሺዳ። 30 ዬሱሲ ሃ ጫላ ኡሻ ፀንፂ ፃሊዲ “ፖሌተዴስ!” ጊዴስ። ባ ሁዔ ዲጌ ዚቁሲዲ ሺምፖ ኬዚዴስ።

31 ሃሳፌ ጉዬ ኣይሁዳታ ዳናተ ካቁተዳ ኣሳታ ሚቁጻ ዎዲራፔ ሚንሊዲ ኢስተ ኢዛ ማሰቃሌ ቦላፌ ዎላና ማላ ጲላጎሳ ዎሲዳ።

\* 19:28 ማዛ 69:21፤ 22:15

ኢስቲ ሄሳ ኦሊዳይ አይሁዳቲ ሳምባታስ ገቢቲዛ ጋላስ ገዲዳ ገሺኔ ሄ ሳምባታይካ ዳሮ ገታ ባዓሌ ገዲዳ ገሽ ሳምባታ ጋላስ አሃይ ማስቃሌ ቦላ ጋምዖንታ ማላ ኮይዳ ገሻሳ። 32 ሄሳ ገሽ ዎታዳራቲ ቢዲ ዩሱሳራ ካቁቲዳ አሳታ ሜቄል ዎዲራፔ ዎዲራፔ ሜንሉዳ። 33 ኢስቲ ዩሱሳራ ቢን ኢዚ ካሴቲዲኔ ሃይቄዳይሳ ቤዩዲ ኢዛ ዎዲራ ሜቄል ሜንሉቤቴና። 34 ገደ አቲን ዎታዳራታ ገደፌ ኢሳይይ ቶራራ ኢዛ ሚሌን ጨዲን ሄራካ ሱላኔ ሃላ ጉኪዳስ። 35 ሄሳ ቤዩዳይይ ኢንቴ ኢዛን አማናና ማላ ማርካቲዳስ። ኢዛ ማርካይካ ቱማ። ኢዚ ዮቲዛይካ ቱሙ ገዲዳይሳ ኢዚ ኤሬስ። 36 ሄሰካ ሃኒዳይ “ኢዛ ሜቄላፌ ኢሲናካ ሜቄኩ” ጌቲቲዳ ጌሻ ማዓፋ ቃላይ ፖሌታናሳ። \* 37 ቃሴካ ጌሻ ማዓፋን ሃራሶን “ኢስቲ ባ ጨዲዳይ ቤያና” ጌስ።

ዩሱሲ ሞጌቲዳስ  
(ማቶ 27:57-61፤ ማር 15:42-47፤ ሉቃ 23:50-56)

38 አይሁዳታ ዳናታ ባቢዲ ቆታን ዩሱሳ ካሊዛ አርማቲያሳ ጌቲቲዛሶፔ ዩዳ ዮሴፌይ ዩሱሳ አሃ ኤካናስ ጰላጾሳ ዎሲን ጰላጾሲካ ኢዛስ ኤሮ ገዳስ። ሄሳ ገሽ ዮሴፌይ ቢዲ ዩሱሳ አሃ ኤኪዳስ። 39 ካሴ ዩሱሳራ ቃማራ ዩዳ ኒቆዲሞሲካ ባጋ ኪሎ ገዲዛ ካርቤኔ ጎዳሪ ኦላራ ዋላኬቲዳ ሺቶ ኤኪ ዩዳስ። 40 ሄ ናምቡ አሳቲ ዩሱሳ አሃ ኤኪዲ አይሁዳቲ አሃ ፃዲዛ ማላ ሺቶ ፑኪዲ ለዔ ማይዖራ ፃዲዳ። 41 ዩሱሲ ካቁቲዳሶን ኢሲ አታኪልቲሶይ ዳስ። ሄ አታኪልቲዛሶን ኦኒካ ሞጌቶንታ ኦራላ ዲፎይ ዳስ። 42 አይሁዳታ ሳምባታስ ገቢቲዛ ጋላስ ገዲዳ ገሺኔ ዲፎይካ ማታን ዲዛ ገሽ ዩሱሳ አሃ ሄን ሞገዳ።

## 20

ዩሱሲ ሃይቆፔ ዳንዲዳስ  
(ማቶ 28:1-10፤ ማር 16:1-8፤ ሉቃ 24:1-12)

1 ዎጋ ጋላስ ዎንታ ማላዶ ቡሮ ባዘይ ዘዒሺን ማግዳሌ ማራማ ዩሱሳ ዲፎኮ ባዲስ። ኢዛ ሄ ጋኪሺን ካሴ ዩሱሳ ዲፎ ኢዛራ ጎርዲዳ ሹቻይ ዲፎዛ ዲናፔ ዳንዲዲ ጌንዳሪዳይሳ ቤያዲስ። 2 ሄሳ ገሽ ኢዛ ዩሱሳ ካሊዛይታፔ ሲሞና ጌቲቲዛ ጰፅሮሳኮ ዩሱሲ ደሲዛ ሃንኮ ኢዛ ካሊዛይሳኮ ዎፃ ባዳ “ጎዳ ዲፎፔ ኬሲ ኤኪዲ አዎን ዎላዳኮኔ ኑ ኤሮኮ” ጋዲስ።

\* 19:36 ኬሳ 12:46፤ ታይ 9:12፤ ማዛ 34:20

3 ሄራካ ጳጳርሲኔ ዩሱሳ ካሊዛ ሂንኮ ኢሶይ ከዚዲ ጌዴ ዲፎይ ዲዛሶ ቢዳ። 4 ናምዓይካ ኢሲፌ ዋዲዳ። ገዶ ኣተን ዩሱሳ ካሊዛ ሂንኮይሲ ጳጳርሳፕ ፕላቲ ዋዲዳ ካሴቲ ዲፎይ ዲዛሶ ጋኪዳ። 5 ዲፎዛ ሆኪ ያሊዲ ኣሃይ ኢዛን ፃፂቲ ወይይይ ፃላ ዲዛይሳ ቤዩዳ። ገዶ ኣተን ጌዴ ዲፎዛ ገዶ ጌሊቤና። 6 ሲሞና ጌቲቲዛ ጳጳርሲካ ኢዛ ካሊ ጋኪዲ ዲፎዛ ገዶ ጌሊዳ። ኣሃይ ኢዛን ፃፂቲዳ ጫርቃይ ሂን ዲዛይሳ ቤዩዳ። 7 ዩሱሳ ሆዔይ ፃፂቲዳ ጫርቃይ ሂን ፃላ ጫርቃታራ ገዶንታ ዲማ ሃራሶን ፃፂቲ ዲዛይሳ ቤዩዳ። 8 ኮይርቲ ጋኪዳ ዩሱሳ ካሊዛይሲካ ዲፎዛ ገዶ ጌሊ ቤዩዲ ኣማኒዳ። 9 ጋሶይካ “ኢዚ ሃይቆፕ ዴንዳና ቤሴስ” ገዛ ማፃፋ ቃላ ኢሰቲ ቡር ሃሳዩቤቴና። 10 ሄሳፌ ጉዩ ናምዓቲካ ሲሚዲ ባሶ ባሶ ቢዳ።

**ማግዳሌ ማራማ ዩሱሳ ቤያዲስ**  
(ማር 16:9-11)

11 ማግዳሌ ማራማ ዩካሽ ዩሱሳ ዲፎፕ ካሬራ ኤቃዳ ሆካ ዲፎዛ ገዶ ያላዲስ። 12 ዩሱሳ ኣሃይ ዲዛሶን ቦሳ ማይያ ማይዒዳ ናምዑ ከታንቻታፕ ኢሶይ ሆዔሶን ኢሶይ ቶሆሶን ኡቲዳይታ ቤያዲስ። 13 ኢሰቲካ ማራማ “ሃኔ ማጫሳዩ! ኣዛሰ ዩካይ?” ገዳ። ኢዛካ “ኢሰቲ ታ ጎዳ ኤፊዲ ኣዋን ዋሊዳኮኔ ታ ኤሪኮ” ጋዲስ።

14 ኢዛ ሂኖ ጋዳ ጉዩ ዩዩሽን ዩሱሲ ኤቁዳይሳ ደማዲስ ሽን ኢዚ ዩሱሳ ገዲዳይሳ ኤራቤይኩ። 15 ዩሱሲ ኢዛ “ሃኔ ማጫሳዩ! ኣዛሰ ዩካይ? ቃሴ ኦና ኮያይ?” ገዳስ፤ ኢዛካ ኢዚስ ኣታከልቲ ናገዛዳ ሚሳቲን “ጎዳ! ኔ ኤኪዳ ገዲኮ ኔ ዋሊዳሶ ታሰ ዮታርከ፤ ታ ኢዛ ታሰ ኤካና” ጋዲስ።

16 ዩሱሲ ኢዛ “ማራማ!” ገዳስ፤ ኢዛካ ጌዴ ኢዛኮ ሲማዳ ኣይሁዳታ ቃላራ “ሬቡኔ!” ጋዲስ፤ ሄሳ ቢርሼሊ “ኣሰታማራ!” ጉሳ።

17 ዩሱሲ ቃስ “ታ ቡር ፑዴ ታ ኣዋኮ ከዛቤኮ፤ ታና ቦቾፋ፤ ገዶ ኣተን ኔ ሃዒ ታ ኣሻታኮ ባዳ ‘ታኒ ታ ኣዋኮኔ ኢንቲ ኣዋኮ፤ ታ ያሳኮኔ ኢንቲ ያሳኮ ከዛና ገዳስ’ ጋዳ ኢሰታሰ ዮታ” ገዳስ። 18 ሄሳ ገሽ ማግዳሌ ማራማ ዩሱሳ ካሊዛይታኮ ባዳ ኢዛ ዩሱሳ ቤዩዳይሳኔ ኢዚ ኢዚስ ዮቲዳይሳ ኢሰታሰ ዮታዲስ።

**ዩሱሲ ባና ካሊዛይታሰ ቤቲዳስ**  
(ማቶ 28:16-20፤ ማር 16:14-18፤ ሉቃ 24:36-49)

19 ሄ ጋላስ ዋጋ ኦማርስ ዩሱፍ ካሊዛይቲ ኣይሁዳታ ዳናታስ ባቢዲ ካሬ ባ ቦላ ጎርዲዲ ኩላ ጊደን ሸቆን ዲሺን ካሬይ ደዩቶንታ ዩሱሲ ኢዛ ካሊዛይቲ ሸቆ ዲዛ ኩላ ጌሊዳስ፤ ኢስታ ጊደን ኤቁዲ “ሳሮይ ኢንቴስ ጊደ!” ጊዳስ። 20 ሄሳ ጊ ሲሚዲ ባ ኩሸታኔ ባ ሚሌ ኢስታ ቤሲዳስ፤ ኢዛ ካሊዛይቲካ ጎዳ ቤዩዲ ኬሄ ኡፋዩቲዳ።

21 ሄሳፌ ጉዬ ቃሴካ ዩሱሲ ኢስታ “ኢንቴስ ሳሮይ ጊደ! ታ ኣዋይ ታና ከቲዳ ማላ ታካ ኢንቴና ከታይስ” ጊዳስ። 22 ሄሳ ጊ ሲሚዲ ኢስታ ቦላ ኡፋ ጊዲ “ኢንቴ ያሎ ኣያና ኤከቴ። 23 ኢንቴ ኣሳ ናጋራ ኣቶ ጊኮ ኢስታስ ኣቶ ጌቴታና፤ ኢንቴ ኣሳ ናጋራ ኣቶ ጎንታ ኢዳኮ ቃስ ኢንቴስ ኣቶ ጌቴቴና” ጊዳስ። \*

**ዩሱፍን ቶማሳ**

24 ዩሱሲ ባና ካሊዛይታኮ ዩዳ ዋዴ ታማኔ ናዋዋታፔ ኢሶይ ዲዲሞሳ ጌቴቲዛ ቶማሲ ኢስታራ ዳና። 25 ሄሳ ጊሽ ሃንኮ ዩሱፍ ካሊዛይቲ ቶማሳ “ኑ ጎዳ ቤይደስ” ጊዳ። ቶማሲ ቃስ “ሚሲማሬን ጫዳቲዳ ኢዛ ኩሸታ ታኒ ታ ኣይፌራ ቤዮንታ ዳሼ፣ ቃሴካ ታ ቢራጼ ሚሲማሬይ ጌሊዳሶን ጌልላ ያሎንታ ዳሼኔ ታ ኩሸ ኢዛ ሚሌ ማዲንላን ጌልላ ያሎንታ ዳሼ ኣማኒኬ” ጊዳስ።

26 ሄሳፌ ካሊን ኦሱፑን ጋላሳፌ ጉዬ ኢዛ ካሊዛይቲ ቃሴካ ኩላ ጊደን ዲሺን፤ ቶማስካ ኢስታራ ኢሲፌ ዲሺን፤ ካሬይካ ጎርዳን ዲሺን ዩሱሲ ዩዲ ኢስታ ጊደን ኤቁዲ “ሳሮይ ኢንቴስ ጊደ!” ጊዳስ። 27 ሄሳፌ ጉዬ ቶማሳ “ኔ ቢራጼ ሃ ኤሃዳ ታ ኩሸታ ቤያ። ኔ ኩሸ ሃ ኤሃዳ ታ ሚሌን ጌልላ ኣማና ኣቲን ኣማኖንታዳ ጊደፓ” ጊዳስ።

28 ቶማሲ “ታ ጎደ! ታ ፆሶ!” ጊዳስ።

29 ዩሱሲካ ቶማሳ “ኔኒ ታና ቤዩዳ ጊሽ ኣማናዳሳ፤ ታና ቤዮንታ ኣማኒዛይቲ ጊዲኮ ኢስቲ ኣንጃቲዳይታ” ጊዳስ።

30 ሃይሳ ማፃፋን ፃፌቶንታ ዳሮ ማላታታ ባና ካሊዛይታ ሲንላን ዩሱሲ ኦሲዳስ። 31 ጊደ ኣቲን ዩሱሲ ኢዚ ማሲሄ፣ ፆሳ ና ጊዲዳይሳ ኢንቴ ኤራና ማላኔ ኢንቴ ኢዛ ሰንላን ኣማኒዲ ዴፆ ዴማና ማላ ሃይሲ ፃፌቲዳስ።

# 21

## ዩሱሲ ባና ካሊዛይታፔ ላፑናታስ ቤቲዳስ

\* 20:23 ማቶ 16:19፤ 18:18

1 ሃሳፌ ጉዬ ዩሱሲ ጸቢራዶሴ አባ አቻን ባና ካሊዛይታሰ ቃሴካ ቤተዳሰ። 2 ሲሞና ጌቲቲዛ ጳጳርሲ፣ ዲዲሞሳ ጌቲቲዛ ቶማሲ፣ ጋሊላ ቃና አሰ ጊዲዳ ናቲናዔሌይ፣ ዛቢደሳ ናይቲካ ዩሱሳ ካሊዛይታ፣ ሃራ ናሞዓቲካ ወሪ ኢሲፌ ዲሺን 3 ሲሞና ጌቲቲዛ ጳጳርሲ ኢሰታሰ “ታ ሞሌ ኦይካና ባይሰ” ጊዳሰ፤ ኢሰቲካ ኢዛሰ “ኦካ ኔናራ ባና” ጊዳ። ኢዛራ ኬዚ ቢዲ ዋጎሎን ጌሊዳ ሺን ሄ ጋላስ ኦማርሰ ኢሲ ሞሌካ ኦይኪቤቴና። \*

4 ጋይይ ዋንቲሺን ዩሱሲ አባ አቻን ኤቁዳሰ፤ ኢዛ ካሊዛይቲ ቃሰ ኢዚ ዩሱሳ ጊዲዳይሳ ኤሪቤቴና። 5 ዩሱሲ ኢሰታ “ናይቶ ሞሌይ ዲዜ?” ጊዳሰ፤ ኢሰቲካ “ኣይኮይካ ባሞ” ጊዳ።

6 ኢዚካ “ጌቲዛ ዋጎሎዛ፣ ኡሻቻ ባጋራ አባን ዩጌቲ፤ ኢንቴ ዳማና” ጊዳ ገሽ ጌቲዛ አባ ጊዶ ዩጌዳኔ ዳር ሞሌይ ኦይኮቲዳ ገሽ ጌቲዛ ሞሌዛራ ጎቻና ዳንዳይቤቴና። \*

7 ሃሳ ዋዳ ዩሱሳ ካሊዛይታ፣ ኢዚ ሰቁዛ ኢሶይ ጳጳርሳሰ “ሄሲ ጎዳኮ!” ጊዳሰ። ሲሞና ጌቲቲዛ ጳጳርሲ “ሄሲ ጎዳኮ!” ጊዛ ቃላ ሲዪዳ ማላ ካሴ ኦሶ ዲጎፎ ጊዲ ማይዖ ቃሪ ዋሊዲ ካሎ ዲዛ ገሽ ሄራካ ማይዖ ኤኪ ማይዲዲ አባ ጊዶ ጉፒ ጌሊዳሰ። 8 ዩሱሳ ካሊዛ ሃንኮይቲ ቃሰ ቢታፌ ፃፎ ማትሬ ማላ ሃኪ ዲዛ ገሽ ሞሌይ ኩሚ ዲዛ ጌቲዛ ጎቹ ኤኪዲ ዋጎሎራ ጋኪዳ። 9 ኢሰቲ ዋጎሎዛ፣ ዋጲሺን ሞሌይ ኢዛ ቦላ ዲዛ ቦንቆ ታማኔ ኡኬሊ ቤዪዳ።

10 ዩሱሲ ኢሰታ “ሃዒ ኢንቴ ኦይኪዳ ሞሌዛ፣ ኣኔ ሃ ኤኪ ዪቴ” ጊዳሰ።

11 ሃሳ ገሽ ሲሞና ጌቲቲዛ ጳጳርሲ ዋጎሎዛ ጊዶ ጌሊዲ ፃታኔ ኢቻሹ ታማኔ ሄቭ ዋጋ ጌታ ሞሌቲ ኩሚዳ ጌቲዛ አባፌ ጌዳ ጋይ ቦላ ጎቹዳሰ። ሃሳ ማላ ዳር ሞሌራ ዲንካ ጌቲዚ ዳኮቲቤና። 12 ሃሳፌ ጉዬ ዩሱሲ ኢሰታ “ሃ ዪዲ ሚቲ” ጊዳሰ። ኢዚ ጎዳ ዩሱሳ ጊዲዳይሳ ወሪ ኤሪዳ ገሽ ኢዛ ካሊዛይታ፣ ኢሳዳይካ “ኔ ኦኔ?” ጊ ኦይቻናሰ ፃሊዳይይ ባሞ። 13 ዩሱሲ ዪዲ ኡኬላኔ ሞሌዛ ኤኪዲ ኢሰታሰ ኢሚዳሰ።

14 ዩሱሲ ሃይቆ፣ ዳንዲን ኢዛ ካሊዛይቲ ኢዛ ቤዪሺን ሃይሲ ሄቭንሉ።

ዩሱሲ ጳጳርሳ ኦይቹዳ ኦይሾ

\* 21:3 ሉቃ 5:5 \* 21:6 ሉቃ 5:6

15 ኢስቲ ሚ ገረሺን ዩሱሲ ሲሞና ጴጥሮሳ “ዮና ና ሲሞና! ሃይታንታፌ ኔ ታና ኣላ ታና ደሳይ?” ገዴስ። ኢዚካ “ኤ ታ ጎደ! ታ ኔና ደሲዛይሳ ኔካ ኤራሳ” ገዴስ። 16 ዩሱሲ ኢዛ “ታ ቆሚዛይታ ሃማ” ገዴስ፤ ናሞዓንሉካ “ዮና ና ሲሞና! ኔ ታና ደሳይ?” ገዴስ፤ ኢዚካ ዛሪዲ “ኤ ጎደ! ታ ኔና ደሲዛይሳ ኔካ ኤራሳ” ገዴስ፤ ዩሱሲ ቃሴካ “ለቃታ ናጋ” ገዴስ።

17 ሄሻንሉ “ዮና ና ሲሞና! ኔ ታና ደሳይ?” ገዴስ። ኢዚ ሄሻንሉ “ኔ ታና ደሳይ?” ገዴ ገሽ ጴጥሮሲ ሚቹቲዲኔ “ጎደ! ኔ ወርሳ ኤራሳ ታ ኔና ደሲዛይሳካ ኔ ኤራሳ” ገዴስ፤ ዩሱሲካ ቃሴካ “ታ ደርሳታ ሃማ። 18 ታ ኔስ ቱሙ ጋይስ፤ ኔ ናቴላን ዳሼ ኔ ገሌ ኔርካ ገዳዳ ኔ ኮዩዳሶ ባሳሺን፤ ኔ ጨሚዛ ዋዴ ገዲኮ ኔኒ ኔ ኩሼታ ፒዲሲን ሃራ ኣሲ ኔና ገዲሳና ኔ ደሶንታሶ ኔና ኤፋና” ገዴስ። 19 ዩሱሲ ኢዛ ሄሳሉ ገዳይ ጴጥሮሲ ኣይ ማላ ሃይቆን ያሴ ቦንቻናኮኔ ኢዛስ ኤሪሳናሳ፤ ሄሳፌ ጉዩ ጴጥሮሳ “ኔ ታና ካላ” ገዴስ።

20 ጴጥሮሲ ዩሼ ያሊዲ ዩሱሲ ደሲዛይሲ ኢዛ ካሊሺን ቤዩዴስ፤ ሄሳዴይ ካሴ ኢስቲ ካዎ ሚሺን ዩሱሳ ሃይላኮ ሸቁዲ “ጎደ! ኔና ኣሉ ኢማናዴይ ኢዚ ኦኔ?” ገ ደይቹዴስ። 21 ጴጥሮሲ ኢዛ ቤዩዲ “ጎደ! ሃይሳዴይ ዋናንዴ?” ገዲ ዩሱሳ ኦይቹዴስ።

22 ዩሱሲካ ኢዛስ “ታ ሃ ሲማ ያና ጋካናዉ ታ ኢዛ ፓፃ ዋሉኮ ኔና ኣዚ ጋሊዴ? ኔ ታና ካላ” ገዴስ።

23 ሄሳ ጋሶን ኣሻታ ገደን “ኢዚ ሃይቆ ሃይቆና” ገዛ ዎሬይ ላሌቲዴስ። ገደ ኣቲን ዩሱሲ “ታ ያና ጋካናስ ፓፃ ዳና ማላ ታ ኮይኮ ኔና ኣዜ ጋሊዴይ?” ገዴስ ኣቲን “ሃይቆካ” ገቤና።

24 ሄ ዮጋታ ገሽ ማርካቲዳይኔ ያፊዳይ ሃ ዩሱሳ ካሊዛይሳ፤ ኢዛ ማርካቲሉካ ቱሙ ገዲዲይሳ ኦኒ ኤርስ።

25 ዩሱሲ ኦሉዳ ሃራ ዳርቲ ዴቴስ። ታስ ሚሳቲዛ ማላ ኢዚ ኦሉዳ ሚሻታ ወርሲ ኢሲ ቦላ ያፊዛኮ ያፊቲዛ ማፃፋታ ሃይሲ ኣላሜይ ቶካና ዳንዳዬና።

**ኦሪሳ ጩቆ ማፃፋ ንሞሉ**

**New Testament in Gamo (ET:gmv:Gamo)**

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gamo

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 29 Sep 2022 from source  
files dated 29 Jan 2022  
dffa0cbb-5f77-5875-bf95-f4176677af45